

АБДУЛЛА ОРИПОВ

ТАНЛАНГАН АСАРЛАР

Фафур Фулом номидаги Адабиёт ва санъат нашриёти
Тошкент — 2001

Aim.Uz - Axborot Izlash Markazi



*ТАНЛАНГАН
АСАРЛАР*

ТҮРТ ЖИЛДЛИК

*УЧИНЧИ
ЖИЛД*

Таржималар

Фафур Фулом номидаги Адабиёт ва санъат нашриёти
Тошкент — 2001

Ўз 2
O-68

Таҳрир ҳайъати:
О. Шарафиддинов, М. Қўшжонов, Э. Воҳидов,
Х. Султонов, Р. Ш. Шоғуломов, М. Юсуф, К. Норматов

Тўплаб, нашрга тайёрловчи Дониёр Бегимқулов

O **4702620202 – 20**
M352(04) – 2001 режа 2001

ISBN 5-635-01992-7

© Абдулла Орипов,Faфур Фулом
номидаги Адабиёт ва санъат
нашриёти, 2001 й.

Aim.Uz - Axborot Izlash Markazi



ДАНТЕ АЛИГЬЕРИ

Илоҳий комедия

ДЎЗАХ

БИРИНЧИ ҚҮШИҚ

Данте қоронғи ва зулмат ўрмона тун бүйи адашиб, тонгга яқин у ердан бир амаллаб чиқиб олади ва юксак тепаликка күтарила бошлайды. Аммо унинг йўлини қоплон, арслон ва қашқир тўсиб, қайтадан ўрмонга қисиб бора бошлиди. Шунда шоирнинг рўпарасида қадимги дунё шоири Вергилий пайдо бўлади ва таскин сўзлар айтади. Уни Дўзах ва Аросатдан омон-эсон олиб ўтажагини, Жаннатга эса Беатриче олиб киражагини билдиради. Шундай қилиб, Данте Вергилийнинг изидан кетади.

Ердаги умримнинг ярмини юриб,
Зулмат водийсида адашиб қолдим.
Боқсам, бир ўрмонга кетибман кириб.

- 4 О, уни нега ҳам ёдимга олдим,
Даҳшатларга тўла ўрмон эди у,
Эсдан чиқаролмай неча йил толдим.
- 7 Ҳатто ажал ундан туюлгай эзгу,
Лекин топдим ундан мангалик савоб,
Айтай кўрганларим мисоли кўзгу.
- 10 Эслолмам, лекин бу тушмиди, сароб,
Қандоқ кирдим у ён йўлимдан озиб,
Қандай рўё мени этганди хароб?!
- 13 Мени қон қақшатган водийдан ошиб,
Тофнинг унгурига етдим ва шу он
Юксак тепаликка бордим ёнашиб.
- 16 Боқдим, сайёralар бўлди намоён.
Уларнинг раҳнамо нури басма-бас
Порларди тоғларнинг кифтида шоён.

- 19 Гүё тун қўркуви бўлганди абас,
Даҳшатлардан холи руҳим ҳам, биллоҳ,
Олганди анчайин енгил, хуш нафас.
- 22 Тўлқинлар қаъридан қутулган сайёҳ
Соҳилга чиққан дам ортга боқиб жим
Хўрсиниб қўйгандай аламдан гоҳ-гоҳ.
- 25 Абгору безовта менинг ҳам руҳим
Тин олди ортига қайрилиб ночор,
Риҳлат сўқмоқларин кўрдим-ку шу зум!
- 28 Вужудимга энгач яна куч, мадор,
Заминга тўш босган пиллапоядан
Юксакка интилиб кетдим шиддаткор.
- 31 Баланд тоф бағрида қия қоядан
Тушиб келди ногоҳ бир қоплон чаққон,
Танаси палакдек хол-хол фоятан.
- 34 У юксак йўлимни тўсганча гирён
Айланиб туарди ютоқиб тугал.
Хаёл қиласр эдим қайтмоқни омон.
- 37 Лекин пайдо бўлиб офтоб шу маҳал
Юлдузлар тўдасин ортга кузатди,
Илоҳий Муҳаббат мисли даставвал,
- 40 Ситоралар тўпин бу ён узатди.
Субҳидам маҳали, хуш соат, гўё
Қалбдан таҳлиқани бир зум йўқотди.
- 43 Энди чўчимасдим маҳлуқдан, аммо
Шу ҷоқ пайдо бўлди ёлдор бир арслон,
Қалбдаги таскин ҳам сўнди мутлақо.
- 46 У босиб келарди гўё мен томон,
Келарди очликдан жағи такиллаб,
Атроф-теваракка солиб қатағон.
- 49 Қоқ суяқ қашқир ҳам тиши шақиллаб
У билан баҳамти соларди даҳшат,
Келарди жаҳлдор маҳлуқ яқинлаб.

- 52 Қашқирнинг дастидан тортдим кўп кулфат,
Таъқиб этар экан ёвуз назари —
Юксакликдан ҳатто қайтган эди шахт.
- 55 Хасис сармоядор тўплаган зари
Кўлдан чиқар чоғи оху воҳ ила
Кечмиш ҳасратини қилган сингари,
- 58 Мени ҳам чулғаган эди фулгула.
Таъқиб этар экан изма-из қашқир
Зулматда қолгандим энди бир йўла.
- 61 Зулмат водийсида эдим бетадбир,
Бир зот пайдо бўлди қаршимда ногоҳ,
Гўё танҳо, белутғф, толиққан, ҳақир.
- 64 Уни кўрган заҳот ёлвордим: “Эвоҳ,
Қутқазгин сен мени, айлагил карам,
Майли, одаммисан ва ёки арвоҳ”.
- 67 У деди: “Бир чоғлар бўлганман одам,
Асли ломбардлардан тарқаган зотим,
Мантуяда ўтган менинг шажарам.
- 70 “Sub Julio” даврида таваллуд топдим,
Август паноҳида яшадим Римда.
Азизни эъзозлар эди эл қадим.
- 73 Шоир эдим, шеърим суюнч дилимда,
Мағлуб Троядан Анхиз ўғли нақ —
Мағрибга кетгандай ночор қадимда.
- 76 Наҳот яна қайтсанг азобга мутлақ.
Нурафшон арш сари чиқмассан нечун?
У ерда ибтидо, фарофат ва ҳақ”.
- 79 “Бу сен Вергилийми, бепоён очун
Куйидан баҳраманд бўлган чашмадил?!—
Шундоқ жавоб қилдим жаҳд ортиб бутун.—
- 82 Назм аҳлин хуршиди, о пири комил,
Муҳаббатим бирла ва чекиб заҳмат
Ижодинг уқмоққа бўлганман ноил.

- 85 Сен менга устозсан, суюкли ибрат,
Хар қайда шон топган гўзал ва маҳбуб,
Услубни қолдирдинг менга сен фақат.
- 88 Менга манов маҳлук озор берар кўп,
Мадад айла энди, авлиё инсон.
Дастидан сабр косам кетди-ку тўлиб!”
- 91 “Сени қутқазади ўзга йўл аён,—
Холимга кўз ташлаб сўз бошлади у,—
Ваҳшатли манзилга қайтма ҳеч қачон.
- 94 Сени қон йиғлатган қашқир кўп бадхў,
Бу ёққа юксалса қайси бир банд
Маҳв этар, йўлларин тўсиб серқутқу.
- 97 У шундоқ ёвуздир, ғаддор, шарманда,
Очофат — еб тўймас, мечкай ва ҳарис,
Луқмадан сўнг баттар дод солар ганда.
- 100 Бу мода қашқирни босган ҳаром ҳирс,
Ураган жонзотни йўлдан урап, ғар.
Шавкатли Ит келгач, иши бўлар терс.
- 103 Нафс қули эмас у Қашқирдай бесар,
Дониш ва муҳаббат, номус-ор ила
Яшар қаноатда, доим музaffer.
- 106 Эвриал ҳамда Турн, Нис ва Камилла
Қурбон бўлган мулки итальянга хос,
Камарбаста бўлгай шонли Ит, илло.
- 109 Қаёнга қочмасин Қашқир каж, ифлос,—
Ит уни Дўзахга тиққувси бир қур,
Фараз манзилига тушгувси паққос.
- 112 Менинг сўзларимни энди тинглаб тур:
Руҳларнинг абадий маскани сари
Сени бошлаб кетай, менинг билан юр.
- 115 Ундаридир қадимий арвоҳлар бари —
Улар фарёдига соларсан қулоқ,
Тингларсан нечоғ зўр илтижолари.

- 118 Оташгоҳ томукда кўрарсан бироқ,
Бир қавмки, бўлса-да азобдан озод,
Жаннат фароғатин кутади муштоқ.
- 121 Яна юксакроқни айласанг мурод,
Диловар руҳ сени олгайдир кутиб.
Иккингиз кетарсиз, этармиз хайрбод.
- 124 Мен арш ҳазратидан кетолмам ўтиб,
Чунки айламадим йўлин эътироф,
Хатто ҳамроҳимни қолар у тутиб.
- 127 Амри вожиб тахти менга серитоб;
У жой олий даргоҳ, у олий хиргоҳ,
У жойга етишмак шараф ва савоб”.
- 130 Дедим: “Сен, йўлидан бехабар халлоқ
Расулининг ҳаққи, айлай илтижо:
Шоирим, балодан қутқаз мени, оҳ.
- 133 Йўл бошла, айтганинг руҳ сари аъло.
Пётр — Аъроф ҳаддин шуъласин кўрсам,
Кўрсам ётганларни маҳқум, мубтало”.
- 136 Кетди, мен эргашдим қадам-бақадам.



ИККИНЧИ ҚҮШИҚ

Данте ўзининг бундоқ сафарга тайёр эмаслигини идрок этиб, иккилана бошлайди. Вергилий эса бу ерга ўзининг Бетриче томонидан юборилганини ва Дантенинг Дўзахдаги дахлсизлиги учун эса самовотда қайғуришаётганлигини баён этади. Шундагина Данте ўзининг дастлабки қарорига қайтади ва Вергилий билан машаққатли сафарга йўл олади.

Кун қайтиб борарди, қорайиб осмон,
Замин жонзорлари кирди уйқуга,
Фақат мен турардим бесару сомон.

- 4 Ўзни чоғлар эдим сафар, қутқуга,
Хадикка соларди лекин машаққат,
Чидарманми дердим азоб, қайғуга.
- 7 О, сиз Илоҳалар, берингиз мадад,
Тамғаи даҳонгни, о сен, тафаккур,
Менинг баёнимда зоҳир эт минбаъд.
- 10 Дедим, раҳбонимга айлаб таҳайюр:
“Беназир бир ишга чорладинг, қайдам,
Курбим етармikan, этмам тасаввур.
- 13 Сен дейсан, Сильвийлар падари у дам
Ҳаёт занжиридан бўлмайин халос
Бақо дунёсига қўйганди қадам.
- 16 Куфру гуноҳларнинг баридан рўй-рост
Боҳабар хилқатнинг ўзики магар
Унинг шарафини айлабди эъзоз,
- 19 Иззат-хурмати ҳам бешак, муқаррар:
Савоб нури бордир пешонасида,
Римга салафликка бўлмиш мұяссар.

- 22 Шаҳар-чи, шон топиб замонасида
Ҳазрати Пётрнинг вориси учун
Айланди шариат остонасига.
- 25 Сен тўлиб куйлаган у зот, инчунин,
Зафар иштиёқи бирла бўлган банд;
У боис, музaffer папа ушбу кун.
- 28 Авлиё Павел ҳам Энейга монанд
Меърожга бир маҳал чиққанди, атай
Умматлар тангрига бўлсин деб пайванд.
- 31 Мен-чи, мен, ўзимни кимга тенг тутай?
Мен на авлиёман, на шоҳга аждод,—
Муносиб эмасман, ростимни айтай.
- 34 Рухлар оламида бўлурман барбод,
Ақлимдан озурман, у ерда, аё,
Англарсан барисин, сен дониш устод”.
- 37 Бўлар-кечар ишни чўтлагач расо,
Аввалги фикр ила ўйидан мутлоқ
Тониб, қайтиб турган кимсадай гўё,
- 40 Зулмат манзилида турадим шундоқ,
Аввал мафтун этган ўйларни энди
Фикру хаёлимдан қувлардим йироқ.
- 43 Рұх менга жавобан шундоқ ўтинди:
“Лутфингда ҳақғўйлик янграган замон
Рұхинг ваҳм-таҳлика ичра бекинди.
- 46 Ақлга зўр келса қўрқув ва гумон
Ярамай қолурмиз ҳеч битта корга,
Васвасага тушган жониворсимон.
- 49 Ваҳму гумонларга тушма бекорга;
Тингла, билганимни айлайин баён.
Не боис лойиқсан лутф, эътиборга.
- 52 Куфру савоб аро турган ломакон —
Бетимсол бир аёл чорлаб айтди сўз.
Адо этажакман ўтинчин, ишон.

- 55 У аёл нигоҳи бамисли юлдуз.
Гӯё фариштадай ширин каломи,
Шундоқ лутф қилганди — лутфиким лазиз:
- 58 “Шуҳрати дунёни тутган тамоми,
О, сен мантуялик покдомон банда,
Шонингга келмасин завол айёми.
- 61 Менинг шўр пешона дўстим шу дамда
Зулмат водийсида адашиб бeroҳ,
Турибди чорасиз, қўрқув, аламда.
- 64 Шундоқ пайғом келди кўкка баногоҳ;
Хавотирим буюқ, ўтди деб муддат,
Бардош бердими у кулфатга, эвоҳ.
- 67 Бор унинг қошига, бир чора қўрсат,
Гўзал сўзлар ила ё ўзга йўсун
Уни халос этсанг тинчлангум фақат.
- 70 Мен — Беатричеман, сўзим шу мазмун.
Севикли диёрдан мени бу томон
Олиб келган ишқдир. Лафзим ишқ бутун.
- 73 Тангри-таолодан сенга ҳар қачон
Имон тираб турай, номинг шарафлаб”.
Хитоб қилдим унга жавобан шу он:
- 76 “Ёлғиз сен туфайли, ёлғиз сен сабаб
Самога юксалмиш бандалар шони
Ўзга жонзодлардан олий, боматлаб.
- 79 Фармонингда бўлмак — юрак армони,
Зарра тамаим йўқ, билсам бўлди, бас,
Сенга не лозимдур — бажаргум они.
- 82 Заминнинг қаърига, дил бовар этмас,
Қандайин тушурсан қўрқмай, беҳадик,—
Кўкка тортиб турса истак ва ҳавас?”
- 85 Деди: “Гар бор экан хоҳиш шунчалик,
Майли, боисини айлайнин баён.
Билгил, қандоқ тушгум қўрқмай сира, тик.

- 88 Дилга яқин зотни күтгән ноаён
Яширин күлфатдан даркор эхтиёт,
Үзға даҳшатларнинг йўруғи осон;
- 91 Мени шу тахлитда яратмиш миръот,
Сизнинг азобларга этмасман парво,
Киравергум мангу оташга рўй-рост!
- 94 Кўкда бир аёл бор — пурҳиммат, расо,
Уқубатли зот деб чекди азият
Ва ҳакам дилига солди раҳм, зиё.
- 97 Сўнг Лючияга соҳиб мурувват
Юзланиб дедики: — бандай содик
Муридинг ғам чекар, айлагил шафқат.
- 100 Роҳила иккимиз эдик, ул ҳозиқ
Раҳмдил Лючия лутф этиб менга
Деди: “Шукронамиз тингласин холик!”
- 103 О, Беатриче, дил бериб сенга,
Оlam ташвишидан юксак чиққан зот
Күлфатда қолмишdir, мадад бер унга.
- 106 Ва ё қилмассанми шўрликка имдод?
Жангу жадалларда толиққан, ночор
У зотни тўфонлар этмоқда барбод.
- 109 Fam, күлфат дастидан эзилган, абгор
Кимса ҳам баҳт сари чопмагай бунча,
Дил-дилдан даъватга бердим ихтиёр.
- 112 Иқбол нарвонидан келдим тушганча,
Лутфу карамингга айлаб таважжух,
Устувор аҳдингга кўзим тутганча”.
- 115 Шундоқ сўзлар эди ғамгин, серандуҳ
Ёш билан порлаган чашми гирёни,
Мени сен сорига шошилтириди чўх.
- 118 Онинг муҳибиман, келдим шу они;
Йўл тўсиб, роҳингга бўлган тўғаноқ
Махлукдан қутқаздим ушбу замони.

- 121 “Нега имиллайсан? Тушунмам мутлоқ,
Нега журъатинг йўқ? Келмайди оринг?
Руҳинг ёритмасми у жасур чароқ?”
- 124 Ахир самовотда келиб бароринг,
Мадад берар бўлди кўқда учовлон,
Аёндир у йўлда қандай бораринг”.
- 127 Тунги аёз чоғи қақшаган, нолон
Чечак субҳидамда қайтадан яшнаб
Бош кўтарган каби гул ёзиб шодон,
- 130 Кўрқинч ҳам тарқади ўшанга ўхшаб
Ва дедим жавобан сўз қотиб дадил,
Жасоратим ортиб, таҳликам тарқаб:
- 133 “Нечоғ олиҳиммат карам этган дил!
У аёл йўругин йўруқ деган зот,
Мададга ошиққан, сен соҳиб кўнгил.
- 136 Сўзларингни тинглаб беҳад бўлдим шод.
Яна жасоратга тўлиқдир юрак,
Бошланган йўллардан кетавергум бот.
- 139 Фақат кўнгул ичра ёлғиз бир тилак:
Сен менга ҳодийсан, устозсан, соҳиб”.
Илтижом шу бўлди, мен тутиб этак,
- 142 Кетдик хилват, қора жарликлар ошиб.



УЧИНЧИ ҚҰШИҚ

Шоир Дұзах дарвозаси пештоқида дахшатли лавхани ўқайды ва Вергилій таскини туфайли ичкарига қадам құяды. Вергилій Дантега алқов ҳамда насткаш кимсалар жасо тортаётган Дұзах останасини күрсатади. Сүнгра улар Дұзах дарёси Ахеронга яқынлашаадилар. У ерда Дұзах қайиқчиси Харон маҳкумларни нариги қирғоққа ўтказиб құйши билан шуғулланады. Зилзила рүй беради, яшин чақнайды. Данте бедуш ииқилади.

“Элтаман хор, мискин элатлар сари,
Элтаман мангулик уқубат томон,
Үнда завол топган авлодлар бари.

- 4 Меъморимга этган ҳақ илхом эҳсон,
Мени бино қылган холиқи раззоқ,
Мени илк муҳаббат яратган шоён.
- 7 Мендан күхна фақат неки бор мутлок,
Абадият билан тургум баробар.
Кирсанг, умидларинг ташлаб кир шу чоқ”.
- 10 Хира пештоқ сари боқиб саросар
Мен ўша сўзларни ўқидим ногоҳ,
Дедим: “О, дахшат-ку, қилолмам бовар”.
- 13 Шундоқ жавоб этди устоз фаҳмосо:
“Рұхинг маҳкам бўлсин бу ерда фақат,
Енгмасин таҳлика, бўл буткул огоҳ.
- 16 Айтдим-ку, арвоҳлар қалашиб қат-қат,
Ақлу фаросатин йўқотиб мангу
Ётган манзилларга ўтармиз албат”.

- 19 Ваҳима чекма, деб қўлин чўзди у,
Юзларида эса сокинлик ажиб,—
Сирли йўлак томон бошлаб қолди-ку.
- 22 Зулматли маъвода чорасиз, фариб,
Тўхтосиз йифи-ю, оҳу нола, зор
Қошида ёш тўкдим аввал сарфариб.
- 25 Алаҳлаб ётарди ҳамма нолакор,—
Даҳшат, қўрқув тўла қуроқ қаломи,
Ёлворар, ўшқирап, талпинар ночор.
- 28 Барчаси айқашиб бунда тамоми,
Азобда, беадад, зулумот узра
Нолакор хок учар, қуюндай коми.
- 31 Дедим, бошим караҳт ваҳима ичра:
“Булар ким, бу нечук оҳ ила воҳдири.
Бу нечук халойик, англолмам сира?”
- 34 Устозим дедики: “Бир қавм бордир,
Билар у на шуҳрат, на ор, на номус.
Шундоқ яшаб ўтган, юзсиз, беордир.
- 37 Улар билан бирга бебок ва беюз
Лоқайд фаришталар тўдаси ҳам бор.
На осий, на содик, шундайин бетус.
- 40 Уларни маҳв этди само ғазабкор.
Қабул айламагай Дўзах ҳам ҳатто,
Топмагай ҳаттоки қуфри эътибор.
- 43 Дедим: “Айтгил, устоз, нечук ул жазо,
Нечук айб уларни этмиш хору хас?!?”
Дедики: “Қисқадир жавоб мутлақо:
- 46 Уларга ҳаттоки ажал ҳам боқмас,
Ҳар қандай қулфат ҳам бу ҳолдан созроқ,
Шу қадар мушкулдир кечар куни, бас.
- 49 Хотири заминда ўчгандир мутлоқ,
Жазо ҳам уларга бўлмаган раво.
Сўз қотиб ўтирма, ўта бер узоқ”.

- 52 Йироқда бир ялов кўрдим шу асно,
Мисли тўзон ичра ваҳший, ёвуз куч
Таъқиб этар эди уни доимо.
- 55 Ортидан чопарди бандалар фуж-фуж, —
Сира ишонмасдим уларга боқиб,
Ажалга шунча эл бўлганми деб дуч.
- 58 Нигоҳим этаркан уларни таъқиб,
Кўнгилчанлик боис осийлик қилган
Шўрлик кимсани ҳам олодим таниб.
- 61 Англадим, бу ерда ҳасратга тўлган
Пасткаш кимсалардир, бебок, овора,
На тангри, на иблис назарга илган.
- 64 Бандаи бешариф, бутқул бечора,
Уларни туну кун бижғитиб мудом
Таларди мўр-малах, қуршаб тобора.
- 67 Кўзидан қонли ёш оқарди тамом,
Очкўз қуртлар эса тортиб, талашиб
Уни ютишарди бамисоли ком
- 70 Ва боқсам бир оқим келарди тошиб,
Кўрдим у оқимга ёвуқ тўданни,
Дедим устозимга: “Ҳолни айт очиб,
- 73 Кимлар анов тўда, огоҳ эт мани,
Аён эт, у ёқда қандайин қудрат
Гўё оқим сари қувлар ҳаммани”.
- 76 Устоз жавоб қилди: “Келади фурсат,
Ахеронга томон борурмиз яқин,
Англаб олажаксан бор гапни албат”.
- 79 Замин оғушига кўз тикиб фамгин,
Эзма бўлмай дея кетдим шу дамда
Соҳил тарафларга йўл солиб сокин.
- 82 Боқсам, қайиқ суриб, додлаб аламда
Оппоқ соқолли чол келарди елиб,
Дерди: “Қуриб кетгил, лаънати банда!

- 85 Унут самовотни, менга дуч келиб.
Абадий зулмат ва оташ, муз сари
Элтажакман сизни, қўйингиз билиб.
- 88 Сен эса, сен эса кет мундан нари,
Арвоҳлар сафида нечук тирик жон?!”
Мени ҳайдар экан дерди жангари:
- 91 “Сен саҳв қилибсан келиб бу томон,
Жўнроқ қайиқ топгин яхшиси ҳозир,
То сени етказсин соҳилга омон”.
- 94 Йўлбошчим дедики: “Харон, бўл оғир,
Ахир самовотнинг истаги шундоқ,
Хархаша қилма кўп, вожиб ул амр”.
- 97 Тунд дарё дарғасин даҳшатли, пахмоқ
Башараси қотиб қолганди шу зум.
Кўзларида оташ ёнарди бироқ,
- 100 Мажруҳ бандаларга тушди-ку кўзим.
Мангулик азобга маҳкум қилган раб,
Аҳволлари нигун, топганлар тўзим.
- 103 Бақирап эдилар тангрини қарғаб,
Қисмату башарни, юртни бетўхтов
Сўкарди, авлоду аждодин булғаб.
- 106 Сўнг нола чекканча оломон дарров
Етарди азобкор дарё қаърига,—
Мавжи осийларни ютгай беаёв.
- 109 Харон-чи, ҳайқирап улар барига,
Даҳшатли эшкагин ҳар томон сирпаб,
Қатафон соларди танбалларига.
- 112 Куз чоги япроқлар сарғайиб, титраб,
Тўкилгайлар қур-қур ва бир кун шумтол
Кўргай либосининг ётганин қувраб.
- 115 Шундоқ, зоти Одам шўрлик, беиқбол
Тутдай тўкиларди, чорасиз, сўқир,
Тўрга тушган қушдек топарди завол,

- 118 Юзмоқда сув узра мана, бетадбир;
Кечувдан ўтишга улгурмай ҳали
Пайдо бўлди ўзга тўда бесабр.
- 121 “Ўғлим, — деди устоз вазмин, шиквали,—
Раббано газабин қўзгатган гумроҳ
Қавму эл, бу томон шошгай азалий.
- 124 Гувранар бу ерда турфа хил арвоҳ,
Одил тангри ҳукмин бўлиб қурбони,
Даъватга айланар қўрқув, нола, оҳ.
- 127 Кимнингки бут эса агар имони
Бу ерга тушмагай йўли ҳеч қачон,
Хароннинг шунинг-чун чиқди фигони”.
- 130 У сўздан тинганда, атроф ногаҳон
Титраб кетди буткул қасирға аро,
Қора терга ботгум эсласам ҳамон.
- 133 Ер қаъридан чиқиб боди марг бало,
Фам дашти оловга чулғанди чунон,
Бу қирмиз ёғдуга чидолмай асло,
- 136 Йиқилдим, уйқуга банди зотсимон.



ТҮРТИНЧИ ҚҰШИҚ

Даҳшатли момақалдироқдан сергакланған Данте ўзини биринчи доиранинг канорасида күради. Сұнгра у христиан динига мансуб бўлмаган кишилар ҳамда чўқинтирилмаган бола-бақра жойлашган Лимбга кириб боради. Ундан нарироқда эса Исо пайғамбар ақидасига гайри бўлган қадимги дунё донишмандлари ва қаҳрамонларини кўради. Улар орасида Шарқ донишмандларидан ибн Сино ва ибн Рушд ҳам бор.

Мудраган руҳимда қутқу дафъатан,
Босиқ сурон ичра кўз очдим бехос.
Кимдир уйғотгандай турткилаб бирдан.

- 4 Кўз ташладим тетик теграмга оз-оз,
Хар ёнга тикилдим туриб оёқقا,
Азоб диёрини кўрай деб бир оз.
- 7 Жарлик ёқасида эдик шу чоғда,
Пойимиз остида қўрқинчли дара
Шовқин, фарёд тўла гувлаб ётмоқда.
- 10 Шу қадар зулумот, теран, қоп-қора,
Унинг тепасидан боқдим ва лекин
Фарқлай билолмадим ҳеч нени сира.
- 13 “Ногирон дунёга ўтармиз секин,—
Шундоқ сўз бошлади шоирим беҳол,—
Мен йўлни бошлайман, сен эса кейин”.
- 16 Юзига боқдиму англадим дарҳол,
Дедим: “Сен ўзингки тушдинг даҳшатга,
Мен нетай, ўзинг айт, не кечар аҳвол?”

- 19 У деди: “Англадинг мени албатта,
Лекин сен кўражак бандалар дарди,
Даҳшатмас, фам солган қалбимга катта.
- 22 Йўл узоқ, пайтидир, кетайлик нари”.
Ортидан мен кетдим, йўл бошлади у,
Йўлимиз — заминнинг даҳшатли қаъри.
- 25 Қулоққа чалинган йифимас, ёху,
Инграш келар эди ҳар ёндан фақат,
Мангу хилқат узра тараалган оҳ бу!
- 28 Бу — бедард ҳасратдан қолган оқибат,
Мисли дучор бўлмиш ушбу дам фамга
Гўдаклар, аёллар тўдаси қат-қат.
- 31 “Нега сўз қотмайсан менга эй, ҳамдам,
Нега сўрамайсан буларни, нега? —
Шундайин сўз қотди йўлбошчим пургам. —
- 34 Ўйлама, булар деб бегуноҳ банда,
Уларни покламас фақат хизмати,
Ақидаси кўҳна, ўзга имонда;
- 37 Насорон динини кимки билмади —
Осийдир бир қадар, мен ҳам ўшандоқ.
Фоят буюк бўлди бунинг кулфати.
- 40 Маҳкуммиз барчамиз шу сабаб мутлоқ,
Парвардигор бизга ҳукм этган тадбир —
Юрибмиз ташнаҳол, ноумид, муштоқ”.
- 43 Алам юрагимни ўртади тахир,
Шундоқ ажиб зотлар ва неча буюк,—
Лимбо водийсида кезишар фақир.
- 46 “Айтгил, эй устозим, соҳибим суюк,—
Хитоб айлар эдим титраб аламнок
Ва имон келтириб тангрига қуюқ,—
- 49 Борми булар ичра бирор зоти пок,
Ё бирор дуоси, ё ўз савоби
Насиб қилган бўлса то нури афлок?”

- 52 Шундоқ бўлди менга устоз жавоби:
“Гувоҳман, бу ерга келди бир дафъа
Улуг ҳазратлари — фолиб жаноби.
- 55 Одам Атони у қутқазгандир, ҳа,
Ўғлонин ҳам шундоқ. Нуҳи муборак,
Ҳазрати Мусо ҳам у зотга халфа.
- 58 Шоҳ Довуд, нуроний Иброҳим бешак,
Авлод-аждоди-ла ҳазрат Йисроил,
Роҳила — қимматга тушган келинчак.
- 61 Бўлмиш кўп азизлар меҳрига ноил,
Лойиқ бўлолмаган бошқалар ва лек.
Илк бор ўшаларга боққанлар мойил”.
- 64 Улкан чангальзорда икков кетардик,
У фақат сўзларди, мен-чи, тинглардим,
Чангальзор — инсонлар руҳистонидек.
- 67 Хоб чулғаган жойдан йироқ кезардим,
Муқаввас зулматнинг тагида лов-лов
Ёнаётган ўтга тушди назарим.
- 70 Гарчанд узоқдайди биздан у олов,
Лекин ўша ёнда беҳад сарафroz
Зотлар гуруҳини пайқадим дарров.
- 73 “Эй, санъат ва дониш соҳиби устоз.
Айтгил, кимдир булар, турап овлоқда —
Ўзгалардан кўра боҳурмат, мумтоз”.
- 76 Устоз жавоб қилди менга шу чоқда:
“Заминни янгратган буларнинг шони,
Бу кун самода ҳам довруқ солмоқда”.
- 79 “Қутлангиз, энг юксак шоирни, қани”,—
Кимнингдир овози қолди жаранглаб,
Яқинлаб келарди руҳ ҳам шу они.
- 82 Шундайин сўзларни турардим тинглаб,
Эшиздим тўрт аъзам қадамин сасин,
Келардилар на шод ва на даргазаб.

- 85 “Боқ,— деди шавкатли устод олиб тин,—
Хаммадан олдинда, қўлида шамшир,
Рухсори улуғвор, қадами сокин
- 88 Гомер келар эди, шоирларга пир,
Ортида Гораций — шаддод қаламкаш.
Ундан сўнг Овидий ва Лукан шоир.
- 91 Бизни туташтирас буюк ном яккаш,
Қошида шунинг-чун айладим таъзим,
Ҳақлидир, булар ҳам боқсанда дилкаш”.
- 94 Қаршимда туардиги зотларки, азим,
Шеърлари жаҳонни янгратган беҳад,
Ҳануз бетимсолдир уларнинг назм.
- 97 Устоз пешвоз чиқди уларга хушвақт,
Куйчилар тўдаси юрди мен томон,
Мамнун жилмаярди устозим фақат.
- 100 Уларнинг сафига кирганим замон
Шарафим ошарди менинг тобора,
Сафда мен олтинчи зот эдим, шодон.
- 103 Суҳбатга берилдик юриб нур аро,
Бу ерда бизларнинг мулоқот гарчанд,
Билмам, лозиммиди ё йўқ, шу асно.
- 106 Қаср пайдо бўлди қаршимда баланд,
Етти қат девору етти қат равоқ,
Атрофда чулдирас чашмалар хурсанд.
- 109 Саф-басаф йўл босиб юрдик нарироқ,
Етти дарвазадан ўтди сўқмоқ йўл —
Чиқди қаршимиздан ям-яшил ўтлоқ.
- 112 Вазмин зотлар эди у ерда нукул,
Уларнинг овози сокин, жарангдор.
Нигоҳлари босиқ, сипойи буткул.
- 115 Очиқ майдон ичра буюк, шуъладор
Тепалик туардиги, савлати олий,
Унга кўтарилидик бизлар саф қатор.

- 118 Шу он яйлов узра, мисли хаёлий,
Шавкатли инсонлар бўлдилар пайдо,
Кўз олдимда эди улар жамоли.
- 121 Электра турар аждодлар аро,
Эней ва Гектор ҳам у ерда аён.
Бургутназар Цезарь, жангсевар даҳо.
- 124 Пентеселия ва Камилла бир ён,
Туардиди Лавина — ёнда отаси,
Олий жоҳ Брут ҳам бўлди намоён.
- 127 Цезарь қизи, Коллатин заифаси,
Гракхлар онаси, Катон маҳрами,
Салоҳиддин туар — сафда ҳаммаси.
- 130 Қиялик томонга боқдиму, жами
Донишманд зотларнинг устозин кўрдим,
Оқил ҳамдўстлари унинг ҳамдами.
- 133 Афлотун, Суқротга мен боқиб турдим,
Бақамти юрарди у зотга булар.
Дунё тасодиф деб атаган қадим —
- 136 Буюк ҳикматшунос Демокрит туар,
Анаксагор, Фалес, Диоген бунда, —
Зенон, Эмпедокл, Гераклит юрар.
- 139 Шифо билағони Диоскорид унда,
Сенека-ю Орфей, Туллий ҳамда Лин.
Кўзимни узоққа югуртдим шунда:
- 142 Ҳисобдон Эвклид, Батлимус, Гален,
Гиппократ, ибн Сино, ибн Рушд пайдо —
Янги ғояларни тарғиб этган чин.
- 145 Айттолмасман санаб барчасин асло,
Баёним бўлмоғи даркор мухтасар,
Тафсил қисқа эса этинг истиносно.
- 148 Икков қолдик, тарқаб давраи сарвар,
Осойиш бу жойдан қасирга томон
Ўзга манзилларга айладик бовар.
- 151 Қуршаб олган эди бутқул зимистон...

БЕШИНЧИ ҚҰШИҚ

Вергилий ва Данте айланиб тушган иккинчи доиранинг қопқасида бандаларнинг гунохини тайин этиб, жазосини күрсатувчи Минос ўтирган бўлади. Бу доирада шаҳватпрастлар жойлашган бўлиб, улар даҳшатли қуон комида бетўхтov айланиб юрадилар. Бу ерда Данте баҳтсиз севги қурбони Франческа билан суҳбатлашади.

Тарк этиб биринчи доира ичин,
Йўл олдим тубанга — бошқаси томон.
Гарчанд у мўъжазроқ бўлса ҳам, лекин

- 4 Минос кутар эди бизни беомон.
Айни оstonада сўроққа тутиб,
Дум силтаб, Дўзахга итқитар ёмон.
- 7 Маҳкум келган заҳот дарёдан ўтиб,
Қиссасини зўрға айта оларди.
Минос гуноҳларнинг ҳисобин этиб,
- 10 Дум ўраб, маҳкумни ҳайдаб соларди.
Айбига яраша — маҳкум ҳам жадал
Давраи хосига бориб қоларди.
- 13 Оломон турагри титраб, кутиб гал;
Даҳшатли ҳакамга бир-бир ёнашиб,
Учуб кетар эди пастга шу маҳал.
- 16 “О, сен, коми ғамга келган адашиб”,
Минос йиғиштириб ишини бирпас,
Сўз бошлаб қолди-ку, мен томон боқиб.
- 19 “Кимсан, ҳамроҳинг ким, сўзла шу нафас,
Ўзни бос, томуққа кирмоқ кўп қийин”.
Устоз жавоб қилди: “Йўлни тўсма, бас,

- 22 Роҳи Дўзах унга муқаррар, тайин,
Шаҳодат бергандир у Олий даргоҳ,
Даргоҳ амри вожиб, сенга айтайнин”.
- 25 Шу пайт қулогимга келди оҳ-воҳ;
Минглаб бандаларнинг турфа ноласи
Гангитиб қўйганди мени баногоҳ.
- 28 Бу ерда хилқатнинг ўчган нафаси,
Бамисли қўрқинч ва теран уммонда
Гирдибод олишар, чўнг гаргараси.
- 31 У Дўзах самуми, ҳамма томонда
Арвоҳлар тўдасин итқитар ҳар ён,
Чирпирак қиласиди зўр галаёнда.
- 34 Улар қоя узра учгани замон
Оламни тутарди даҳшат, бақириқ.
Додлашар тангрини қарғаб беомон.
- 37 Оломонга боқиб, билдимки аниқ:
Бу ерда ақл ила инсофдан кечиб
Зинога берилган кимсалар тўлиқ.
- 40 Қаҳратон қиши чоғи роса жунжикиб
Кўчган чуғурчуқлар галаси монанд,
Нокаслар тўзғирди бўронда учиб.
- 43 Чирпирак бўларди гоҳ паст, гоҳ баланд,
АЗоб-чи, бир нафас тинмоги душвор,
Бўшалмасди асло бу доми каманд.
- 46 Фамгин қуйлар билан қатор ва қатор
Жанубга йўл солган турналар мисол
Юксакда бир қавм учар нолакор.
- 49 Улар соя эди буткул bemажол,
Дедим: “Кимдир булар ва нечун ахир
Уларни тилкалар бу қора шамол?”
- 52 Устозим дедики: “Боққил бирма-бир,
У аёл кечмишда қанча эл-элат
Устидан хукм этган, юргизган амр.

- 55 Лекин у аёлда бўлган бир иллат,
Ўз ҳолига қўйган элатларни у
Этмоқ-чун ошкора ўзи ҳам ишрат.
- 58 Қадимги замона маликаси бу,
Семирамидадир — Нингадир маҳрам,
Мулклари Султонга топширилган-ку.
- 61 Мана, нозик ҳиснинг маъбудаси ҳам
Сихейнинг хокини этганди поймол.
Бу-чи, Клеопатра, гуноҳкор санам.
- 64 Жанглар сабабкори, энг гўзал аёл —
Елена мановдир. Бу — жасур Ахилл,
Мұҳаббат дастидан топганди завол.
- 67 Бу — Парис-Тристан”. Устоз хилма-хил
Қавму тўдаларни кўрсатди роса,—
Улар ҳирс йўлида бўлганлар сабил.
- 70 Бари олам узра солган овоза
Зотлар, маликалар эдилар номдор.
Сўрадим устоздан, руҳ тушиб тоза!
- 73 “Бўрон енгилгина учирган абгор —
Анов иккисидан эшитсан жавоб,
Чирпирак бўлмоқда иккови ҳам хор”.
- 76 Устозим дедики: “Сабр айла, шу тоб
Шамол суреб келар уларни бу ён.
Тўхтарлар, айласанг дилдан гар хитоб”.
- 79 Яқин келар эди улар биз томон,
“О, банди фуссалар, — дедим ўша чоқ,—
Жавоб айланг, берса агар У имкон”.
- 82 Бамисли ошёнинг илиқ ва муштоқ
Меҳрига талпинган қўша кабутар
Қанотларин ёзиб учгандай илҳақ,—
- 85 Менинг овозимни эшитиб улар,
Дидонанинг ғамгин сафин этиб тарк,
Хузуримга келди муаллақ, лобар:

- 88 “О, сен барҳаёт зот, о, сен руҳи барқ,
Келибсан кўргали бизни бу айём,—
Ер юзин қонига этганларни гарқ.
- 91 Рўйхуш бермас бизга самовот тамом,
Йўқса имонингни олардик сўраб,
Холимиз англаган, сен — зоти киром.
- 94 Мулоқот айлагил, мойил бўлса табъ,
Муштоқмиз, суҳбатдан баҳра олсак то,
Бу ер тинч — бўрон ҳам, қуюн ҳам тўхтаб.
- 97 Жилғалари билан келиб наҳри По
Тинган соҳилларда топдим таваллуд.
Хорғин суворийдир тўлқинлар гўё.
- 100 Муҳаббат дилларни ёққувчи зўр ўт,
Гўзал бир вужудга мафтун эди бу,
Вужудки, сўнгги дам бўлди хор, нобуд.
- 103 Ишқ бу — фақат ишқни чорловчи туйfy,
Мен ҳам қўнгил бердим унга шу асно,
Инон-ихтиёрим топширдим, ёҳу,
- 106 Етди бошимизга муҳаббат — бало,
Бизнинг қотил топгай Каиндан хос жой”,
Шундоқ сўз дердилар, бардоши адo.
- 109 Улар сўзин тинглаб, қаддим бўлиб ёй,
Беҳад изтиробда бош эгдим фамгин.
Устоз: “Не гап?” дея сўз қотди атай.
- 112 Дедим: “Бирор кимса ҳеч билганмикин,
Уларни қандайин пок, ширин хаёл
Бу аччиқ қисматга олиб келганин?!”
- 115 Улар сукутдайди, мен бердим савол:
“Шарҳи фаминг тинглаб, чидолмам сира,
Қалбга, Франческа, фам солди бу ҳол.
- 118 Муштоқ кўнгилларни фасли ҳажр ичра
Туташтирган недир, аён айлагил,
У қай бир тасодиф, қай ҳол соҳира?”

- 121 У деди: “Бахтсизлик чоғида ҳар дил
Шод пайтин эсласа ғам чекар ортиқ.
Бу ҳолга устозинг бўлғувси кафил
- 124 Ва лекин толесиз севгининг аниқ
Тафсилотин қилсан гар сенга аён —
Ҳар ённи қоплагай кўз ёшим аччик.
- 127 Ҳордик маҳалида бир кун икковлон
Ланчелот ҳақида ўқирдим қисса,
Фақат икков эдик, бепарво, шодон.
- 130 Кўзлар тўқнашарди саҳифа узра,
Юзга балқар эди энтикиш сирли.
Қисса ғолиб келди бизга, алқисса.
- 133 Йигит маъшуқасин интиқ ва нурли
Лабларига лабин қўйгани заҳот,
Дақиқа келди-ю, ажиб, сурурли,
- 136 У ҳам лабларига лаб қўйди, ҳайҳот.
Қолди жой-жойида китоб ҳам, аммо
Биз учун бўлганди гўё Галеот”.
- 139 Арвоҳ сўзлар эди уқубат аро,
Ҳамроҳи инграрди, инграрди шўрлик.
Ҳасратлари мени қилди-ю адo,
- 142 Йиқилдим ўша он, бамисли ўлик.



ОЛТИНЧИ ҚҮШИҚ

Учинчи доирада зил-замбил ёмғир, дўл, қор остида Цербернинг даҳшатли тирноқлари ва тишлари дастидан чексиз азоб тортаётган очкӯзлар қавми жойлашган. Улар орасида флоренциялик Чакко деган зот ҳам бўлиб, у Дантега қадрдан шахрининг тақдирни ва жазога мустаҳик бир неча элатларнинг қисмати ҳақида гапириб беради. Шундан кеийин Данте Вергилий билан йўқлик дунёси ҳақида сұхбатлаша туриб, Дўзахнинг тўртинчи доираси томон кетади.

Аянчли рўёнинг арз-ҳолин тинглаб,
Буткул бўлган эди тоқатларим тоқ.
Ҳали олар-олмас ўзимни ўнглаб,

- 4 Дуч келди ўзгача азоб ва қийноқ:
Маҳқумлар ётарди қаёнга боқмай,
Қаёнга юз бурмай арвоҳлар мутлоқ.
- 7 Совуқ, рутубатли ёмғир пәёпай
Ёғар эди бунда абадул-абад.
Дўзахнинг учинчи сахнидайдим шай.
- 10 Тупроқдан анқирди қўланса бўй бад,
Дўл, ёмғир, чиринди — бари аралаш —
Қоплаб олган эди заминни қат-қат.
- 13 Уч ҳалқум чўнг Церберъ — кўзи қонталаш —
Халойиққа қараб итдай ҳуаради,
Оломон балчиқда бижфирди яккаш.
- 16 Ҳамманинг терисин бир-бир шиларди,
Махлуқ хўппа семиз, тирноғи узун,
Қоп-қора соқоли сермой, юрарди.

- 19 Маҳкумлар қанжиқдай увлар уззукун,
У ёндан бу ёнга ағанаб ночор —
Ҳимоя қилмоқчи бўларлар ўзин.
- 22 Бизни кўргач, очди оғзин мисли фор,
Мурдор қурт — сур Церберь талваса тортиб.
Унинг буткул тани гувранар ғаддор.
- 25 Устозим эгилди, товонин артиб,
Тупроқдан сиқимлаб олди-ю шу он,
Аждар ҳалқумига юборди отиб.
- 28 Сўнгакка кўз тиккан кўпрак ниғорон —
Вовиллаб, бетиним фингшигандай сур,
Тингандай улушин олгани замон,
- 31 Цербернинг уни ҳам ўчди, ҳайтовур,
Шовқиндан донг қотган арвоҳлар гўё
Сукутдан топдилар ҳордиқ ва ҳузур.
- 34 Ёмғир шиббалаган арвоҳлар аро,
Вужудларни ошиб босдик биз қадам,
Вужудлар бўшлиқдай пуч эди, аммо.
- 37 Улар ётишарди тифиз, жамулжам,
Бири бизни пайқаб, солди-ю назар,—
Ёрнидан қўзғалди, термилиб пурғам.
- 40 “О, сен, жаҳаннамга келган биродар,
Мени билсанг керак, — сўз қотди арвоҳ,—
Тириқдинг мен бу ён қилган чоғ сафар”.
- 43 Дедим: “Шу қадарли ғарибсан, э воҳ,
Чехранг менинг учун буткул бегона,
Кимга ўхшашинг ҳам айтолмам бироқ,
- 46 Сўйлагил, сен кимсан, маҳкум бечора,
Даҳшатли азобга дучор бўлган зот.
Тўзим топаётган зумда минг бора”.
- 49 Деди: “Сен яшаган шаҳар — музофот,
Фийбат, ҳасад билан тўлган у маъво
Шахрим бўлган эди менинг ҳам, ҳайҳот!

- 52 Чакко деб атарди мени фуқаро,
Очофат эканман, шунинг сабаби
Чириб кетмоқдаман ёмғир, сел аро.
- 55 Танҳо эмасдирман. Бунда мен каби
Гуноҳ айлаганлар ётибди қат-қат”.
У шундоқ деди-ю, узилди гапи.
- 58 Дедим: “Чакко, сенинг шул экан қисмат,
Холингга боққанды эзилар қалбим
Ва лекин сен менга бир ҳолни англат:
- 61 Шаҳр аҳли не учун тарафкаш, ғаним,
Оқибат не кечар ва ким эрур ҳақ,—
Низо боисин ҳам айтарсан балким?”
- 64 У деди: “Хунхорлик бўлгай муҳаққақ,
Оқибат ўрмонлик келгайдир ғолиб,
Ғанимлар қувилгай, шармисор мутлақ.
- 67 Офтоб чиққанида уч бора балқиб,
Булар маҳв бўлғувси, улар қўзғаб бош —
Уларни қўллагай найрангбоз соҳиб.
- 70 Ғолибларга бўлгач шон, омад йўлдош,
Қаддин тиклашганин англашиб расо,
Мағлублар қўзидан оқизурлар ёш.
- 73 Икки тақводор бор, уларга аммо
Ҳеч ким қулоқ солмас. Очқўзлик, кибр,
Ҳасад — шу уч нарса доим бедаво”.
- 76 Сўзин адо қилиб тинди у дилгир,
Дедим: “Кулфатларнинг қаъридан бирпас
Марҳамат қил менга, аён эт, билдири:
- 79 Теггъяйо, Фарината руҳи забардаст,
Диллари ҳамиша ростгўй ва комил,
Ариги, Моска ё Рустикуччи, бас,
- 82 Уларни қўрмоқни истайди қўнгил;
Қисмати не кечди, улар қаёнда?
Дўзахми, Жаннатга бўлганлар ноил?”

- 85 Деди: “Улар жойи баттар ёбонда,
Дўзахнинг теранроқ қабатига бор,
Кўрасан уларни ўша томонда.
- 88 Лекин сенга сўнгти ўтинч айлай зор,
Одамларга эслат, улар сафида
Мен ҳам яшагандим, етказгил зинҳор”.
- 91 Зорлик зоҳир бўлди унинг афтида,
Тубанга энгашди, юздан қочди нур
Ва олди шўрликни замин забтига.
- 94 Устозим дедики: “Чалингунча сур,
Шундоқ ётади у тупроққа ботиб,—
Маҳшарда бағрига олгай яна гўр.
- 97 Яна ўз ҳолига келгувси қайтиб,
Тепасида тургай даҳшатли ҳакам,
Самовот садосин тинглагай ётиб”.
- 100 Бақо борасида сўзлаб дамо-дам,
Турфа арвоҳлару ёмғир, сел аро
Икков сокингина ташлардик қадам.
- 103 Дедим: “Айтгил, устоз, амри таоло
Бу маҳкум қавмларни найлар оқибат,
Ортарми, камаяр уларга жазо?”
- 106 Деди: “Севган фанинг таъкидлар минбаъд:
Бўлган сайин олам — хилқат мукаммал
Ортгувси роҳат ҳам, кулфат ҳам албат.
- 109 Мустаҳиқ бандалар эса ҳеч маҳал
Расо бўлолмагай ўзини таниб,
Тугалроқ бўлғувси қисмат нотугал”.
- 112 Икков кетар эдик шундоқ айланиб,
Суҳбат тафсилотин қилмайин тасвир,
Жарликнинг комида бизни шайланиб,
- 115 Плутос кутарди — балойи кабир.

ЕТТИНЧИ ҚҮШИҚ

Дўзахнинг тўртинчи доирасида посбонлик қилиб турган Плутос Дантени дағдага билан қўрқитмоқчи бўлади. Лекин Вергiliй Плутосни тинчтади ва исрофгарлар ҳамда зиқналар тормаётган жазони кўрсатмоқ учун муҳлисини йўлга бошлийди. Маҳкумлар улкан тошларни қўкраклари билан суришиб, бир-бирларини булғалаб сўкиши билан овора. Шоирлар бойлик маёбудаси Фортуна ҳақида йўл-йўлакай сўзлашиб, бешинчи доирада — газабнок, гаюр инсонлар жазоланаётган Стикс бўйлаб сафарларини давом эттирадилар.

“Pape Satan, pape Satan, aleppe!” —
Қичқирди Плутос бўғилиб шундок.
Менга таскин бериб устоз дедики:

- 4 “Махлуқ бўлса ҳамки, нечоғ ваҳшийроқ,
Ҳадик олма сира, маслаҳатим шу,
Қай куч бўла олур бизга тўғаноқ!”
- 7 Устоз айлаб қолди махлуққа ружу:
“Бас қил, бас қил дейман, лаънати қашқир,
Ўз бошинг ўзинг е, солмагин қутқу.
- 10 Биз зулмат қаърига тушурмиз ҳозир,
Қосид Микоилни сизга босабот
Йўллаган Миръотнинг амри шу, ахир”.
- 13 Кема ҳавозаси қулаган заҳот
Ўралиб-буралиб тушгандай елкан,
Махлуқ ҳам бўшашиб қолди бесабот.
- 16 Дунё жирканчлиги жамулжам бўлган
Азоб соҳиллари узра ошиб йўл,
Тўртинчи қаватга тушдик шахт билан.

- 19 Ё ҳақ парвардигор, раббано одил!
Қайси гуноҳ учун бунча уқубат?!
Ақл бовар қилмас, азоб шунча мўл!
- 22 Харибда бағрида тўлқин сершиддат
Тўлқинга дуч келиб ортга қайтгандай,
Маҳқумлар айқашиб ётарди қат-қат.
- 25 Улар шунча қўпки, саноғи йўқдай;
Икки тўда келар бирдан рўбарў —
Харсанг жилдиришиб тўшда пайдар-пай.
- 28 Тўқнашиб қулашар, қайтиб сергулу:
“Йифмоқ на ҳожат?” — деб бошлишар сурон,—
“Сарфиёт нечун?” — деб қилишар ҳай-ху.
- 31 Ним хира даврада айланиб гирён,
Ўтру келишарди нуқтада тагин,
Ҳолдан тойиб расо, сўкиниб чунон.
- 34 Тарафкаш тўдалар давраси ҳоргин
Қайта айланишга улгурмасданоқ,
Дедим устозимга дилтант ва фамгин:
- 37 “Кимdir анов тўда, хомуш, аламнок?
Бошин ялтиратиб қирган тепакал —
Наҳот руҳонийлар тўдаси нопок?”
- 40 Деди: “Рўпарангда турғанлар мужмал,
Хушлари шу қадар бўлмиш норасо.
Сарфу харажатда ноқис, беамал.
- 43 Ўша хусусида фингшир доимо,
Рўбарў бўлишар ўқраб ҳар дафъа,
Бир-бирига фаним, бамисли бало.
- 46 Анов тепакаллар ўзгача жаҳдда,
Зиқналик бобида тенгсиз қурумсоқ
Кардинал бу ерда, бу ерда папа”.
- 49 Дедим: “Мановларнинг сафида шу чоқ
Таниш кимсалар ҳам бордир, эҳтимол,
Номларин булғаган иллат ўшандоқ?”

- 52 Деди: “Танимогинг уларни маҳол,
Бемисл бад бўлмиш уларнинг суврат,
Таниб олмоққа ҳам ақлу зеҳн лол.
- 55 Улар тентирагай абадул-абад,
Гўридан тургайлар рўзи маҳшарда —
Бирори мушт туғиб, бири — кал талъат.
- 58 Кимки бедиёнат йигса агарда
Ва ё этса исроф — маҳкум мутлақо.
Қолғувси шулардай ғамда, қадарда.
- 61 Боқ, ўғлим, нечоғ каж Фортуна — рўё,
У боис одамзод омад талашиб
Курашар бир-бирин егудай гўё.
- 64 Оламда жамики сийм-зарни ташиб,
Үйиб қўйсанг ҳамки, бамисли хирмон,
Булар нафси қонмас, ютоқур очиб”.
- 67 Дедим: “Соҳир устоз, айлагил аён,
Одамзод жиловин чангальда тутган
Фолиб Фортунада қандай сир ниҳон?”
- 70 “О, шўрлик бандалар — аслин унуглан,—
Устоз таскин ила айларди хитоб,—
Сизнинг фаросатни зулумот ютган.
- 73 Тангри аввал-бошдан қўлмайин итоб,
Хилқатга йўллади расули раҳбон,
Нурин билвосита етказди шитоб,—
- 76 Баробар баҳраманд бўлсин деб жаҳон;
Дунё хайлининг-чи, жамики корин
Фортуна қўлига берди бегумон
- 79 Меъёрга солсин деб насиба борин,
Унинг ҳам маҳрида қисматдан жиҳат,
У тинглар иқболсиз авлодлар зорин.
- 82 У боис, забт этар элатни элат,
У ўз ҳунарини юритгай содик.
Илондай бекиниб иш кўрап фақат.

- 85 Фаҳмингиз фарибдир қошида аниқ;
Ўзга расуллардай айлар у бажо,
Кўнглига не келса агар мувофиқ.
- 88 Ҳукмини юргизар толиқмай асло;
Уни шошилтирас мұхтожлик мудом,
Лутфи бир дақиқа айламас вафо.
- 91 Уни этарлар ҳам гоҳида бадном,
Мадху саноларга лойикдир гарчанд,
Уни қарғайдилар беҳуда тамом.
- 94 У-чи, бепарводир, ўз иши-ла банд,
Хуштагини чалиб юраверар шод,
Тангрининг илк, эрка зотлари монанд.
- 97 Уқубат қаърига йўл оламиз бот;
Оғаётир таниш юлдузлар юксак,
Шошилмоқлиқ даркор!” — деди-ку устод.
- 100 Қабатни айланиб нарироқ ўтсак,
Оқиб ётар эди жилгалар қатор,
Ўзлари ўйишган жардан кечарак.
- 103 Сув эди қоп-қора, қуйқа, сермогор.
Биз уни ёқалаб кетдик қуйироқ,
Ошиб ён бағири сўқмоқ хатаркор.
- 106 Стигий ботқоги ичра тунд булоқ
Қайнаб тинар эди ва йўл соларди
Кул ранг қоя тошлилар томон шошароқ,
- 109 Боқсам, нарироқда гирдоб қайнарди
Ва унда айқашиб ваҳший оломон
Балчиқ орасида бижгиб юрарди.
- 112 Юлқишар эдилар улар беомон,
Тўш уриб, қўл силкиб, тиз уриб пайваст —
Шўнғиб, гажийман деб бир-бирин ёмон.
- 115 Устозим дедики: “Боққил шу нафас,
Фазабга йўл берган банда бу бари,
Ҳатто сув тагида бижгийди бесас.

- 118 Талпиниб ётишар бўшлиқлар сари,
Оҳу надомати эса тубандан
Пуфакдай биқирлар, бетин, сарсари.
- 121 Улар шивирлашар ночор шу важдан:
“Биз ёруг дунёда тунд эдик буткул,
Яшадик қовоқни сира очмасдан.
- 124 Мана, тиқилганмиз балчиққа нуқул.
Улар хиргойиси шулдир бу айём,
Тавбаси бефойда, аҳволи мушкул”.
- 127 Юҳодек ботқоқни айланиб тамом,
Сайҳон, балчиқлардан йўл солиб шитоб,
Ноҳуш манзарадан, хулласи калом,
- 130 Келдик бир минора қошига шу тоб.



САККИЗИНЧИ ҚҮШИҚ

Шоирлар ботқоқликни айланиб ўтишаётганда, уларнинг таширидан хабар топган Флегий икковлон сайёхни Дит шаҳрига ўтказиб қўймоқ учун қайиги билан етиб келади. Улар кечувда Филиппо Аржентини учратадилар. Қонқага етиб боришганда, иблислар Дантели ичкарига ўтказмайдилар. Вергилий уларга гап уқтирмоқчи бўлади, аммо иблислар дарвозани бекитиб оладилар. Вергилий, бизнинг мададкоримиз тезликда етиб келади, дея Дантели юпатади.

Алқисса, минора қошига ночор
Мушкул йўллар босиб етдик икковлон,—
Мезана кўринди баланд, қиррадор.

- 4 Икки ўт ёнарди у ерда чандон,
Жавоб берган каби буларга ошкор,
Йироқда бошқа ўт бўлди намоён.
- 7 Устодга дедимки: “Эй ҳикматбардор,
Бу қандай ўт эрур, қандоқ алангага?
Учинчи ул ўтда қандай сеҳр бор?!”
- 10 Деди: “Тикилиб боқ йироқ туманга,
Ўшанда англайсан, оташин чароқ
Кимни чорлашини ўзи томонга”.
- 13 Бир қайиқ келарди биз сари ногоҳ,
Камон ўқи каби, йўқ, ундан баттар,
Учиб келарди бир шиддаткор арвоҳ.
- 16 Ёлғиз бир эшкакчи қайиқда сар-сар
Ҳайқириб келарди биз томон тинмай:
“Тушдингми қўлимга, осий?!”— деб бесар.

- 19 Йўлбошчим сўз қотди пинагин бузмай:
“Флегий, беҳуда кўтарма ғавғо,
Бир зумлик ҳожатга дод солма, ҳай-ҳай”.
- 22 Кимдир лақиллатиб кетганин расо
Эшиштан кимсадай Флегий шу дам
Жунбушга кирди-ку, қарashi бежо.
- 25 Қайиққа ўтирди устод муҳтарам,
Оридан мен чиқдим, ўшанда бир оз
Қайиқ вазминлашди, валлоҳи аъзам!
- 28 Ўрнашдик кемага икков сарафroz
Ва кўхна бу қайиқ елди илгари,
Ёриб тўлқинларни кетдик шу алфоз.
- 31 Беҳаёт наҳр узра сузардик нари,
Бир кимса дедики (беланган лойга),
“Кимсан, куни битмай келган биз сари?”
- 34 “Йўлчиман, мубаққат,— дедим,— бу жойда,
Лекин ўзинг кимсан, бу қадар бадҳол?”
Деди: “Куним ўтар доим дод-войда!”
- 37 “Йиглайвер,— дедим мен,— йигла, бемалол,
Ифлоссан, кимлигинг қилолдим идрок —
Арвоҳсан лаънати, мангур шунда қол”.
- 40 У кўлин қайиққа узатди шу чоқ,
Устоз даф айлади лекин уриб зарб:
“Кет чиққан уйингга, кўппаксан шаккок!”
- 43 Устоз лутф айлади мени қучоқлаб:
“Нечоғ ҳимматлидир суронли ул руҳ —
Дунёга келтирган сени ёрлақаб.
- 46 Мағрур эди манов, лекин бешукуҳ,
Одамлар бермаган унга зарра дил,
Мана, жазо тортар, кўру кар, мажруҳ.
- 49 Ҳозир ҳукми жорий кўп шоҳлар ҳам, бил,
Қолдириб ўзидан шармисор бир ном
Шу жойга келурлар, тўнғиздай сабил”.

- 52 Дедим: “Имкон бўлса, устоз, шу айём
Кўрсайдим мен унинг чорасиз ҳолин,
Ботқоқча фарқ бўлиб кетишин тамом”.
- 55 Деди: “Ўтайлик-чи йўлнинг давомин,
Сенга насиб қилар у шод дақиқа,
Тўйиб кўражаксан унинг заволин”.
- 58 Ўша он арвоҳнинг устига лиқقا —
Оломон ёприлди, тангрига шукр,
Гувоҳ бўлдим мен ҳам бу кўргуликка.
- 61 “Ушла Аржентини!” — оломон ёвқур
Уни ўраб олди, у-чи, дарғазаб —
Ўз-ўзин тирнарди аламдан мажбур.
- 64 Даф бўлди, у ҳақда ўтирмам сўзлаб,
Эшитилиб қолди йироқдан оҳ-дод,—
Нигоҳ югуртирдим у ёнга қараб.
- 67 “Ўғлим, — деб лутф этди муҳтарам устод,—
Шахри Дитга келдик, бу ерда маҳкум
Кимки умр кўрган бўлса тунд, ношод”.
- 70 Дедим: “Работни ҳам этолдим мавҳум,
Қирмизи масжидлар бўй чўзган кўкка,
Ўтда пешлангандай товланар ҳар зум”.
- 73 Деди: “Мангу ўт бу, отилар тикка,
Шундан қирмиз бўлар минорлар юқсан,—
Рўбарў бўлдинг сен пастки томуқча”.
- 76 Қиялик хандақча кемани бурсак,
Зулматли пўртана бўлди намоён,
Бамисли чўяндай тегра-теварак.
- 79 Тубанга тушгунча айландик гирён,
Бўтана баҳрнинг бу тунд хўжаси
Қичқирди: “Тушинглар тушинглар чаққон!”
- 82 Қопқанинг қошида арвоҳ тўдаси
Соқчига гап сўқди мени кўрсатиб:
“Манов ким? Қандай зот? Кимнинг шарпаси?

- 85 Тирик зот бу ерда найлар адашиб?”
Устозим уларга айлаб ишора,
Ташрифим боисин айтди сир очиб.
- 88 Фазабин ютишиб, топмайин чора,—
Дедилар: “Бу ерга кир ўзинг танҳо,
Қайтариб юборгин уни дубора.
- 91 Бемаъни сафарин айласин адo,
Ёлғиз кетаверсин, ўзинг бунда қол,
Топсин у ўзига бошқа раҳнамо”.
- 94 Нафратли сўзларни эшитиб беҳол,
Билсайдинг, ўқувчим, тушдим ваҳмга,
Қайтиб кетиш йўлин топмоғим маҳол.
- 97 Дедим: “О, устозим, келгин раҳмга,
Мени ҳар балодан ўтказдинг омон,
Мададкор бўлгандинг доим руҳимга,—
- 100 Ёлғиз қўйма мени ушбу қўрқинч он,
Бизга бу шаҳарнинг дарвозаси берк,
Қайтайлик, яхшиси, орқага томон”.
- 103 Валломат ҳамроҳим сўз бошлади тек:
“Бизнинг йўлимизни тўсмоқлик душвор,
Йўруқ шундоқ бўлган, ҳайиқма ва лек,—
- 106 Шу ерда кут мени, умид бўлсин ёр,
Зими斯顿 қаърида бундан бу ён ҳам
Ўзим бўлажакман дўст, ҳожатбарор”.
- 109 Пири забардастим йўл солди илдам,
Қолдим ўзим танҳо, шубҳалар ичра,—
Нима бўлар экан оқибат?! Мубҳам!
- 112 Эшита олмасдим сўзларин сира
Ва лекин у билан сўзлашиб бот-бот
Ғанимлар кетарди ичкари кира.
- 115 Устознинг қошида, гумбурлаб, ҳайҳот,
Темир дарвозалар қолди ёпилиб,
Хорғин қайтиб келди ортига у зот.

- 118 Нигоҳи фуссали, маъюс, букилиб,
Устоз шивирлади: “Қайси ҳукми бад
Менга бу қалъани қўймиш ман қилиб?!”
- 121 У менга юз бурди: “Мен маъюс гарчанд,
Лекин сен чўчима, бу бора ҳам боқ,
Уларнинг бандини айларман парканд.
- 124 Уларнинг қилиғи таниш-ку, бироқ,
Ташқи қопқада ҳам кўрганмиз аввал,—
Қутқу, дағдагасин — бундан баттарроқ,
- 127 Эсингдами ўшал лавҳа марг, ажал;
Ўша юксакликдан бизнинг мададкор
Келмоқдадир аниқ биз томон жадал.
- 130 Қўрғон қопқасини очар у саркор”.



ТҮҚҚИЗИНЧИ ҚҮШИҚ

Данте қўрқув ва ваҳима билан Вергилийдан аввал ҳам бу йўлдан ўтган-ўтмаганигини сўрайди. Вергилий эса бу йўлдан қачон ва қандай қилиб ўтганлигини гапириб беради. Дафъатан қасоскор илоҳалар пайдо бўлиб, шоирларга таҳдид қила бошлийдилар. Вергилий Дантени ҳимоясига олади. Шу аснода само элчиси ҳам етиб келиб, шоирларга шаҳар дарвозасини очади. Ичкарида аҳли бидъат, осийлар сағаналарда Дўзах оловига чулғаниб ётган бўлади.

Ҳамроҳим мен томон бурилган заҳот,
Боқиб юзимдаги қўрқув, ҳадикка
Ўзни тутиб олди тетик, серсабот.

- 4 Мени тинглар эди боққанча тикка —
Йироқ-йироқдаги зулматли маъво
Ва бурқаб тутаган чўнг ботқоқликка.
- 7 У деди: “Музaffer ўлғаймиз, илло,
Мадад ҳамшираси бўлмагай заиф,
Қайдасан, соҳира, эй дафъи бало?!”
- 10 Устоз гапин тинглаб, бўлдимки воқиф,
Сўзлари паришон, калом тумтароқ,
Ҳариф сўзлар эди у лутфи зариф.
- 13 Жасоратим тугаб бўлардим адoқ
Ва ўшал калому ўшал илтифот
Менга туюлганди баттар қўрқинчроқ:
- 16 “Fусали юҳога, айлаб сайрбод,
Дастлабки қабатга биз кўрган нуқул
Нияти барбодлар тушарми, устод?”

- 19 Шундоқ сўз қотгандим жавоб қилди у:
“Мен ўтган йўллардан жуда камчил зот
Бу жойга етолган, топа олган йўл.
- 22 Бир бора ўтгандим мен ҳам рўйирост,
Чақириб олувчи вужудга жонни
Жодугар Эрихто қарғаганда бот
- 25 Ва руҳим тарк этган заҳоти танни,—
Яхудо сарҳадин қули-ла, ниҳон,—
Ўтгандим бу саддин топиб имконни.
- 28 Барча қабатлардан кўра зимистон
Чархнинг ҳалқасига етганман бориб,—
Бекор ташвиш тортма, йўл менга аён.
- 31 У теран қабатда гирдоб айланиб,
Пўртана қайнайди бадбўй, серзуфум,
Бизга зарб бермоқчи бўлар шайланиб”.
- 34 Унинг барча гапи эсда йўқ шу зум;
Юксак-юксакдаги алвон қасрга
Ўша он тушди-ку ҳасратли кўзим.
- 37 Ундан уч ёсуман солиб қасирға —
Учиди келар эди, ваҳмкаш рухсор
Ҳам яшил аждаҳо — чулғангандирга.
- 40 Аёлсифат эди бу уч қасоскор,
Лекин зулфу кокил ўрнида бадхўй
Сахро илонлари ўралган қатор.
- 43 Зулмат маликасин чўрилари бу,
Уларни устозим этди-ю раҳм,
Дедики: “Дарғазаб Эринийлар-ку.
- 46 Манов Тисифона — ўргада, лаим,
Сўлдаги Мегера, ўнгда Аленто —
Ўқраб келаёттир”. Устоз қолди жим.
- 49 Улар ўз-ўзини тирнашиб расо,
Фалаён соларди тинмай қийқириб,—
Устознинг пинжига кирдим шу асно.

- 52 “Медуза қаёнда? Қолсин тош қотиб;
Афсус, Тезейдан биз олмадик қасос”.
Улар шундоқ дерди тубанга боқиб.
- 55 “Кўзингни юмгилу ортга бурил боз,
Горгонага кўзинг тушмасин ногоҳ,
Йўқса тош қотгайсан!” — Шундай деб устоз,
- 58 Мени бу балодан қилди-ю огоҳ,
Ўзи кўзларимни ёпиб дафъатан,
Орқага қайтарди, паналаб, биллоҳ.
- 61 О, хушёр оқиллар, боқингиз, зотан
Менинг бу галати ашъорим аро
Англаб олажаксиз бир ўгит ростдан.
- 64 Иккала қирғоқни титратиб расо,
Атроф-теваракка солиб қатафон,
Ўкириб келарди қандайдир бало.
- 67 Шундоқ даҳшат солиб бетийиқ тўфон
Чирпираб қуюндай ташланса агар,
Унга сарҳад бўлмас, йўқ балогардон.
- 70 Шоху шаббаларни қайириб ташлар,
Итқитар, кўпорар дуч келса неки,
Ҳайвон ҳам, чўбон ҳам унга баробар.
- 73 Устоз кўзларимни очиб дедики:
“Бурқсаган қадимий кўпиклар узра
Сим-сиёҳ жойга боқ, йўқ учи-чеки”.
- 76 Илонни кўрганда аҳволи тийра
Ночор қурбақалар турли томонга
Жонини ҳовучлаб қочгандай гурра,—
- 79 Қўзим тушди шундоқ бир оломонга!
Стикс суви узра чопарди жадал,
Елгандай бамисли ўтлоқ — ёбонда.
- 82 Қўлинини шахт билан силкитиб ҳар гал
Елимдай тутунни қоларди ҳайдаб,
Фақат тутун уни қийнарди сал-пал.

- 85 Само элчиси у, ололдим пайқаб;
Устозим ишора қилдики, энди
Турмоқ лозим экан жим, сукут сақлаб.
- 88 Зими斯顿 қаъридан у гувлаб инди,
Қопқанинг қошига келди-ю шартта,
Дарвозани очди ва бир зум тинди.
- 91 Гулдураб, сўз бошлаб қолди шу пайтда;
“О, само қаҳрига учраган авлод,
Ўжарлик қиласан, қандай ниятда?
- 94 Ҳосил бўлармикан бирорта мурод,
Олий хилқат билан ўйнашмоқ нега?!
Фақат гуноҳингиз ортар бенажот!
- 97 Нечун ўзни урмоқ қисмат қаҳрига?!
Сизнинг Церберингиз, эсласангиз гар,
Роса ишқаланди тумшуғи ерга”.
- 100 Кетди у сўзини айлаб муҳтасар;
Деёлди ва лекин на сўз, на калом
Ва на парво қилди бизга бир қадар.
- 103 Кетди у; бизлар-чи, тетик батамом,
Муқаддас каломдан олиб куч-қувват,
Йўл олдик дарвоза томон шу айём.
- 106 Кирдик ичкарига билмай сира ҳад,
Мен-чи, маҳқумларнинг ҳолин кўрай деб,—
Атрофга кўз ташлаб борардим фақат.
- 109 Нигоҳ юргутиридим ичкари боқиб,
Кимсасиз мазгилни илғадим, лекин
Ҳасрат гуркуради юракни ёқиб.
- 112 Рона бўйидаги Арле деймикин,
Италь дарвозасин ювган Карпаро —
Ёнидаги шаҳри Поль каби мискин.
- 115 Туардик саноқсиз дахмалар аро,
Улар юксалганди қат-қат — мутаббак.
Инграш, оҳу фарёд тинмасди аммо.

- 118 Теграда ловиллаб оташ — мисли барқ
Ёндириб, куйдириб ётарди лов-лов.
Темирни ҳам бундоқ пешламаслар, ҳақ.
- 121 Мозорлар турарди очиқ, беаёв —
Уқубат ичида қайси бир гарип
Додлаб ётганини пайқардинг дарров.
- 124 Дедим устозимга күнглимни ёриб:
“Ушбу мозорларда ким чекар кулфат,
Нечун инграшади бари ёлбориб?!”
- 127 Устозим дедики: “Бу ерда бидъат,
Куфрға берилган бандалар бари,
Ётганлар барчаси кофирдир минбаъд.
- 130 Гунохига кўра қатор сафлари,
Оташ ҳам куйдирап шунга яраша”.
Устоз йўл бошлади ўнг қанот сари.
- 133 Кетдик азоб саҳни ва қаср оша.



ЎНИНЧИ ҚЎШИҚ

Шоирлар саганалар оралаб кезиб юришганда Данте маҳкүмларнинг баъзилари билан суҳбатлашиши истаги борлиги ни Вергилийга баён қиласди. Шу орада маҳкүмлардан бири Дантени чорлаб қолади. Бу — Фарината дельни Уберти. Данте у билан суҳбатлашиб турганда Кавальканте Кавальканти исмли бошқа бир маҳкум шоирга мурожсаат этиб, ундан ўғлини суриштиради. Данте унинг саволига қисман жавоб бергач, Фарината билан узилиб қолган суҳбатини давом эттиради. Фарината Дантенинг сургун бўлажагини башиборат қиласди ҳамда мархумлар ёруғ дунё ҳодисаларидан нечоғли хабардор бўлишлари ҳақида гапиради.

Турфа сўқмоқ бўйлаб, работлар ошиб,
Ҳасратли маъвода қадам-бақадам —
Устознинг ортидан кетдим эргашиб.

- 4 Дедим: “Қабатлардан қабатга шахдам
Мени элтаётган устоз бузруквор,
Жавоб бер сўзимга ва айла карам.
- 7 Бу оташ заминда маҳкум, хору зор.
Ётган кимсаларни кўрсак босавоб —
Йўқдир посбони ҳам, очиқдир мозор”,
- 10 Деди: “Маҳшар чоги, сахродан у тоб
Ўз шаклига кириб қайтурлар яна
Ва шунда бекилур мозорлар шитоб.
- 13 Диндан қайтганларга бу жой сагана,
Эпикур ва унга бўлганлар йўлдош
Мангу маҳв бўлгайлар бежон, бетана.

- 16 Бу ерда сен учун бордир суҳбатдош,
Сўроғимга жавоб бергай, ҳайтовор,
У сенинг қалбингга ниҳоний сирдош”.
- 19 Дедим: “О, йўлбошчим, ҳиммати зоҳир,
Барча йўриғингта айлаб риоят,
Сўзларинг қилурман қалбимга муҳр”.
- 22 “Эй, шаҳри оташда жонзот сертоқат,
Хоксор, камтарин, камсуқум мардум,
Кел менинг қошимга, айлаб иноят.
- 25 Лахжаю шевангни тингладим шу зум,
Ҳойнаҳой, юртимда топгансан камол,
Ўтказгандим юртга балки кўп зуфум”.
- 28 Ёнимдаги ўша қабрдан, филҳол,
Шундайин хитобни эшитдим, ё раб!
Устозга биқиндим қўрқув ичра, лол.
- 31 Устозим дедики: “Қўрқма, боқ қараб,
Бўй кўрсатган сенга Фарината бу,
Яrim танаси-ла аён, муқарраб”.
- 34 Тикилиб туардим энди рўбарў,
Қоматин фоз тутиб, Дўзахни гўё
Истеҳзоси билан ёритарди у!
- 37 Устоз мени бошлаб оташ, чўғ аро,
Хавфсизроқ заминга элтди ўша чоқ
Ва деди: “Сўзлашгил очиқ, ошкоро”.
- 40 Сагана қошига қўйгандим оёқ,
Мурда қўзларида чақнаб қатъият:
“Кимнинг авлодисан?” — деб берди сўроқ.
- 43 Устоз гапларига айлаб итоат,
Зотимни айловдим ошкора баён,—
Мурда қарашида ёнди жиддият.
- 46 Деди: “Фанимимдир сизнинг хонадон,
Муҳибларимга ҳам эрурсиз рақиб,
Сизни мен енгланман икки бор чандон”.

- 49 Дарҳол дедим: “Гарчи бўлса-да таъқиб,
Улар қайтиб келди ортига тагин,—
Қавминг бу борада беиқбол, фариб”.
- 52 Шу асно қабрдан бир арвоҳ бетин
Ияк чўзиб аранг ташлади назар,
Ерпарчин ҳолида тиз чўкиб, ҳорғин.
- 55 Кўз ташлаб атрофга, боқиб сарбасар,
Кимнидир ахтарди, жавдираб шўрлик,
Лекин умид сўниб, ингради баттар.
- 58 Деди: “Даҳо сабаб — келибсан тирик,
Унда, айт-чи, менинг ўғлим қаёнда,
Нега ёнингда йўқ, келмади нечук?”
- 61 “Ўзимча келмадим, — дедим бу ёнга,—
Устодим йўл бошлар; сизнинг Гвидо
Уни тан олмаган эди жаҳонда”.
- 64 Ҳоли алфози-ю, тортмиши жазо
Менга англатганди кимлигин дарров,
Жавоб этдим ошкор, не бўлса раво.
- 67 Жунбушга кирди у ҳасратда лов-лов:
“Тан олмаганимиди? Эзгу нур наҳот
Ёритмаган унинг чашмини бирров?!?”
- 70 Сукутда турганим кўргани заҳот
Унинг саси чиқмай қолди бутунлай,
Сўнг кўздан йўқолди ва бўлди барбод.
- 73 Мени мулоқотга чорлаган атай
У мағрур зот эса туар эди жим,
Ҳеч не кўрмагандай, пинагин бузмай.
- 76 У яна суҳбатни бошлаб айтдиким:
“Мен учун қавмимнинг чорасиз ҳоли
Дўзах азобидан баттар фам балким.
- 79 Эллик бор кўринмай ойнинг жамоли —
Бошингга иш тушар, англарсан тамом —
Қанчалар мушкулдир зафар аъмоли.

- 82 Ёруғ дунё сари қилурсан хиром,
Лекин айт, сизларнинг райъу риоя
Нечун қавмларимни таҳқирилар мудом?”
- 85 Дедим: “Талон бўлган ўша Арбия —
Харобот, қон учун бу тавқи лаънат.
Черковда шундақа талқин, ривоя”.
- 88 У оғир энтиқди, қалбиди ҳасрат —
Деди: “Жанггоҳда мен эмасдим якка,
Ким чиққан бесабаб ёхуд беният?!“
- 91 Флоренциянинг аммо кулини кўкка
Совурмоқчи бўлган чогида ғаним
Бир ўзим чиққанман майдонга тикка”.
- 94 Дедим: “То наслингиз омон топсинким,
На эрур, айтингиз, чора ва усул,
Уҳдасин тополмайчувалган ақлим.
- 97 Сизга аён эрур келажак буткул,
Фаҳмимча, барчасин кўрурсиз порлок,
Хозир безовтароқ боқасиз нуқул”.
- 100 Деди: “Олис манзил бизга аёнроқ,
Баъзи кўзи ўткир инсонларсимон
Бизга шу хислатни берган беҳтарроқ.
- 103 Не мавжуд ва нени яратгай замон —
Бизга қоронғидир. Тириклик сасин
Фановий хабарлар англатар аён.
- 106 Фаҳмларсан ўзинг ҳам бунинг барчасин
Ёпилган заҳоти қопқаи ҳаёт, —
Не билсак — биз учун бўлар чилпарчин”.
- 109 Итироб ичра мен хитоб қилдим бот:
“Анов хароб зотни айлангиз огоҳ,
Унинг ўғли ҳали тирик, барҳаёт.
- 112 Саволига жавоб қилмовдим, валлоҳ,
Шубҳа, гумондайди фикр ила таъб,
Бари аён бўлди энди баногоҳ”.

- 115 Устозим турарди чақириб, чорлаб,—
Арвоҳга узр айтиб, сўз қотдим яна:
“Бу жойда сен билан кимлар бор, ажаб?”
- 118 У деди: “Туман минг ушбу ўпқонда,
Федерик иккинчи, ҳамда Кардинал,
Шуларни санадим, очиқ айтганда”.
- 121 У ниҳон бўлганди. Қадамим жадал —
Шоири мозийга шошилдим нохос,
Жумбоқ у жавобни этмоқ учун ҳал.
- 124 Кетиб борар эдик, сўз қотди устоз:
“Нечук безовтасан? Сезяпман ахир”.
Унга эшитганим айтдим рўйирост.
- 127 Деди: “Эшитганинг ёзмиш ва тақдир,
Қисмат азалингдир, сир сақла шаксиз”,
Сўнг деди: “Унутма лекин бари бир,—
- 130 Назар қилган чоғи диловар у кўз
Англарсан қисматнинг энг тўғри роҳин,
Келажак йиллар рост кўрсатгувси юз”.
- 133 Сўнг сўлга йўл солди устозим сокин,
Йўлимиз бурилди девордан нишаб —
Жарликка — қабатнинг тубига яқин.
- 134 Бадбўй, қўланса ҳид келарди бурқсаб.



ЎН БИРИНЧИ ҚҰШИҚ

Шоирлар еттінчи доира тенасига бориб етадилар. Пастликдан бадбүй, құланса бир ҳид бурқсаб тұрады. Ҳидга тоқат қиолмаган шоирлар сал бўлса ҳам кўникмоқ учун пана Анастасий сағанаси ортига бекинишга мажсбур бўладилар. Вергилий Дантеға доира қабатларини тушунтиради ва судхўрлик, балохўрлик парвардигор иродасига номувофиқ эканини англатади. Сўнгра улар сўқмоқ бўйлаб пастликка эниб кетадилар.

Хандақнинг четига келдик яқинлаб,
Қоялар — тўшига қўйган чоф қадам —
Ўпирилиб кетарди баттар шовқинлаб.

- 4 Жарликнинг тубидан биз сари ҳар дам
Бурқсаб келар эди бир ҳид — құланса,
Сағана ортига бекиндик шаҳдам.
- 7 Лавҳа битилганди у ерда эса:
“Папа Анастасий бу жойда маҳқум,
Фотинадан кейин адашган кимса”.
- 10 “Қияга тушмоққа ошиқма бир зум,
Димоқ бадбүй ҳидга кўниксин сал-пал,
Сўнгра билинмагай”, — деди устозим.
- 13 Дедим: “Беҳудага ўтар фурсат, гал,
Бирор не сўйлагин, лутф этиб, қани”.
Деди: “Ниятим шул менинг ҳам, тугал”.
- 16 “Ўғлим, — сўз бошлади устоз сермаъни,—
Чоғроқ уч қабатни кўрарсан ҳозир,
Улар эслатади учта зинани.

- 19 Лаънати арвоҳлар у ерда бижфир;
Фақат нигоҳ ташлаб ўтмоғинг учун
Айлайин уларнинг куфрини зоҳир:
- 22 Самога зид бўлган ёвузлик ва кин,
Адоват — муроди — ёлғон ва ўтрик;
Фириб, куч — уларнинг яроғи бутун.
- 25 Фириб, иллат экан инсонга шерик,
Яратганга эса буткул бегона.
Шу сабаб тангрининг газаби буюк.
- 28 Илк қабат — жабру зулм аҳлига хона,
Учга бўлинади унинг ўзи ҳам,
Шунинг-чун уч хилдир шаклу остона.
- 31 Холиққа етказар озор ва ситам
Ва ҳам бандасига койиш ва кулфат.
Кўрсанг ишонарсан ўзинг мусаллам.
- 34 Ҳар бири топади кулфат оқибат:
Ўлим ё жароҳат, қувғин ё сургун,—
Ўғирлик, ўт қўйиш усули фақат.
- 37 Зоҳир минтақада қотил, аҳли хун,
Ўғри, йўлтўсару қароқчи — бари
Саф-басаф бўлинниб тентирад бетин.
- 40 Ит қавмида кетган бул баъзилари,
Қасд қилган ўзига, савоби абас.
Кўз ташлагин ўрта минтақа сари:
- 43 У ерда жамики ношукур, нокас.
Қиморбоз, исрофгар олган йифилиб,
Йўқотган ўзлигин, оқибати паст.
- 46 Койиш етказарлар тангрига нолиб,
Диллари эгридир уларнинг тамом,
Яратганни мудом юарлар яниб.
- 49 Минтақа ортида Каорсо, Содом —
Балоҳўрлар аҳли ўтда чекар оҳ,
Ёнар шикоятчи осийлар бадном.

- 52 Фирибдан ҳамма ҳам хабардор, огоҳ,
Лаққа тушганга у келтирап бало,
Ишонмаганга ҳам қазгусидир чоҳ.
- 55 Сўнгиси меҳр ипин узар мутлақо,
Узар муҳаббатнинг ишонч риштасин,
Иккинчи қаватнинг азоби аммо —
- 58 Чулғаган риёкор, очкўз ҳаммасин,—
Алдамчи, ҳийлагар ё банди мансаб,
Қўшмачи, сохтакор, қаллоб галасин.
- 61 Меҳр ипи узилса оқибат сабаб,
Ишонч, имонга ҳам еткуси путур,
Барҳам топар дўстлик, ҳар эзгу матлаб.
- 64 Дитнинг тахти турган энг теран чукур —
Оlam туви бўлмиш энг пастки қабат —
Сотқинлар аҳлини мангуга ютур”.
- 67 Дедимки: “Устозим, лутф айлаб фоят,
Жаҳаннам қаърини этдинг ифода,
Маҳқумлар ҳаққинда қилдинг ҳикоят.
- 70 Лекин бандилар бор балчиқ юҳода,
Уларни савалар ёмғир ва қуюн,
Ҳаққин талаб қиласи букиб ирова,—
- 73 Бу қирмиз қалъага кирмаган нечун,
Холбуки, фазабга бўлмишлар дучор?
Сабабин айтиб бер бу ҳолнинг бутун”.
- 76 У деди: “Ҳақ йўлдан қайтдинг-ку зинҳор,
Фикрингда фалатлик бўлибди содир?
Ақлинг фаромушдур ҳамда бекарор.
- 79 Ахлоқ китобида ёзилган ахир,
Уч нарса фалакка бутқул нораво,
Наҳот эслолмассан уларни ҳозир:
- 82 Енгилтаклик ва кек, пастлик — уч бало;
Тангри таолонинг қошида зинҳор
Енгилтакнинг ҳоли эмасдир авло.

- 85 Тафаккур айлагач бу ҳолни такрор,
Эслагач маҳкумлар сафларин қайта —
Ким ичда бандиу, ким ташда абгор,—
- 88 Англарсан, не учун улар ҳар қайда,
Уларни иккига ажратмиш тангри,
Азоб ҳам бир қадар енгил у жойда”.
- 91 “О, ақлу зеҳннинг нури, сарвари,
Сенинг ўғитларинг тинглаб тобора
Таважжуҳим ошар ҳикматлар сари.
- 94 Марҳамат айла-ю англат дубора:
Нечун порахўру балоҳўр зоти
Тангрининг қошида энг паст, энг қора?”
- 97 Деди: “Кимнингки бор сабоқ саботи,
Файласуф неча бор унга уқтирган:
Хилқатнинг бошида аввал ижоди —
- 100 Ҳикмат ва илоҳа санъати турган;
Улуми зоҳирни варақласанг гар
Шу сўзлар чалинар кўзингга бирдан:
- 103 Санъат табиатга доим эргашар,
Шогирди мисоли борар изма-из.
У ҳам илоҳийдир асли бир қадар.
- 106 “Инжил” авроқидан уққансан шаксиз:
Ҳар икки жиҳатга тангри таоло
Яшаш ва яшнашни буюрган шаксиз.
- 109 Балоҳўр-чи, озган йўлидан, расво,
На хилқат, санъатни менсимас ҳеч бир,
У ўзга йўлларни излар доимо.
- 112 Фурсат ўтиб борар, қани энди юр;
Ҳут юлдузи бўлди машриқда пайдо,
Етти оғайнин фарб-шимолда туурур,
- 115 Йўлимиз олисдир тубангача то”.

ЎН ИККИНЧИ ҚЎШИҚ

Шоирлар Минотавр-Гавомардни ғазабидан тушириб, ўз яқин кишиларининг мол-мулки ва ҳаётига кўз олайтиргани учун қайноқ хун дарёда жазо торттаётган зўравонлар қавмини бориб кўрадилар. Бир тўда кентавр қўлида ўқ-ёй тутгани ҳолда маҳкумларни қамалда ушлаб туради. Кентаврлардан баъзилари шоирларга таҳдид қиласди. Лекин Вергiliй уларни ҳам тинчитади. Ҳатто бир кентавр Дантени нариги қирғоқча ўтказиб ҳам қўяди. Данте ундан бу жойларнинг тафсилотини ва жазога мустаҳиқ бўлган ҳукмдорларнинг номларини билиб олади.

Томуғнинг тубига элтгувчи жарлик
Жуда даҳшат эди ҳамда хатарнок,
Ҳар қандай кимсани ҳам чўчитарлик.

- 4 Зилзилали кўчкин туфайли андоқ
Тренто шаҳрининг паст томонида
Адич соҳилига қулаганди тоғ.
- 7 Фадир-будур ўша харсанг комида
Пастга тушмоқ бўлса агар халойик,
Юрарди тошларнинг қирра томида.
- 10 Бу зулмат маъво ҳам ўша жой янглиқ;
Қиялиқда эса ётарди найнов —
Аҳли критликнинг исноди — махлук.
- 13 Минотавр — гавомард — ярим одам, гов,
Бизни кўрган заҳот бошдан учиб ҳуш,
Фажий бошлаганди ўзини дарров.
- 16 Устоз деди: “Жининг қўзидими, хўш?
Афина ворисин ёнига олиб —
Келди, деб ўйларсан, балки хасм куш?

- 19 Ҳамроҳим синглингга эмасдир жониб,
Ундан ҳийла дарсин олмаган, фақат
Кўз ташлар ҳолингга, нари тур бориб”.
- 22 Болтадан зарб еган буқа жон ҳолат
Арқонин узишга уриниб, аммо
Типирлаб ётгандай беҳол, бетоқат,
- 25 Гавомард ҳам тушди шу ҳолга гўё;
Зийрак устоз менга айлади хитоб:
“Югару тез! Пайқамас маҳлуқ мутлақо!”
- 28 Қиялик томонга йўл солдик шу тоб,
Ваҳима қўпарди қўйган чоф қадам:
Ўприлиб кетгудай эди тош, нишаб.
- 31 Ҳаёлга ғарқ бўлиб борардим илдам
Устозим сўз қотди: “Босдими ҳайрат,—
Жим қотган маҳлуққа қараб дамо-дам?
- 34 Илк бора Дўзахга келганим фурсат,
Бу ерда йўқ эди ҳеч қандайин роҳ,
Ҳар ён бундан баттар тош эди фақат.
- 37 Дитга маҳбус бўлмиш зотларни, биллоҳ,
Озод этай дея келди халоскор.
Қадам қўйганида у буюк салоҳ
- 40 Титраб кетган эди зулматли диёр;
Фаҳм этдим, нурига чулғанди жаҳон,
Шундоқ бўлган ҳазрат истаги бисёр.
- 43 Ҳақ меҳри туфайли — Мавхумот ҳар ён,
Ўшандада бу қоя бўлган чилпарчин,
Бошқа қоялар ҳам бўлганди пайҳон.
- 46 Лекин назар согин, теграда тошқин
Хун дарё оқмоқда, комида ёнар —
Кимки бандасига ўтқазган заҳмин”.
- 49 О, жоҳил кин, ғазаб, о, ҳасад кўр-кар!
Фоний умримизда эзғилаб, сўнгра
Жаҳаннам ичра ҳам қийнарсиз баттар.

- 52 Кўрдимки, ёймисол эгилган ўра
Сайҳонлик теграсин қамраган буткул.
Устоз айтганидан фарқи йўқ сира.
- 55 Ўлжа қувиш билан бўлишиб машғул —
Одам бошли отлар ҳад аро саф-саф —
Заминда кезгандай чопишар нуқул.
- 58 Бизларни кўришгач қотиши қараб,
Учови бўлса-чи келди яқинроқ
Биз сари, камонин шайлаб ва ростлаб.
- 61 Бири хитоб қилди, чиқиб олдинроқ:
“Ким сизни бу ёнга йўллади, айтинг,
Йўқса ўқ узаман, кўзғалманг мутлоқ”.
- 64 Устоз деди унга: “Бу нечук ваҳминг,
Биз фақат Хиронга берурмиз ҳисоб,
Қизиққон эдинг сен аввалу аслинг”.
- 67 Устоз менга деди: “Турган бу хуноб —
Деянира учун ўлдирилган Несс,
Ўлаётиб қасос ололган камёб.
- 70 Бошин эгиб турган бир ёнда шу кез
Ахилл отабеги — Хирон улуғвор;
Учинчиси Фолдир — шаддод, раҳмсиз.
- 73 Улар дарё узра юрар саф-қатор,
Кимки қонли мавжга берар бўлса чап,
Канорадан туриб камондан отар”.
- 76 Юрдик кентаврлар тўдаси тараф,
Туарди ўртада азамат Хирон,
Камон ўқи билан мўйловин бураб.
- 79 Дўрдоқ лабларини кериб шу замон
Деди ўзгаларга: “Манов мусофир,
Қадам босганида тош кўчар осон.
- 82 Арвоҳ қадам босмас бундайин ҳеч бир”.
Жуссаси гаройиб зот сари устод
Яқинлаб борди-ю, сўз қотиб, охир

- 85 Деди: “Тирикдир у, чиндин у ҳаёт!
Бу зулмат маъвода мен унга раҳбон,
Бекор келмагандир, боиси — најот.
- 88 “Ҳамд-сано” маҳали энг олий тобон
Берган фармойишни айлагум ижро;
Мен бадхулқ, у ўғри эмас ҳеч қачон.
- 91 Менга насиб бўлиб амри таоло,
Хатарнок сафарга чиқдим шу сабаб.
Бирингиз йўл бошланг, шулдир муддао.
- 94 Олинг йўлдошимни елкага жойлаб,
Саёзроқ кечувдан бошлангиз фақат —
Арвоҳ эмасдир бу, учса ҳаволаб”.
- 97 Ўнг томон бурилиб Хирон шу фурсат,
Нессга ўтинг қилди: “Бора қол, боргил,
Ҳайдаб сол, гар кимки учраса тўсат”.
- 100 Йўл солдик соҳиллар ёқалаб дадил,
Қайноқ дарёда-чи маҳкумлар ўқраб —
Азоб чекар эди қоврилиб сабил.
- 103 Манглайгача ботган баъзилар, ёраб,
Кентавр дедики: “Шоҳлар бу бари,
Ётарлар — наинки нафсу хун сабаб:
- 106 Буларнинг унвонин булғаган жабри.
Фессал Искандари, Дионисий бунда —
Сицилиянинг ундан битганди сабри.
- 109 Граф Аццолино — қоп-қора тунда,
Обиццо д’Эсте — рухсори порлоқ —
Нифоқ, низо тўла бетинч очунда
- 112 Уни ўлдирганди ўз ўғли бироқ”.
Устозим шу нафас илғаб нигоҳим,
Деди: “Уни кидир ҳозир ушбу роҳ”.
- 115 Бандалар тўдаси сари юрдик жим,
Уларнинг ҳар бири бўғзига қадар
Қайноқ тўлқинларда ётарди маҳкум.

- 118 Boқsак ёлғиз шарпа йироқда турар,
Несс деди: “Тензада ётган зотнинг у
Кўксига черковда урганди ханжар”.
- 121 Оқимдан пастроққа кўз ташлаб бадху,
Баъзи арвоҳларни ололдим таниб:
Зоҳир бирида тўш ёки елка — шу!
- 124 Саёзлаб борарди тўлқинлар тиниб;
Кечув тизза бўйи келди ниҳоят
Ва шунда дарёдан ўтдик талпиниб.
- 127 Кентавр дедики: “Оқим оқибат
Саёзлаб боради ва лекин яна
Теранлашиб кетар пастлиқда фоят.
- 130 У ерда қайнайди мудҳиш пўртана,
Барча мустабидлар бўлишгандир жам —
Вовайло қилишар, гарқоб айлана.
- 133 Самовот қаҳрига дучор кони фам:
Раббано қамчиси Аттила ва Пирр,
Секст унда; азобда ёш тўқар пурфам —
- 136 Жиш қилиб юзини кўз ёши тахир;
Риньер де Пацци ва Риньер Корнето,
Йўлтўсар, қароқчи гуноҳи кабир”.
- 139 Кентавр қайгадир бекинди, оё!



ҮН УЧИНЧИ ҚҰШИҚ

*Шоир Дұзах доирасининг иккінчи қаватига — ўз-ўзига
әхуд мол-мұлкиға қасад қылған худкашлар манзилгоҳига қадам
құяды. Худкашлар дараҳтга айланиб қолишиған бўлиб, шох-
шаббаларида гарпий-қузғунлар ин қуришган. Мол-мұлкини
қирон қылғанларни эса очкүз итлар тинимсиз таъқиб этиб,
ҳолдан тойғунча талайдилар. Данте Рьер делла Виньяни
учратиб, ундан нега ўзини ўлдирғанлигининг сабабини, худ-
кашлар қандоқ жазоларга дучор бўлажаскларини билиб ола-
ди. Шоир, шунингдек, бошқа бир неча маҳкумларни ҳам кўра-
ди ва улар билан мулоқотда бўлади. Марс ҳайкали билан
боғлиқ ривоятнинг тафсилотини эшигади.*

Кентавр дарёни кесиб ўтмаёқ,
Ёввойи ўрмонга қадам қўйдик биз.
У ерда бор эди на бирор сўқмоқ:

- 4 Қўнғир барглар қатор осилган тифиз,
Ўрмалаб киргулик, чалкаш ҳар томон,
Унда на мева бор, заҳардир илдиз.
- 7 Чечина, Корнето ёқда ҳам, аён,
Саҳройи маҳлуққа макон бўларлик
Бундақа хилват йўқ, йўқ бундай ўрмон.
- 10 Трояликларга солған-чун таҳлик
Строфаддан кетган бир гала қузғун —
Гарпийлар бу ерда жойлашган лиқ-лиқ.
- 13 Юзи қизбашара, қаноти узун,
Тирноқлари — қирра, қорин, тўш — серпай,—
Таратиб ётишар мудом мунгли ун.

- 16 Уқтириди устозим айлаб раъият:
“Уқиб ол сен шуни йўлга чиқмай то,
Иккинчи минтақа биз турган қабат,
- 19 Ундан нари эса оловли сахро;
Ажиб манзарани кўрарсан ҳозир,
Ишонмасдинг айтиб берганда асло”.
- 22 Ҳар ёндан нола, оҳ келарди оғир,
Бирор зот йўқ эди, лекин атрофда,
Қотиб турар эдим ҳайратда базур.
- 25 Устоз ҳам тонг қолган балки шу тобда,
Менинг назаримда, тўда оломон
Чангальзор ичидা додлар, азобда.
- 28 Лутф этиб, сўз қотди дониш сухандон:
“Бирорта бутоқни қайир ё синдир,
Чилпарчин бўлғувси сендаги гумон”.
- 31 Дафъатан қўлимни узатдиму бир —
Бутоқни синдиридим ва шунда бехос
Овоз чиқди: “Тегма, оғрийди ахир!”
- 34 Бутоқ сингган жойдан қон ҳам чиқди боз,
“Шафқатинг борми ҳеч? Азобинг бас қил,
Қийнама бунча”,— деб берарди овоз.
- 37 “Инсон эдик, энди ўсимликмиз, бил,
Муртад руҳларга ҳам раҳм эт ихтиёр,
Гуноҳдир бу қадар айласант сабил”.
- 40 Оловга ташланган бутоқ bemador
Ёнаётган чоғи ўзга учидан
Дарз кетиб, тўккандай кўз ёш шашқатор —
- 43 Дараҳт ҳам инграрди, зор қилиб чиндан,
Нола чекар эди беланиб қонга.
Мажруҳ шохча тушди қўлимдан бирдан.
- 46 Устоз жавоб қилди унга армонда:
“Менинг шеъримдаги кароматни гар
Утратишин билса ушбу ёбонда,—

- 49 Азоб бермасди у сенга бу қадар.
Токи англасин деб мўъжиза недир,
Сени юзлаштиридим, қалбимда қадар.
- 52 Унга кимлигингни айтгил, таништири,
Заминга қайтган чоғ айлар сени ёд,
Илтифотинг боис — қиласак хотир”.
- 55 Дараҳт нидо қилди: “Жозибали зот,
Майли, даъватингга жавоб айлайнин,
Ҳикоятим нохуш, этмасин ношод.
- 58 Федерик кўнглининг калити тайин
Менинг кўлимдайди, уни ҳар қачон
Чизган чизифимдан юргиздим майнин.
- 61 Барча сирларини сақлаб, бегумон,
Муборак бурчимни қиласай деб бажо,
Аямадим кучу ҳаловат, имон.
- 64 Йоксак қасрларга ёприлган бало,
Ҳасад — ғаразгўйлик — бедаво кулфат,
Саройлар оғуси, элларга вабо,
- 67 Аҳли сарой бўлди мен учун оғат,
Улар куткусига учди-ю Август,
Тинчгина бошимга солди фалокат.
- 70 Бундоқ маломатдан норизо, маъюс —
Худкашлик қилдим мен ачиқма-аччиқ,
Лекин ноҳақ бўлиб қолдим дабдуруст.
- 73 Илдизимда мудҳиш қон ҳақи, аниқ,
Яшадим — аҳдимни бузмасдан бир зум,
Қилдим хизматимни хўжамга содик.
- 76 Тириклик мулкига қайтсангиз, розим,
Мени тавқ-лаънатдан айлангиз ҳалос,
Шарафим ҳасаддан топганди тўзим”.
- 79 “Фурсатга қарагил, — сўз қотди устоз,—
У сўздан тўхтади, бўлса гар савол,
Яхиси, сен уни гапга солсанг соз”.

- 82 Дедим: “Ўзинг нени айласанг хаёл,
Сўрагил, менга ҳам то фойда мақбул,
Ўзим журъят этмам, келмақда малол”.
- 85 Менга имо қилиб соҳиби кўнгул,
Деди: “Бул — истагинг бажармоқча шай,
Лекин айт, о, зулмат қаъридаги қул,
- 88 Айтгил, шоҳ-шаббалар, қай йўсин, қандай
Сизнинг руҳингизни айлаган асир?
Халос бўлурсизми сиз бундан, қалай?”
- 91 Оҳ чекиб юборди дарахт кўп оғир
Ва шул баробари деди у мунгдор:
“Мухтасар жавобим сизга шундоқdir.
- 94 Сўнг нафас кўчган руҳ бешафқат, безор
Вужуд либосини тарк айлаган чоғ
Еттинчи юҳога йўллар Минос, хор.
- 97 Лекин тайин жойни қўрсатмас мутлоқ.
Ўрмонга тушар руҳ, мисоли уруг —
Сўнгра ўсаверар беэга, яйдоқ.
- 100 Навдалар улғаяр ва тана бўлуғ;
Гарпий — қузғун қушлар чўқлайди расо,
Жароҳат — туйнуқдир, инграймиз мунглуғ.
- 103 Биз ҳам вужуд сари боргаймиз, аммо
Маҳшарда биз уни киймасмиз қайта,
Воз кечдик — демак, тан — ҳаром мутлақо.
- 106 Вужудни ва лекин судраклаб шартта
Қўярмиз тиканак тагига қатор,
Фофил сояси-чи беҳис, албатта”.
- 109 Уқубатли дарахт яна давомдор
Сўзлайверар девдик, лекин сокин, лол,
Зимистон ўрмондан келди шовқин, зор.
- 112 Худди ўров чоғи овчи бемалол
Қобон югуришин, този қувлашин,
Чангалзор шитирин эшитганмисол,

- 115 Сўл ёқда иккита дабдала, парчин,
Ялангоч кимсалар бўлдилар пайдо,
Чигал чанталзорга уришиб тўшин.
- 118 Олдингиси дерди: “Келгил, ажал, о”,
Наригиси эса қолишмай зарра
Дерди: “Шижаотинг баланд-ку, Лано,
- 121 Чаққонсан Топпода кезгандан кўра”,
Маҳкум атрофига солди-ю назар,
Кулади ўша он бутазор узра.
- 124 Орқа ўрмонда-чи, лиқ қанжиқ итлар —
Кўзи олазарак, оч ва ютоқи,—
Бўшалган тозилар янглиғ кезарлар.
- 127 Йиқилган кимсага ўша заҳоти
Ёпишиб оларди тишларин қайраб,
Фажирди сўнгаги қолмайин токи.
- 130 Устоз бир бутоқقا қолди-ку бошлаб,
У-чи, алам ичра инграб беҳуда —
Узуқ шохлари-чун йиғларди додлаб:
- 133 “Жокамо де Санд Андреа, жуда
Номардлик қилгансан айлаб мени хор,
Бузғун ҳаётинг-чун айбдор менми, а?”
- 136 Унга яқин келиб устоз бузруквор
Деди: “Кимсан ўзинг, жароҳат аро
Нола чекаётган, чекаётган зор?”
- 139 У деди: “Бўлибсиз бу ерда пайдо,
Асрий зулмат ошиб келибсиз, аён,
Кўргали нечоғлик эканим адo.
- 142 Япроқларим уланг танамга чаққон;
Иоанн деб унут бўлди ул салаф,
Ўша шаҳар эди менинг-чун макон.
- 145 Қасос олаётир санъати ашраф;
Арн сувларида гар иттифоқо
Парчаси қолмаса эди, бешараф —

- 148 Аттил харобаси ўрнида асло
Куриб бўлмас эди ҳеч қандай қўрғон,
Тер тўкарди халқ ҳам чакки, мутлақо.
- 151 Кулбамда ўзимни қилганман қурбон”.



ЎН ТЎРТИНЧИ ҚЎШИҚ

Еттинчи доиранинг учинчи қавати қайноқ қумликтан иборат бўлиб, осмондан тинимсиз олов ёмғири ёғиб туради. Бу ерда парвардигорга, хилқат ва санъатга саркашлик билан терслик қилган гуноҳкорлар жойлашган. Улардан биринчиси — Дўзах азобига ҳам беписанд боқувчи Капанейдир. Шоирлар йўлда давом этиб, қонли жилғага дуч келадилар. Вергилий бу жилғанинг қандай пайдо бўлгани ҳақида, шунингдек, Дўзахнинг бошқа дарёлари хусусида Дантега сўзлаб беради.

Дилбар ватанимни хотирлаб ғамгин,
Тўкилган баргларни йиғдим битталаб
Ва беҳол танага қайтардим тағин.

- 4 Сарҳадга чиқдик биз ўрмон оралаб,
Учинчи ичида иккинчи қават,
Ҳакам турар энди тепадан қараб.
- 7 Келсин зеҳнингизга мана шу сурат:
Бамисли сўзана — улкан, паёпай —
Туарди беҳаёт, ўлик, яланг дашт.
- 10 Уни ўраб олган ўрмон уқадай,
Ўрмон атрофида қайноқ руд жўшар,
Саҳро четида биз туар эдик шай.
- 13 Қум эди ҳамма ёқ кетгунга қадар,
Худди бир замонлар Катон топталаб,
Босиб ўтган қайноқ чўлларга ўхшар.
- 16 Сатримни ўқиган ҳар кимса, ёраб,
Даҳшатларга тушиб қолмоғи бешак,
Бу ҳолга зоҳирда турибман қараб.

- 19 Саҳрода яланғоч арвоҳлар лак-лак,
Асрий азоб ичра йиғларди бари,
Ҳар қайсининг ва лек азоби бўлак.
- 22 Ким ётар чалқанча, юзи тескари,
Ким эса фужанак — серчанг заминда,
Ким эса тентирар бетин, сар-сари.
- 25 Тентираган руҳлар кўп эди бунда;
Узала тушганлар камроқдир, бироқ —
Уларнинг оҳ-воҳи чўнг эди жуда.
- 28 Саҳро устида-чи, сокин, ярқироқ,
Парча-парча ёғар оловли ёмғир,
Шамолсиз ҳавода ёқсан қор ончок.
- 31 Саратон оловин остида, оғир,—
Ҳиндга жаҳд айлаган Искандар қаттол
Палахмон ўтида қолиб бетадбир —
- 34 Лашкарга фармойиш бермишким, дарҳол —
Алангани бир-бир ўчирмоқ зарур,
Токи, мушкул бўлмай бутунлай аҳвол;
- 37 Шундоқ ёғиларди самум, оташ пур;
Ўтдаги пилиқдай ёнар эди хок,
Маҳкумлар азобин зўрайтиб допқур.
- 40 Кўрдим, қуриб кетган қўллар аламнок,
Танага ёпишган оташ парчасин —
Сидириб ётарди бетиним ҳар чоқ.
- 43 Дедим устозимга: “О, лойиқ таҳсин,
Мудом қодир эдинг, қила олдинг мот
Қопқани бекитган жиндан бошқасин.
- 46 Кимдир манов ётган бўйchan ва тунд зот,
Ёмғир ҳам юмшатмас азобни, аммо
У эса беписанд боқади наҳот?”
- 49 Фуур, мардлигига боқиб шу асно,
Ҳайратга тушганим англаб, деди у:
“Қандоқ яшаганман — шундоқман борҳо.

- 52 Сўнгги дам қилсин деб тавба-тазарру,
Мени қийнаш учун ясаган асбоб —
Оҳангари Зевс қийнасин, гап шу!
- 55 Монжибель темирчи аҳлин ё шу тоб
Бехуда кор билан айласин сарсон,—
“Кутқаз”, деб Вулқонга қилсин зор, хитоб —
- 58 Флегра устида дегандай нолон;
Бошимда, майлига, солсин дағдага,
Лекин қасос завқин туймас ҳеч қачон!”
- 61 Устоз жунбуш ичра кирди орага,
Уни бу ахволда кўрмовдим аввал,
Деди: “О, Капаней, ортириб ғовға,
- 64 Ёуруинг бошингни еган ҳар маҳал,
Ўжарлик қиласан қутуриб, қайнаб,
Ўзингга етказиб баттарроқ халал”.
- 67 Устоз деди сокин мен томон қараб:
“Февга зарба берган етти ҳукмдор —
Подшонинг бири шу: ўжар, дарғазаб;
- 70 Тангри қарфаса ҳам бўйсуммас, ғаддор.
Хозир айтганимдек, шон топган лойик,
Дагал сўз унинг-чун обрў, ифтихор.
- 73 Энди йўл юрайлик аввалги тариқ,
Чет-четдан қадам бос, бўлиб эҳтиёт.
Йўқса, кум оёғинг куйдирап аниқ”.
- 76 Етдик бир жилғага жим, сақлаб сабот,
Жилғаки — ўрмондан келгувчи оқим,
Ҳануз қутим ўчар эсласам, ҳайҳот.
- 79 Кетсин деб тандаги мараз, гуноҳим,
Аёллар сув олган Буликаме каби,
Кумзорда қайнарди чашма серваҳм.
- 82 Тош қотмиш жилғанинг ҳар икки лаби,
Тош қотмиш ҳалқобнинг туби ҳам буткул;
Англадим — шу ерда йўлнинг мансаби.

- 85 “Қопқадан ўтиб, то босиб қанча йўл,
Барча кимса учун очиқ маъвода,
Неники кўрибмиз маъқул — номаъқул —
- 88 Баридан шу жилға эрур зиёда;
Ундан буғ чиқади буткул ажойиб,
Маҳв этар ҳар қандай ўтни дунёда”.
- 91 Устоз шундоқ деди. Мен чанқоқ толиб,
Сўрадим: “Лутф айла, ташнадир қалбим,
Юрайин қошингда токи мен қониб”.
- 94 Деди: “Денгиз ичра бир жой бор, қадим,
Критдир унвони; унинг вақтида
Гуноҳкордан олам бўлган пок, карим.
- 97 Тоғлар орасида бор машхур Ида;
Бир чоғлар ям-яшил яшнаган маскан,
Ҳозир-чи, хароба бўлгандир жуда.
- 100 Рея гўдакларин унга бермишкан,
Излаган у жойдан бошпана, уя,
Гўдаклар йифисин шовқин-ла босган.
- 103 Тоғнинг устида-чи, улуғ қария;
Елкасин ўтирган Дамиате томон,
Рим сарифа эса боққандир қия.
- 106 Тилла бош нур сочиб турар нурафшон;
Қўкраги, қўллари — қўйилган нуқра.
Белигача эса мис эрур, шоён.
- 109 Белдан пастда эса темир бир сира,
Унинг оёқ кафти-чи хокитуроб лой,
Ўнг таянчи шу, лойдир — шокира.
- 112 Вужуди дарз кетган бошдан токи пой.
Сизиб ётар ундан кўз ёши тубан,—
Ва уни ютади пастда — фор — сарой.
- 115 Яна кета берсанг ўша йўл билан,
Тугилар Ахерон, Стикс, Флегетон;
Улар сўнг оқади яна ҳам теран.

- 118 Охир-оқибатда дарё — учовлон
Коцитга айланар; бу бошқа мавзу,
У жойни кўрарсан ўзинг бегумон”.
- 121 Дедим: “Ёруғ дунё суви экан бу,
Модомики, келмиш шу ерга қадар,
Нечун бирданига бўлди ниҳон у?”
- 124 Деди: “Пастга томон ўзан айланар;
Гарчанд босиб ўтдик қанчалар сўқмоқ,
Лекин йўл узоқдир юҳога қадар;
- 127 Ўтиб улгурмадик барчасин бироқ.
Йўлиқса дафъатан янги ҳодисот
Ҳафсаланг пир бўлиб тишлама бармоқ”.
- 130 “Лета қаёндадир? — савол бердим бот, —
Қайда Флегетон? Кўрсатгил, алҳол,
Уни сен кўз ёшдан девдинг-ку бунёд?”
- 133 Устоз карам қилди: “Ҳақ рост бу савол,
Лекин хун оқимнинг гуврашин тинглаб,
Сенга аён бўлди гаройиб бир ҳол.
- 136 Ҳали Летага ҳам боқарсан бўйлаб,
Арвоҳлар ўз-ўзин покловчи манзил,
Соҳиллар ёқалаб наҳр оқар ажаб”.
- 139 Сўнг деди: “Кетармиз бу ердан, билгил,
Мен билан изма-из юргайсан фақат.
Оқим бўйлаб ўтар энди сўқмоқ йўл.
- 142 Бунда ўт-оловни ютар рутубат”.



ҮН БЕШИНЧИ ҚҰШИҚ

Шоирлар құмлук ёқалаб кетаётіб, яшашиңнг табиий тарзига нисбатан зұравонлик қилған содомитлар (баччавоз) қавмiga дүч келадилар. Шоир үз үқитувчиси Брунетто Латини билан ёнма-ён бораётіб, Флоренция ҳақида, қисметтің үйріғи ҳамда зафар ва мағлубияттар ҳақида гаплашади. Брунетто үз атрофидагилар тұғрисида ҳам маңлумотлар беради, сүнгра үз қавми ортидан юрганничай кетади.

Ёқалаб борардик тошлоқ ёбонни,
Жилға тепасида тараплан бүг-пар —
Асарарди пускурган үтдан түғонни.

- 4 Бруджек, Гвидзант аро бир вақтлар,
Кудратли оқимнинг йўлинин тўсиб,
Фламандлар қурган дамбага ўхшар.
- 7 Къярентанодан келса сел жўшиб,
Падуанлар, қасримиз ювмасин деб то,
Брентда қўйгандай садди роҳ қуриб.
- 10 Шундай қурилганди бу жой ҳам, илло,
Ким бўлсин устаси — қурган-қурганча,
Улкан бўлмаса ҳам — ажибдир аммо.
- 13 Ўрмондан узоқлаб кетгандик анча,
Кўзга чалинмасди энди у ўрмон,
Ортимга бурилиб қарамай қанча.
- 16 Рўбарўдан чиқди арвоҳлар нолон,
Кўзларини узмай турдилар биздан,—
Мисли янги ойга боққан оломон.

- 19 Бир-бирига қараб қўярди зимдан;
Боқарди биз томон кўз қисиб синчков,
Чол ип ўтказгандай игна кўзидан.
- 22 Улар орасидан дафъатан бирор,
Мени таниб қолиб қичқирди: “Ажаб!”
Ва сўнг этагимга ёпишди дарров.
- 25 Куюк рухсорига турардим қараб,
Менинг этагимга ёпишган заҳот.
Унинг кимлигини англай олдим заб.
- 28 Энди аён бўлди мавхум турган зот:
Жизғанак бандага келиб яқинроқ,
Дедим: “Сэр Брунетто, сизмисиз, наҳот?”
- 31 У деди: “Афу эт мени, бўталоқ,
Балки бошқаларни бир зум этиб тарк,
Хоҳласанг, лотинча дарс ўтсан озроқ”.
- 34 Жавоб бериб дедим: “Розиман бешак,
Йўлдошим хоҳлагай истасангиз гар,
Сиз билан ёнма-ён ўлтирасам андак”.
- 37 Деди: “Бизнинг қавмда кетган бандалар,
Бир зум имилласа азоби ошур,
Юз йил олов ичра ёнар бешбаттар.
- 40 Юрингиз, сизларга эргашгум ҳозир;
Гуноҳлари кабир, азоби абад
Ўз қавмимга қайтиб келурман охир”.
- 43 Унинг йўли эди оловли қабат,
Шу сабаб ёнма-ён кетолмадим, лек
Борардим юксакдан букканимча қад.
- 46 Деди: “Қандай тақдир, қай қисмат малик
Сени олиб тушди бу ён тириклай,
Ва ким бу — йўл бошлар сенга шунчалик?”
- 49 Дедим: “Ёруғ дунё юзида, найлай,
Зулмат водийсида қолувдим танҳо,
Яшаб бўлмагандим умрим бутунлай,

- 52 Тунда илоҳамга терс келдим аммо,
Тагин йўлдан қайтдим — бунга келиб дуч,
Йўлбошчим бўлди у — айни муддао”.
- 55 Дедики: “Ёр бўлмиш саодатли бурж,
Илғай олган эдим ҳаётда тугал,
Иқбол ҳамроҳингдир, шону шуҳрат куч.
- 58 Фано топмасайдим агар бемаҳал,
Самовий йўлингга мамнун ташлаб кўз
Мадад берармидим, эҳтимол, сал-пал.
- 61 Лекин у ёвуз эл беҳиммат, беюз,
Фъезоль тоғларидан келган кўчманчи,—
Босар-тусарини билмайди ҳануз.
- 64 Фаним дер — яхшилик қилсанг-да гарчи;
Ҳамма ёқни босса алаф ва ажриқ,
Бечора лоланинг ҳолин кўрсанг-чи.
- 67 У халқни дердилар сўқир ва фосиқ,
Ҳасадгўй, ўлгудай ман-ман, очофат,—
Ёндашсанг қораси юқарди аниқ.
- 70 Ҳар икки тараф ҳам сенга терс ва бад,
Хизматинг кўролмай қайрашади тиш,
Қўлидан ҳемири келмагай, минбаъд.
- 73 Ўз похолин ковшаб қилсинлар хониш,
Фақат у маҳлуқлар сенга тегмасин,
Тегмасин, гар уруғ отган эса ниш.
- 76 Бир вақтлар ўтрик ва favfo уясин
Ичида бўй чўзган римликлар каби
Асрасин ўзида гавҳар донасин”.
- 79 Дедим: “Бажо топса юрак матлаби,
Ижобат бўлсайди мендаги тилак,—
Сўнмасди сизнинг бу ҳаёт кавкаби.
- 82 Сизнинг қутлуғ номни асрагай юрак,
Боқий ҳаёт йўлин неча бор такрор
Англатган, уқтирган устозсиз бешак.

- 85 Ажиб суратингиз дилда барқарор;
Сизнинг хотирангиз фоний дунёда
Калом ва сўз билан этгум баҳтиёр.
- 88 Қолди сўзларингиз дилда зиёда;
Бунинг барисин у айлагай қиёс,—
Агар насиб қиласа висол самода.
- 91 Фақат билиб қўйинг, виждоним бехос
Менга бермаса бас, шафқатсиз жазо,
Масъулман, қисматнинг йўруғига мос.
- 94 Кўнишиб қолганман бунга мутлақо,
Фортуна — тақдирнинг чарх калисоси
Қандай айлансин ҳам — менда не парво”.
- 97 Шу он эшитилди устоз садоси,
Лутф айлаб сўз қотди у кифтим оша:
“Дикқатдир — сухбатнинг асли асоси”.
- 100 Сэр Брунетто ҳам шунга яраша
Тинмай берар эди гапимга жавоб.
Дедим: “Ким бор машҳур, сизга ҳамгўша”.
- 103 У деди: “Йўқ эмас ҳа, аҳли арбоб,
Лекин қолганларни гапирмаган соз,
Чунки ундақалар беҳад, беҳисоб.
- 106 Бунда аҳли черков, диндорлар мумтоз,
Юрт бўйлаб донг солган олимлар бордир,
Тавқи лаънатлари ўхшаш ва дамсоз.
- 109 Анов Присцианнинг ёнида ҳозир
Турибди Франциск Аккурсий, ана,—
Тангри бандаларин хос қули — нозир.
- 112 Арподан Баккильонега қилган бадарға
Ва унда ҳаётин айлаган барбод —
Зот ҳақида ва ё сўзлай сидирға?!
- 115 Бошқаларни, майли, эсламам зиёд,
Тугаб қолаётир бизларнинг муддат:
Жўшаётир ортиқ тўзон, гирдибод.

- 118 Унга дуч келмасдан қайтай бегурбат,
Фазнаи илмимни аспа — шу армон,
Илмимда барҳаёт қолганман фақат”.
- 121 Физиллаб жўнади бурилиб чаққон,
Гўё Веронада қайси бир маҳал —
Яшил мато учун чопиб саргардон,
- 124 Довда голиб чиққан зот каби жадал.



ЎН ОЛТИНЧИ ҚҰШИҚ

Шоирлар еттинчи доиранинг учинчи қаватига тушаёт-тиб, Дўзах дарёси Флегетоннинг шовқинини эшиладилар. Бу ерда Данте содомитларга мансуб яна уч ватандошини учратади. Улар шоирга Флоренциянинг сиёсий инқирози, фүқаронинг маънавий тубанланиши ҳақида гапирадилар. Сўнгра Вергилийнинг ишораси билан жарлик тубидан ниҳоятда ғалати маҳлук — Герион пайдо бўлади.

Тубан оқаётган сувнинг ғувурли
Шовқини ёвуқдан келди қулоққа,
Ари уясидай фунгур-фунгурли.

- 4 Оломон ичидан дарров биз ёқقا
Уч соя қайрилиб келди дафъатан,—
Қайноқ сел барчасин соглан қийноққа.
- 7 Қийқириб келарди учта куюк тан:
“Тўхта! Либосингдан турибмиз таниб,
Иллатлар шаҳридир сен келган ватан”.
- 10 Улар қоврилганди оловда ёниб,
Шўрликлар танида сонсиз жароҳат,
Ҳатто ёдга олсан кетгум сесканиб.
- 13 Уларнинг даъватин тинглаган соат
Устоз хитоб қилди: “Бардош қил бирров.
Сақлаш керак эрур одоб, назокат.
- 16 Агар ёғмасайди қўқдан чўғ-олов,
Бўлмасайди агар алнга-оташ —
Улармас, сен пешвоз чиқардинг дарров”.

- 19 Тўхтадик, бир муддат сўзсиз ва ёввош;
Тинган надоматин давом эттириб
Бизни ўраб олди учовлон бебош.
- 22 Худди майдон ичра рўпара туриб
Тиклашган ялангоч полвонлар чаққон —
Пайт пойлаган каби қўл силкиб юриб,
- 25 Улар теграмизда изғирди гирён,
Оёғин олдинга босарди, бироқ
Қаарди бўйнини буриб мен томон.
- 28 Бирори сўз қотди: “Замин-ку юмшоқ,
Лекин беланганимиз бутунлай қонга,
Жиркансанг керак-ку, бизлар бадҳолроқ;
- 31 Бовар қил бизларнинг шуҳрат ва шонга,
Лутф этиб жавоб бер, кимсан, эй одам,
Қандай келиб қолдинг тирик бу ёнга!
- 34 Олдда кетаётган қадам-бақадам
Мана бу ҳамроҳим, ялангоч, кир-чир,
У нечук зот эди? Ўйламассан ҳам.
- 37 У Гвальдраданинг набирасиидир;
Гвидо Гверро — донгдор саркарда,
Қўлида ўйнаган найзаю шамшир.
- 40 Манов чанг тўзғитиб юрган серзарда
Тегъяйо Альдобранди — хизмати буюк,
Номин хурмат билан эслаш даркор-да!
- 43 Мен Рустикуччиман, дилда фам туюк,
Томуғ оташига бўлдим гирифтор,
Хотин балосидан тилгинам куюк”.
- 46 О, гар бўлолсайдим дафъи балокор,
Қалқон қиласар эдим ўзимни шартта.
Устоз ҳам бўларди шаксиз мададкор.
- 49 Лекин ҳайиқардим ўтдан, албатта,
Кўксимга уларни босолмасдим, оҳ,
Боқа олмас эдим меҳр-шафқатда.

- 52 Дедим: “Кўнглингизга келмасин ногоҳ,
Холингизга боқиб, дил тўла ҳасрат;
Жирканиш қаёқда, мен-ку хайриҳоҳ.
- 55 Устозим сизларни кўргани фурсат,
Шариф-шажарангиз айтганди бир-бир,
Айтганди не бўлса — сизга хос хислат.
- 58 Ватандош эрурмиз ҳаммамиз ахир;
Шонли хизматингиз қадрлаб мудом,
Ёшлиқдан севганман сизни беназир.
- 61 Устоз ваъда қилган роҳатга тамом
Етиб бормоқлигим керакдир чидаб:
Лекин бир довон бор — нуқтаи низом”.
- 64 У деди: “Кўп йиллар ёр бўлиб матлаб,
Даврон суражаксан хушнуд, омон, соғ,
Шұхратинг ҳамиша тургай чарақлаб.
- 67 Лекин айт, бизларнинг шаҳарда бу чоғ
Қолганми диёнат, инсоғ, риоя
Ва ё бўлишганми улар тумтароқ?
- 70 Гульельмо Борсиере — хор бениҳоя,
Саҳрода юрибди қатл этилган зот,
Келтирмиш бу ерга ғамгин ҳикоя”.
- 73 Флоренция, йўлинг йўқотиб, ҳайҳот,
Муккадан кетибсан кибру ҳавога,
Сени келгиндилар айламиш барбод!—
- 76 Шундоқ хитоб қилдим, боқиб самога
Бамисли ҳақлигин англаған воиз —
Улар берилдилар рамзу имога.
- 79 Дедилар: “Бахтлисан дунёда шаксиз,
Неки мушқул бўлса, барига магар
Жавоб бераркансан лойиқ ва жоиз.
- 82 Бу зулмат маъводан қайтиб, сен беҳтар
Чароғон дунёга солғанда нигоҳ,
Бизларни эслагил ва ўша сафар —

- 85 Дегил: “Уларни мен қўрдим баногоҳ”.
Кетдилар учовлон йўл бўйлаб нари,
Қанотга ўшарди оёқлари, воҳ.
- 88 Кўз очиб-юмгунча йўқолди бари,
Кўздан гойиб бўлди жадаллаб тезкор.
Отланди устоз ҳам энди йўл сари.
- 91 Эргашдим изидан, лекин ғалвадор
Шаршара шовқини келди қулоққа,—
Дастидан гапни ҳам эшиитмоқ душвор.
- 94 Монте-Везодан то кунчиқар ёққа
Апеннинлар бўйлаб оқади дарё,
Дастлаб унинг номи бутунлай бошқа:
- 97 Аквакета дея аталар, аммо
Етганда қўйига — Форли ерига
Ўзгартиб олади номин, ажабо.
- 100 Етгач Сан-Бенедетто — у тоф наҳрига,
Пастга қўйилади роса гувиллаб,
Минглаб дарё сифар у наҳр бағрига.
- 103 Шундоқ, бу дарё ҳам пастга шовуллаб
Кирмиз тўлқин отиб оқарди ўқтам,
Қулоқни тешгудай даҳшатли увлаб.
- 106 Белимда бор эди арқоним — пўтам,
Мўйнаси ялтироқ, ажиб жонивор
Қоплонни тутмоқчи бўлгандим мен ҳам.
- 109 Пўтамни ечдиму фоят таъзимкор
Устозга узатдим, бир сирасиға
Эшгандим пўтамни пишиқроқ такрор.
- 112 Устоз келиб жарнинг қунгирасига
Пўтанинг бир учин итқитди тубан,
Илашмасин деб то жар қиррасига.
- 115 “Устозки иш тутар эҳтиёт билан,
Ўпқоннинг қаърида бўлмасин бало”,—
Ўз-ўзимга шундоқ дедим хаёлан.

- 118 Нечоғли вазминлик, тоқат керак, о,
Ёнингдаги одам, наинки зоҳир,
Ботин ўйларингни англаса ҳатто.
- 121 Устозим дедики: “Қараб тур ҳозир,
Икков кутган кимса кўргазар жамол,
Кўз олдингда сеҳр бўлгуси содир”.
- 124 Ўтрикка ўхшаган рост гапни, алҳол,
Тишнинг ковагида лозим асрамоқ,
Йўқса ортирасан ортиқча малол.
- 127 Лекин вужудимни босади титроқ,
Баён этгум сенга, азизим шеърхон,
Комедиям ҳақи қасам ичароқ.
- 130 Боқдим: жар тубида сузиб биз томон
Келарди қандайдир махлуқ қийлиқол —
Ҳар қандай ботир ҳам қолгудек ҳайрон.
- 133 Кема парканд бўлиб топганда завол,
Фоввос этганида мадад ва ёрдам,
Шўнгиб-шўнгиб чиқар у ҳам шу мисол.
- 136 Сузарди, гавдаси чаққон ва шаҳдам.



ЎН ЕТТИНЧИ ҚЎШИҚ

Шоир Герионнинг қиёфасини тасвиirlайди. Вергилий Герион билан музокаралар олиб бораётган пайтда Данте олов ёмгири остида азоб чекаётган маҳкумлар билан қизиқади. Уларнинг ҳар бирининг бўйнига нишонли тўрвалар осилган. Сўнгра икки шоир Герионга мингашиб олиб, саккизинчи доира томон равона бўладилар.

“Мана шу маҳлуқдир касадум ҳайвон,
Унга бас келади на ҳад, на шамшир,
Ер юзин бузган у, булғаган ёмон”,—

- 4 Шундоқ сўз бошлади устози кабир,
Баҳайбат маҳлуқни чақирди имлаб,
Мармар соҳил узра қўйган деб бафир.
- 7 Думини йифмасдан, сузиб, ўрмалаб,
Соҳилнинг ёнига келди у маҳлуқ,
Ёлғон, алдамчилик тимсоли, бадтаъб.
- 10 Рухсори ёқимтой, боқиши улуг,
Бегубор, самимий ташларди назар,
Лекин қолган қисми илондир тўлиқ.
- 13 Панжалари эса сертирноқ, сербар;
Елка, қорни, биқин чипор ҳандалак —
Рангдор ҳошиялар танасин безар.
- 16 На турк ва на татар тикканда палақ,
Бундай чипор бўлмас ўриш арқофи;
Ҳатто Арахна ҳам мот қолар бешак.
- 19 Қайиқ бекатида тўхтаган чоғи,
Тенг ярми тўлқинга ботиб тургандай,
Ёхуд келган пайти олмон ютоқи,

- 22 Кундуз жанг қилишга бўлган каби шай,
Кўмзор ўлкадаги харсангга яйдоқ
Тўшин босиб олди маҳлуқ ҳам атай.
- 25 Тубсиз бўшлиқ ичра думи тумтароқ,
Заҳри заққуми-ла ётар эшилиб,
Чаённинг нишидай ўткир, ялтироқ.
- 28 “Энди юрмоқ даркор йўлдан бурилиб,
Ўша тош томонга ўтайлик ҳатлаб”,—
Шундоқ деди устоз марҳамат қилиб.
- 31 Ўнг томон бурилдик, канора бўйлаб
Ўн қадамча ўтдик бўшлиқ майдонда,
Оташу қўмзорин четлаб, ҳаволаб.
- 34 Ажиб оломонни кўрдим шу онда,
Жарнинг ёқасида тўдаи судхўр
Ўлтирас эдилар қайноқ тўзонда.
- 37 Устозим дедики: “Буларнинг бир қур
Пости-баландини англаб ола қол,
Томоша қила қол, барчасини кўр.
- 40 Лекин гапни чўзма, шуни англаб ол,
Мен анов маҳлуқни аврай-чи, зора
Бизни елкасига миндирса дажжол”.
- 43 Тағин йўлга тушдим, ошиб канора,
Еттинчи қабатда бир ўзим танҳо
Сокин гуруҳ сари бўлдим равона.
- 46 Барчасин кўзида фусса эди жо;
Қўлларин силташиб, ҳаммаси жадал
Башарасин артиб тураг доимо:
- 49 Тик келганда офтоб саратон маҳал,
Итлар худди шундоқ қашинар фингшиб,
Бургами ё пашша берганда халал.
- 52 Йозларини олов юборган тешиб;
Таниб ололмадим ҳеч кимни, қанча —
Теграсида сарсон айланмай жўшиб.

- 55 Ҳар бирин кўксида турфа ранг анча
Бор эди тамғали, нишонли ҳамён;
Туришар эдилар мамнун боққанча.
- 58 Ажиб эди бирин ҳамёни чунон:
Зарьфарон матода бир яшил сурат —
Кўринар — елкаси чўққайган арслон.
- 61 Бошқа бирига ҳам айладим диққат,
Унинг ҳам бор эди бўйнида халта —
Кирмизи матода гоз расми дастхат.
- 64 Бўз ранг ҳамёнида кўм-кўк ва катта
Чўчқанинг суратин соглан ўзга кас:
“Не қилиб юрибсан”, — деб қолди шартта.
- 67 Ва деди: “Бу ерлар сенинг жойингмас,
Йўлингдан қолмагил, лекин огоҳ бўл,
Юртдош Витальяно келар муқаввас.
- 70 Мен флоренцияликларга бегона буткул,
Аслим падуялик: булар-чи, ҳай-ҳай,
Мияни қоқишиб, дейдилар нуқул:
- 73 “Жўрабоши қани, у қачон келгай”.
Тилин чиқарди сўнг оғзи тиришиб —
Лабин ялагандай ҳўқиз пайдар-пай.
- 76 Устознинг ўтити эсимга тушиб,
Қолмай деб бу ерда тагин ҳаяллаб,
Маҳкум оломонни тарк этдим шошиб.
- 79 Устозим эса-чи, бу орада заб
Анови маҳлуқقا урибон эгар,
Деди: “Ўзингни тут, бўлгил сергактаъб.
- 82 Кўрдингми, тубангга қайси йўл элтар;
Сен ўтири олдинда, орқада ўзим,
Токи етказмасин дум сенга зарар”.
- 85 Устознинг сўзларин эшитганим зум
Иситма олдидан титраб вужуд-тан,
Тирноғи кўкарған, дилтанг, серзуғум

- 88 Кимсадай тумшайиб қолдим норасан;
Лекин жасур хўжа қошида ношуд
Хизматкор мисоли ўнгландим бирдан.
- 91 Махлуқ ўркачига миндим ва не суд,
“Мени ушланг”,— дея жуфтладим оғиз,
Товушим чиқмади; лол қолдим, бехуд.
- 94 Мудом қалқон бўлган устозим ёлғиз,
Бу бора ҳам ҳолим фаҳм этиб ниҳон,
Маҳкам қучиб олди елкамдан сўзсиз.
- 97 Ва деди: “Хўш, қани, кетдик, Герион,
Кифтингда юқ бордир, истайсанми-йўқ,
Сузгил эҳтиётроқ, омон, алъамон”.
- 100 Қуйруқ томонидан жилгандай қайик,
У ҳам илгарига сузиб қолди-ку,
Олдда кенглик эди, улкан ва ёйик.
- 103 Ўша ёнга қараб йўлни солди у;
Илонбалиқ каби ростлаб гавдасин,
Суза кетди махлуқ айлаб жаҳд, ружу.
- 106 Аравасин мажақ этганда чақин,
Тизгинни ташлаган Фаэтон ҳатто
Бунчалиқ, бунчалик қўрқмагани чин.
- 109 Оташин бағрига тортганда само,
Куйганда Икарнинг қанот — бол пари,
Отаси: “Ўғлим”,— деб қилганда нидо,
- 112 Қўрқмаган, эҳтимол, менинг сингари,
Кўрганим поёнсиз, тубсиз зулумот
Ва махлуқ ўркачи — елар илгари.
- 115 Наздимда у теран шўнғирди бот-бот,
Чунки паст-баланддан беадад шамол
Чаппа-растা эсиб, айларди барбод.
- 118 Шаршара шовқинин эшитдим, не ҳол,
Бизнинг ўнг томонда гувлар эди у,
Пастга назар солдим энгашиб дарҳол.

- 121 Лекин қалбим босди баттарроқ қўрқув,
Унда ёнар эди мудҳиш аланга,
Кулоққа келарди даҳшатли қий-чув.
- 124 Илк бор аён бўлди шу нарса менга,
Чарх уриб тушардик тубангга рўй-рост,
Атроф тўла эди шовқин-суронга.
- 127 Ўлжасидан маҳрум қарчиғай нохос,
Йўқотиб файрату ўқтам шиддатин,
Хўжасидан кутиб гинадор овоз —
- 130 Учган жойи узра силкиб қанотин,
Юз бора айланиб юрар даставвал,
Сўнг қўнар бир четга, тажанг ва сокин.
- 133 Шундоқ Герион ҳам келди-ю жадал
Ўпқон сарҳадига қўнди-ю, тинди;
Махлуқ елкасидан тушдик, шу маҳал —
- 136 Ўқ каби учди у, кўздан бекинди.



ЎН САККИЗИНЧИ ҚҰШИҚ

Олдинги құшиқтарда ҳайвоний ҳирс, иродасизлиги туфайли тенгсиз гуноҳ орттириб дұзахий бүлгап бандалар тас-вирланади. Қолган құшиқтарда маккор, фирибгар, товлама-чи, ёлғончи, сотқин, хоинлар ҳоли қаламга олинади.

Дұзахда бир жой бор, оти Ёвуз Fop,—
Чүяндай тош эрүр бошдан-оёғи,
Тик кетган жар каби залварли девор.

- 4 Унинг тубида-чи, кенг ва қоронғи
Оғзин очиб ётар мудҳиш бир қудук,—
Үшал ҳақда бўлгай гапнинг бу ёғи.
- 7 Қоя ва жарликнинг ораси узуқ,
Ўртада биз ўтган ўша погона —
Айлана шаклида — ўн жойдан ботик.
- 10 Қалъалар шу тахлит бўлар фасона,
Асрар деб ногаҳон бошланса қамал —
Хандоқ, ўра бўлар атроф айлана.
- 13 Бу жой ҳам шунақа эди, филмасал;
Дарвозадан тортиб қирғоққа қадар
Тўшалгани каби кўприклар гал-гал.
- 16 Тубсиз жарлик узра узун, серхатар
Чўзилиб кетганди тоғ қирралари,
Ул қудук қошида бу тизма тўхтар.
- 19 Шу тобда битганди девнинг сафари;
У бизни қолдириб бўлганди ғойиб;
Устоз йўл бошлади чап муҳит сари.

- 22 Ўнг ёнимда эса буткул гаройиб,
Ўзга хил азоблар кўринди аён.
Маҳқумлар тентирада ҳориб.
- 25 Юрарди икки саф сарсон-саргардон;
Биз томон келарди яқиндаги саф,
Униси кетарди шахдам, ёнма-ён.
- 28 Римликлар ҳайитда шуларга ўхшаб,
Йўлак ўрнатарди кўприкларда, то,—
Тиқилиб қолмасин оломон тўхтаб.
- 31 Қалъя деворига қилишиб парво,
Биридан черковга ўтар эди халқ,
Биридан қайтарди тоғ сари, аммо —
- 34 Тошлоқ чуқурликнинг энг тубида, нақ,—
Битта шоҳдор иблис, қўлида дарра —
Ўтганни аямай калтаклар шақ-шақ.
- 37 Унинг савашида шафқат йўқ зарра,
Кетма-кет зарбалар етар беаёв
Кўз очиб-юмгунча неча бир карра.
- 40 Ногаҳон кўзимга кўринди бирор,
Уни учратгандим аввал қайдадир,
Хитоб қила қолдим мен унга дарров.
- 43 Ким эди? Ўйланиб кетдим бесабр,
Серҳиммат йўлбошчим этмади тақиқ,
Мулоқот учун мен излардим тадбир.
- 46 У маҳқум зот эса, юзини аниқ
Энгашиб яширмоқ бўларди бекор,
Дедим: “Эй, рухсорин беркитган рафиқ,
- 49 Танийман-ку сени, беркинма зинҳор:
Венедико Каччанемико! Нечун —
Насибангга тушмиш бу роҳи ғаддор?”
- 52 Деди: “Бермасайдинг савол инчунин,
Жавоб қилмас эдим, билгил, сира ҳам;
Сен боис хотирга келди у очун.

- 55 Синглим Гизолабеллани маркизга маҳрам,—
Ўйнаш бўлмоқлийка унатдим, гарчанд
Билсам-да гуноҳдир бу иш чинакам.
- 58 Болонъядан ёлғиз эмасман дардманд;
Тўлиб-тошиб ётар истаганингча,
Савено ва Рено аро ҳам ҳарчанд.
- 61 Sipa дегувчилар топилмас бунча,
Турган гап, тамадан инсон деган зот
Қутулмас, кўзига тупроқ тўлгунча”.
- 64 Зарб уриб қолди-ку иблис шу заҳот,
Даррасини силкиб сўқинди дағал:
“Жойимас, юр дейман, қўшмачи фасод”.
- 67 Йўлбошчим ёнига қайтдим мен жадал;
Шамшир тифимисол тизма қояга
Етиб келдик икков фурсат ўтиб сал.
- 70 Осонгина чиқдик пиллапояга;
Ўнг томон йўл солиб, кетавердик жим,
“Хайр”, — деб бехосият — чала сояга.
- 73 Тош поя сўнгида тўхтадик бир зум;
Пастдан ўтар эди маҳкум тўдаси.
“Қани, кўрайлик-чи,—деди устозим,—
- 76 Нотанишдир, балки сенга анчаси,
Ёнма-ён юргандик боя саф-қатор,
Кўрмадинг кўпининг юзин, чамаси”.
- 79 Кўҳна-қадим кўприк остидан қатор,
Иккинчи гуруҳ ҳам борарди ўтиб,
Биз билан юзма-юз келганди дубор.
- 82 Устоз саволимни турмасдан кутиб,
Деди: “Хов, новчага ташлагил назар,
Кетмоқда беписанд, ўзини тутиб.
- 85 Кечмиш салобати унда нақадар,
Ҳукмдор Ясон у, донишманд, ёвкур,
Тилла ранг терига талабгор аскар.

- 88 Сузиб борган эди Лемносга базур,
У ерда аёллар эрларин топтаб,
Қолди диёнатсиз, беҳис, бегуур.
- 91 Бу ёвқур Ясон-чи, гап билан боплаб,
Ёш Гипсипиллани туширди қўлга,
У ҳам отасини қутқазган алдаб.
- 94 Қизни ташлаб кетди оқибат йўлда;
Ўша гуноҳи деб тортади кулфат,
Тағин Медеянинг хуни ҳам шул-да.
- 97 Қолган бандилар ҳам доголисифат;
Анови маҳқумлар ҳақида, ҳатто,
Арзимас, менимча, мулоқот, сухбат.
- 100 Сўқмоқ йўл узайиб, рўпарада то
Кейинги роҳ билан кесишгунча, биз
Қадам босар эдик тўхтамай борҳо.
- 103 Яқин орада-чи, маҳқумлар тифиз,
Хуриллаб юришар, чўзишиб тумшук.
Ҳар бири ўз-ўзин шаппатлаб тинсиз.
- 106 Елимга қопланган қиялик тўлуқ,
Пастдан анқир эди бир ҳид — бедаво,
Димоқни ёргудай, жаҳаннам — томуғ.
- 109 Тубанга боқмоқчи бўлсангиз аммо,
Сиротнинг устига чиқмоқлик даркор,
Кўринар бор нарса аён, ошкоро.
- 112 Ўтдик ўша ёнга икковлон зудкор,
Бир гала оломон турарди, ҳайҳот,
Нажасга беланганд, ифлос, нобакор,
- 115 Улар орасида бор эди бир зот,
Шу қадар булғанган, ирганч эди ул,—
Бирон қавмдан деб қўйиб бўлмас от.
- 118 У менга қичқирди: “Бўлдимми мақбул,
Бунча боқиб қолдинг менга айрича?”
Дедим: “Аҳволингдан эмасман ғофил,

- 121 Билгимча, олифта зот эдинг анча;
Алессио Интерминелли нажас аралаш
Қараётир бизга, бошин бурганча”.
- 124 У деди: “Гуноҳим фақат ёлғонлаш,
Ўтрик гаплар айтдим бир умр тинмай,
Шу сабаб тушганман азобга яккаш”.
- 127 Хитоб қилди менга устозим атай:
“Қарагин, шоирим, елкангни буриб,
Сенга энг ғалати зотни кўрсатай”.
- 130 Гоҳо ўтирад у, гоҳида туриб,—
Ифлос тирноғи-ла қашланар мудом
Дунёда энг қабиҳ, разил, серфириб,
- 133 Бу аёл — фоҳиша Фаида, бадном.
Ўйнаши деганда: “Қондирдимми, хўш?!”
У деган: “Мўъжиза эрурсан тамом!”
- 136 “Жонга тегди, етар, бу ҳолат нохуш”.



ЎН ТҮҚҚИЗИНЧИ ҚЎШИҚ

Дўзахнинг бу доирасида порахўр ва ярамас черков аҳли жазо тортади. Уларнинг оёғи осмондан, ҳаммасини даҳшатли аланга чулғаб олган. Бу ерда Данте пана Николай III ни учратади. Шоир черков суллоҳлари ҳақида шафқатсиз сўзлар айтади.

Бадбахт ялоқхўрлар, о, Симон қаллоб,
Олтин, қумуш учун пок ва бокира
Илоҳа иффатин юрганлар булғаб.

- 4 Очофат, ҳирс-нафсга бўлганлар жўра,
Учинчи туйнуқда бандисиз, маҳқум,
Энди сўз сизларнинг аҳволга кўра!
- 7 Янги ҳад — ўзга бир жар ошиб шу зум
Букри сирот узра устоз икковлон
Тубанга термилиб туардик лол, жим.
- 10 О, Олий Тафаккур, одилсан шоён,
Қаерда бўлма, сен — ҳар нега қодир,
Мудом ҳақ йўлини қилурсан аён.
- 13 Кўрдим бу жойда ҳам кўз ташлаб ҳозир:
Бўз тошлар юзида қатор ва қатор
Гардишли ўпқонлар этмишсан зоҳир.
- 16 Сан-Жованнида ҳам шундоқ мазгил бор:
Чўқинтирилгувчи бола-бақрани —
Шакли-шамойили ўхшаркан бисёр.
- 19 Бир вақт қутқазай деб маъсум болани;
Ҳовузлардан бирин бузган эдим, рост;
Боқинг: гуноҳмикан у ишим, қани!

- 22 Ҳар бир чуқурчада бандаи нокас
Оёғи осмондан ётар шалвираб,
Вужудлари бўлса тошга банд-пайваст.
- 25 Тепасида эса ўт ёнар гувлаб;
Жон ҳолатда ҳар ким гувранар, ҳатто
Ўзга ҳолда узар қўйсанг занжирлаб.
- 28 Бу ерда ёнарди қорамой гўё —
Фақат юзасида бордир аланга,
Ловиллар товоидан тирноққача то.
- 31 “Айтинг,— дедим боқиб устоз томонга,—
Ким бу зот, тўлғангандан барчадан баттар,
Нечун оташ зўрроқ чулғаниш анга?”
- 34 У деди: “Англадим, истасанг магар,
Сени қўйироққа бошлайин, кўргил,
Унинг ўзи сенга жавобин айтар”.
- 37 Дедим: “Сен не десанг, менга ҳам маъқул,
Фикримни ҳамиша англарсан аён,
Соҳибсан, вожибдир йўриғинг буткул”.
- 40 Тўртингчи ҳад сари чиқдим ўшал он,
Сўл томонга юрдик, у ерда лов-лов
Аланга сочарди саноқсиз ўпқон.
- 43 Огоҳ этолмади устозим шу ров,
Бир маҳкум бандага келдиму ёвуқ,
Саволимни дадил йўлладим дарров:
- 46 “Сенки, эй маскани қоронғу томук,
Зеру забар экан ҳолинг мутлақо,
Иложинг бўлса гар, жавоб бер тўлуқ”.
- 49 Қатлга маҳкум зот олдида гўё,
Имон келтиromoқчи руҳониймисол,
Турар эдим ундан тинглаб илтижо.
- 52 “Бонификаций,— деди бечора дарҳол,—
Сенмисан? Келдингми муддатдан бурун,
Рўйхат лақиллатмиш бизларни, алҳол.

- 55 Жонга тегдими ё мансаб, мулк, жунун,
Сен эмасми, ахир, мансаб бор жойда
Фирибга алмашган черковни бутун?”
- 58 Мен-чи, ҳайрон эдим ушбу ҳой-ҳойда;
Лол қотиб қолгандим ҳайрат ичра тек.
Нима гап ўзи бу? Англамоқ, қайда!
- 61 Вергилий дедики: “Хитоб айла тик,
Сен кутган у банда менмас де зинҳор”.
Мен ҳам жавоб қилдим устоз айтгандек.
- 64 Жунбушга кирди-ку дарҳол гуноҳкор,
Хитоб қилди инграб, изтироб аро:
“Йўқса, нега мени чорладинг бекор?
- 67 Кимлигим билай деб, айлаб муддао,
Нишаб қиялиқдан тушган бўлсанг, бас,
Билгил: олий эди мен кийган ридо,
- 70 Уругум аювдир: улуғ, муқаддас;
Қурдошларим дея бўлдим очофат,
Ҳамён — оқибатда ўзимга қафас.
- 73 Пастда салафларим ётибди қат-қат;
Форлар тирқишига тиқилган бари,
Черков суллоҳлари — маҳкум, дуобад.
- 76 Мен айтган ўша зот келса биз сари,
Ўрнимни бўшатиб берардим шартта,
Ўзим тушар эдим тубанга нари.
- 79 Муддат чўзилмоқда; азоб ҳам катта;
Гарчанд у бу жойда бўлмагай узоқ,
Лекин яқин қолди муддат, албатта.
- 82 Сохта роҳиб келар анча кейинроқ.
Ўшанда барчамиз тубанга кетиб,
Тепамизда бўлгай ўша зот қопқоқ.
- 85 Ясонга подшоҳ марҳамат этиб
Эркалатганимисол, унга ҳам чексиз
Ҳиммат этар фаранг тожи қўл тутиб”.

- 88 Сўзларим бўлса ҳам тарқоқ ва эпсиз,
Унга хитоб қилдим шу он амаллаб:
“Сўйла-чи, раббано, Пётрдан тенгсиз —
- 91 Қандоқ хазинани этганди талаб?
Кўлига берганди ҳуқуқ — барқарор.
Ва деган: “Бўл менга содик, муқарраб”.
- 94 Матвей ҳақ бермаган Пётрга зинҳор.
Салтанат қўлидан кетгани заҳот.
Маҳрум бўлган эди буд-шуддан якбор.
- 97 Сен-ку айб қилгандинг; жазо тортиб ёт;
Карлга чоғлантирган ўшал фазнани
Авайла, кетмасин у ҳаром бисот.
- 100 Агар сен етишган ҳақ — мартабани
Қадр этмасайдим азалдан-азал,
Ҳурмат қилмасайдим ҳозир ҳам ани —
- 103 Роса боплар эдим ҳаммангни тугал;
Мўмин насоронни тупроққа топтаб,
Аҳли суллоҳга сиз қўйдингиз ҳайкал.
- 106 Черков пешволарин, Иоанн фол қараб
Кимлигини аён айтиб кетганди,—
Сиз гар шоҳлар ила қилган айш-тараб.
- 109 Етти бош маҳлуқ ва бир гар ўтганди,
Иоанн фол очганда, айлаб сизни фош,
Ўхашаш тақдирингиз идрок этганди.
- 112 Олтин ва кумушдир сизларнинг меърож;
Бутпараст юкинса битта санамга,
Сиз бир деб, минг бирга уражаксиз бош.
- 115 Саюю кароматинг шулми оламга,
Сўйла, Константин, бу қандай савдо?
Рағбат билдиринг-а кашиш аҳкомга?”
- 118 Ўзимча айлардим шунаقا даъво!
У бўлса, ё ғазаб, ё виждан сабаб,
Талваса ичиди қолди мутлақо.

- 121 Устоз кузатарди мамнун, мойилтаъб,
Унинг наздида ҳам гапларим ростгўй,
Рози бўлган эди, сўзларим тинглаб.
- 124 Қулочини ёзиб келди бўйма-бўй
Ва қучди ёрлақаб, босди кўксига.
Сўнгра келган йўлдан қайтдик жўйма-жўй.
- 127 Боқмайин ҳамроҳин чарчоқ тусиға
Мени етаклади юксаклик томон;
Бошлади тўртинчи ҳаднинг устига.
- 130 Қоя тепасига чиқазди омон.
Тоғларда ёввойи такалар ҳатто
Бундоқ мушқул йўлда юрмоғи гумон;
- 133 Олдда янги дара бўлганди пайдо.



ЙИГИРМАНЧИ ҚҰШИҚ

Бу жойда авлиёлик дағво қылган алдамчи фолбинлар сан-қиб юрадилар. Уларнинг боши тескари қилиб құйылған, шу сабабдан таваккал қадам ташлашга мажбурдирлар. Вергилій донгдор фолбинлар ҳақида, хусусан, фивалик Манто ҳақида сүз юритади. Мантуя шаҳрининг тарихи унинг номи билан боелиқ эканини ҳикоя қиласы.

Йигирманчи қүшиқ мана, бошланди,
Гирдибодга маҳқум зотлардан айтай.
Азоблар ҳақида шеърим илк банди.

- 4 Тураг әдим боқиб жар томон беткай,
Оху воҳга тўла саноқсиз хандоқ
Кўринарди равшан, туташ, паёпай.
- 7 Гунг-соқов оломон бечорасиёқ,
Хандоқ атрофида кезарди ёввош,
У — хос ибодатга ўхшарди кўпроқ.
- 10 Боқдим ва ажиб ҳол бўлди шунда фош,
Буткул ўзгачайди улар атвори,
Жуда ғалат эди кўқрак билан бош.
- 13 Барчасининг эди юзи тескари;
Ортга тисарилиб босарди қадам,
Зеру забар эди нигоҳ назари.
- 16 Қоқшолга учраган бечора одам
Вужудин тебратар ўшандоқ ўқтин,
Булар асрори не? Мен учун мубҳам.
- 19 Ўқувчим, илоҳо, холиқи ботин
Ҳикоям-ла берсин сизга ўгит-панд:
Ановларнинг ҳоли кўп оғир локин.

- 22 Қарайман, ўқинчим бўғзимда тирбанд;
Уларнинг кўз ёши, айланг тасаввур,
Оқар сағрисидан ариқча монанд.
- 25 Қояга қапишиб йиғлардим шўр-шўр,
Хитоб эта қолди муҳтарам устод:
“Вовайло айлама, фаҳм этгин бир кур.
- 28 Булар эзгуликни билмаган бедод
Бир қавmdir, тангридан қилишар фифон.
Шу сабаб ортади айблари зиёд.
- 31 Боқғил, маҳкумлардан бирин беомон
Қора ер ютмоқда, Амфиарай бул,
Фиваликлар эса демоқда: “Қаён,
- 34 Жанг майдонин ташлаб, қайга солдинг йўл?”
Қочмоқчи бўлганди бетўхтов, теран,
То Минос қаҳронк чўзмагунча қўл.
- 37 Чарх ҳукми — кураги кўкракка дўнган!
Унга аён эди қисмат доимо,
Энди-чи, кўргани пой ости — тубан.
- 40 Манови Тиресий, кажрухсор бало,
Чирмашган илонга солган-чун рахна
Аёлга айланган бир кун беибо.
- 43 Сехрли ҳассасин қайтадан яна
Илонга теккизгач жодудан фориф —
Ўз шаклига қайтган ўша замона.
- 46 Арунсдир манов зот, юрган шу тарийқ,
Луни деган жойда қурганди даргоҳ,
Ки ул жой қоятош, мармарга тўлиқ.
- 49 Мармар форда туриб у соҳибнигоҳ
Термулган самога — йироқ-йироқقا,
Денгизлар уфқига кўз югуртган гоҳ.
- 52 Боққил, қани энди, ҳув анов ёққа;
Сочи елкасида бамисоли ёл,
Мантодир — Арунснинг қизи, кезмоқда.

- 55 Элма-эл, саргардон, дайдиб ночор ҳол,
Сўнг менинг юртимга қўнганди муқим,
Ўша ҳақда, майли, сўйлайин мақол.
- 58 Ота-ю онадан қолгач у етим
Вакҳлар шаҳрида қулдай юрди хор,
Кўп йиллар изғиди бамисли самум.
- 61 Гўзал Италия ёқда, пурвиқор —
Манъя яқинида Тиралли томон
Бенако аталган тиниқ бир кўл бор.
- 64 Чулдираб неча юз булоқлар хандон
Апенинни ювигб оқар у сари,
Мовий кўл бағрида топмоқ-чун макон.
- 67 Верона, Брешья руҳонийлари
Мумкиндири у ерда қурмоги манзил,
Бажо бўлсин деб то ибодатлари.
- 70 Қўргон бор у ерда муҳташам, асил,
Оти Пескъерадир — қўшниларга ҳад,
Кўрфаз теграсида пасқам бир соҳил.
- 73 Бенако қўйнига сув сифмай беҳад
Дарё бўлиб яна этади давом
Кўм-кўк ўтлоқлардан оқар беадад.
- 76 Дарё кўл бағридан чиқдими — тамом,—
Минчо деб аталар ва тугар охир
Қўшилгач дарёи Пога, вассалом.
- 79 Пасқамга дуч келгач йўлида наҳр,
Ҳар ёнга ёйилиб оқар бемалол.
Ёзда қотиб қолар атроф тап-тақир.
- 82 Бу ердан ўтаркан бокира жамол,
Ташландик, кимсасиз ботқоқлик аро
Тақир ялангликка боқмиш сермалол.
- 85 Канизлари ила узоқ ва танҳо,
Кимсасиз оролда фолбин қиз дарров
Руҳини вужуддан этмиш мосуво.

- 88 Атроф-теградаги одамлар ров-ров
Килмиш бу ерларга азми ихтиёр.
Бўлиқ адирларда тикмишлар ўтов.
- 91 Сўнгаклар устида эл топиб қарор —
Барпо айламишлар қалъа — шахристон,
Номин ҳам Мантуя қўймишлар пойдор.
- 94 Галварс Касалодини бир кун устомон,
Айёр Пиномонте алдагунча то,
Ул шаҳар бўлганди гавжум, ободон.
- 97 Юртим борасида одамлар аро
Эшитсанг гар бундан бўлак ривоят,
Билгил, ёлғон эрур унда бу даъво!”
- 100 Дедим: “Устоз, нақлинг ажибдир фоят,
Барига инонгум, ростдир бу қисса,
Мен учун ёлғондир ўзга ҳикоят.
- 103 Ва лекин, айт, устоз, гар шундоқ эса,
Манов ўтиб турган бандалар ичра
Борми назарингга лойиқ ҳеч кимса?”
- 106 Деди: “Мана бири — серсоқол тўра,
Ияқдан белгача осилган мўйи,
Унинг кимлигини сен мендан сўра.
- 109 Юоннларнинг боши осилиб қуи
Гўдакдан бошқа эр қолмаган маҳал
Каромат қилган у ўтирган қўйи.
- 112 Ўша Эврипиллтир! Эсларсан тугал,
Унга баҳш этганман энг юксак ашъор,
Унга фожиамда қўйганман ҳайкал.
- 115 Манов озгин фолбин доголи айёр,
Микеле Скотто — исми шарифи,
Фирибгарлар пири, тенги йўқ маккор.
- 118 Манов иккиси ҳам шайтонга шафе;
Бонатти, Азденте — эски этиқдўз
Бигизини қўмсар, йўқ энди нафи.

- 121 Афсунгар аёллар кезишар беюз,
Рўзгор ишларидан бўйинини товлаб,
Фолбинлик йўлига буткул тиккан кўз.
- 124 Фурсатдир, турмайлик энди пайт пойлаб,
Ой — Ҳобил — Сивилья ортига бу он
Оғди елкасига шох-шабба жойлаб.
- 127 Ўтган тун балқирди тўлин, чароғон,
Эслайсанми, тунда ўрмонда эдик,
Сокин шуълалари чақнарди ҳар ён”.
- 130 Йўл-йўлакай шундоқ сўзлашиб кетдик.

ЙИГИРМА БИРИНЧИ ҚҰШИҚ

Бу жойда пораҳұрлар, мансаб — амални пулловчи қаллоблар бўлиб, уларнинг тортадиган жазоси қайноқ мум ҳовузда ётишидир. Атрофда паншаха кўтарған иблислар маҳкумларни ҳовуздан нарига жилдиримай, қўриқлаб турадилар.

Ҳад-баҳад ўтардик сўзлашиб, аммо
Назмимга дахлсиз эди бу суҳбат.
Турфа азобларга боқардик борҳо.

- 4 Ёвуз Фор бағрини кўргали фақат
Интилиб борарадик ошиб кўпrik, сой,
Қора бир манзилга етдик ниҳоят.
- 7 Венецияда ҳам бор шунаقا жой,
Эски кемаларни қилмоқ-чун бутун
Қиши бўйи ёқишар тинмай қорамой.
- 10 Юмуш бор у ерда ҳар кимса учун;
Кимдир эшкакларни ростласа, кимдир
Дарз кетган жойларга тиқади тиқин.
- 13 Ҳар ким ўз ишига излайди тадбир,
Лангар созлаш билан бирор овора,
Бирор анжом ясар янгидан, моҳир.
- 16 Мен кўрган мум ҳовуз — улкан шарора,
Ўт йўғу каромат туфайли қайноқ,
Сачарарди ҳар ёнга чалқиб тобора.
- 19 Ҳеч не англамадим боқиб турароқ,
Ичида не савдо — эдим бехабар,
Пуфакчалар ғалат қайнарди ҳар чоқ.

- 22 Энгашиб, тубанга ташладим назар,
Устоз дастин чўзиб деди: “Тез қара”.
Эҳтиёт айларди мени у сарвар.
- 25 Бирони қувса гар бало, тасқара,
Қўрқиб, орқасига қараб қочгандай,
Юрагин ҳовучлаб, ҳоли масхара,
- 28 Кўзларин олайтиб катта очгандай —
Боқдим, шундоқ рўй-рост қоп-қора иблис
Югуриб келарди биз томон тинмай.
- 31 О, унинг рафтори нечоқ бад, беҳис,
Оёқларин серпаб соларди кутку,
Қанотларин ёзид чопарди физ-физ.
- 34 Маҳкумнинг пойидан даст кўтариб у,
Чўнқир елкасига ортиб мисли юк,
Қояи сиротга чопиб қолди-ку.
- 37 Деди: “Хаскашчилар, киришинг тузук,
Зита хўжасини боплангиз дарҳол,
Шаҳарда мижозлар кўпdir ҳар нечук.
- 40 Тағин хабар олиб келай-чи жадал.
Шаҳарда Бонтуро фақат пок, тоза,
Пора олмас, лек дер: “Чўнтағимга сол”.
- 43 Шундоқ деб, маҳкумни, шайланиб роса,
Пастга улоқтириди. Сўнг кетди чопиб,
Ит бундоқ юурмас ўғрини топса.
- 46 Маҳкум беланганди мойга хўп ботиб,
Иблислар баравар солдиларчуввос:
“Муқаддас Лиқдан биз келганмиз тониб.
- 49 Серкъо сувимас бу, чўмилсанг паққос,
Чап бермоқчи бўлсанг бизнинг қармоққа,
Мум ҳовузга қайта шўнғигин, шоввоз”.
- 52 Иблислар тишларин қайрашиб шаққа,
Маҳкум биқинига солдилар оғиз.
Дердилар: “Уринма бош кўтармоққа,

- 55 Қанча фирибинг бор — пусиб қил шаксиз”.
Ошпазлар кузатгай, шогирд шу йўсин
Товада лахмни этсин деб жиз-биз.
- 58 Устоз деди: “Улар сезмасин учун
Қоя орқасига бекин бенишон,
Иложи бўлса гар — ёпиб ол бутун.
- 61 Мендан ташвиш тортма, етмагай зиён:
Таниш эрур менга бу жойлар анча,
Бундақа сўғишлар азалдан аён”.
- 64 Кўприкни тарк этди устоз кетганча,
Бўлмоғи зарур у сокин бир мардум
Олтинчи жарликдан токи ўтганча.
- 67 Бечора тиланчи топмайин тўзим
Ҳар қайда боумид қўл чўзган чоғи
Ташлангани каби итлар серзуғум —
- 70 Кўприкнинг тагида гала ютоқи
Иблис чангак силкаб бошлади favfo,
Лекин устоз деди: “Сабр этинг, доғи —
- 73 Мени бурдалашга шошманг мутлақо,
Сизнинг бирингизда жиндак гапим бор,
Сўнгра не лозимдир, этгайсиз бажо”.
- 76 Иблислар қичқирди кўчгандай бозор;
“Хой, Думдор, чиқ бу ён!” — шу он фўнгирилаб
Бири пайдо бўлди: “Намунча ур-ёр?”
- 79 Устоз деди: “Думдор, ўзинг кўр ўйлаб,
Қошингга келишга қилибман бовар,
Соф-омон юрибман жаҳаннам бўйлаб,
- 82 Демак, тангри ўзи менгадир парвар,
Шундоқ бўлдими, бас — йўлни тез бўшат,
Файб ўзи раҳнамо — айлармиз сафар”.
- 85 Иблис чангагини ташлаб шу фурсат
Қавмларига боқиб айлади хитоб:
“Бу билан айтишманг, сизга маслаҳат”.

- 88 Устоз чорлаб қолди: “Хой сен, сабри соб,
Тошлар орасидан энди чиқа қол,
Юр менинг ортимдан қўрқмайин, шитоб”.
- 91 Устоз ҳузурига шошилдим дарҳол,
Иблислар ҳам олға босишиди қадам,
Қўрқдим, қўлмаса деб бирор кори ҳол.
- 94 Капрон қалъасида мағлублар бир дам
Қуролин топширмай бўлганди таслим,
Қўрққан эдим роса ўша пайтда ҳам.
- 97 Дафъи бало учун тайёр туриб жим
Устозга қапишиб кетдим йўл оша,
Ёвуз иблисларда эди назарим.
- 100 Бир иблис бирига шипшиди шоша:
“Орқасидан бориб урсакми чангак?”
“Чинқирса, бўларди роса томоша!”
- 103 Лекин иблис, бир гап айтай, деб андак,
Хайрият, сўз қотди шерикларига,
Деди: “Қани, жим бўл, ҳой Хира Читтак”.
- 106 Сўнг бизга юзланди: “Йўл йўқ нарига,
Бузилиб ётибди олтинчи кўприк,
Энди душвор эрур роҳ илгарига.
- 109 Битта йўл бор, лекин сизга ҳар нечук,
Қоядан айланиб ўтарсиз охир,
Манави из бўйлаб кета беринг тик.
- 112 Олтмиш олти йилу ўн икки аср
Бурун яксон бўлган кўприк бўронда,
Исо жон берар чоғ иш бўлган содир.
- 115 Бизнинг ҳам юмуш бор ўша томонда,
Иситиб қайтармиз маҳкумларни сал,
Қўрқмай юраверинг сафда, омонда”.
- 118 Чорлади дўстларин Думдор шу маҳал:
“Хой, Чол, Эгриқанот, отланинг тезроқ,
Ишбоши Соқолдир сизларга бу гал;

- 121 Аждар, Хира Читтак бўлади ҳамроҳ,
Сўйлоқ Тўнғиз билан Қичима ҳам бор,
Хурмачақилиқ ва Малларанг Суллоҳ.
- 124 Қайноқ ҳовузларни текширинг зинҳор;
Мановлар боради тизмагача то,
Майли, омон етсин, берманглар озор”.
- 127 Дедим: “О, устозим, бу нечук бало,
Парвардигор ҳаққи, ҳамроҳ не зарур,
Йўлни биласан-ку, кетайлик танҳо.
- 130 Зуккосан, буларга назар солиб кўр,
Кўзлари бежо-ку, буларнинг, ҳайҳот,
Тишлари тақиллар, боқар бехузур”.
- 133 Устоз деди: “Чекма беҳуда фарёд,
Тишларин қайрашса ўзига сийлов,
Маҳкумларни қийнаш буларнинг мурод”.
- 136 Иблислар йўл солди сўл томон дарров,
Лекин бошлиғига ишора айлаб,
Тилларин кўрсатар эдилар ров-ров,
- 137 Бошлиқ-чи, жавобан... ел чиқарди зап.



ЙИГИРМА ИККИНЧИ ҚҰШИҚ

Шоирлар түғон бүйлаб ўнг томонга юрадилар. Бу ерда ҳам мум ҳовуз бўлиб, унда олижаноблик ва адолатни сунистеъмол қилган пораҳўрлар, фирибгарлар маҳкумдирлар. Улардан бири наварралик Чамполо. У иблисларга фириб беради, натижада иблислар ўзаро жанжаллашиб қолиб, мум ҳовузда жиши бўладилар.

Кўрганман суворий сафлар мақомин:
Турфа жанггоҳларда, сафарларда, ё
Ёвдан нажот излаб қочган айёмин.

- 4 Кўрдим, талончилар солганин ғавфо,
Кўрдим, қанча-қанча чавандозларни,
Кўрдим, курашда қай шаҳсувор пешво.
- 7 Эшитганман турфа даъват-созларни.
Итальян усули ё ўзга жиҳат,
Жангларга чорловчи кўп овозларни.
- 10 Замину баҳрда кўзғаган гайрат,
Барча созлардан ҳам гаройиби бор,
Барчасидан афзал сурнайдир фақат.
- 13 Ўнта иблис била кетардик қатор,
Ва лек черковда пир кўрса эҳтиром,
Майхонада майхўр топгай эътибор.
- 16 Кўз ташлаб ўтардим мумга бекалом;
Кимлар маҳкум экан қайноқ қозонда,
Қанақа жой эрур бу даҳшатли ком.
- 19 Делфинлар сакрашиб баҳру уммонда
Сайёҳни хатардан этгандай огоҳ,
Улар ҳам кўринар ҳар-ҳар замонда.

- 22 Сўнгиз уқубатга чидолмай гоҳ-гоҳ
Тўлғанар эдилар қайноқ мум аро,
Бекинар эдилар лекин баногоҳ.
- 25 Кўлмак қирғонидан эрталабдан то
Оқшомга қадарли бақрайиб мудом
Боққан қурбақалар сафидай гүё
- 28 Маҳкумлар ётарди адойи тамом;
Соқолнинг шарпасин сезгани заҳот
Урарди ўзларин мумга, вассалом.
- 31 Бир бор сал кечиқди шўрлик маҳкум зот,
Уни ҳанузгача эсласам агар
Юрагим орқага тортади, ҳайҳот.
- 34 Яқинроқ борди-ю Қичима бесар
Унга зудлик ила ташлади илмоқ.
Қирғоққа судради савсардан баттар.
- 37 Иблислар лақаби эсимда бироқ;
Гаплашиб келганди улар йўл бўйи,
Номлари ёдимда қолганди мутлоқ.
- 40 Малъунлар қичқириди тутишиб хўйи:
“Хой, Малла, мановнинг терисини шил,
Ном-нишон қолмасин, ўчин ранг-рўйи”.
- 43 Устозга дедимки: “Марҳамат этгил,
Иблислар кўлига тушган бечора,
Сабий зот ким экан, суриштириб бил”.
- 46 Устоз яқин борди унга тобора,
Маҳкум бизга шундай айлади жавоб:
“Кимлигим сўрасанг — юртим Наварра,
- 49 Отам молу мулкни этгач соб, хароб,
Ночор ҳолда қолгач бечора онам,
Хизматга олганди мени бир жаноб.
- 52 Хўжам қирол Тебальд — фоят серкарар,
Мени яқин тутди, бўлдим порахўр,
Мана, тортмоқдаман жазосини ҳам”.

- 55 Ахта Тўнғиз шу он этганча хўр-хўр,
Сўйлоқ тишиларини солганча ишга
Бурдалай бошлади маҳкумни масрур,
- 58 Бошқалар ёприлди ёрдам қилишга;
Соқол-чи, қайирди, лекин қизғаниб,
Деди: “Кучим етар уни тилишга”.
- 61 Устозга сўз қотди Соқол юзланиб:
“Хоҳласанг, у билан сухбатлашиб қол,
Хомталаш бўлганча савол бер қониб”.
- 64 Устоз деди: “Айт-чи, эй бечораҳол,
Борми ҳеч лотинлик бу оташ мумда?”
Деди: “Шу яқинда биттаси, алҳол,
- 67 Бор эди, биргайдик қайноқ қулзумда,
Чангак балосидан бўлардим холи
Ётсайдим у каби мумда шу зумда”.
- 70 Фурсат ўтганидан келиб малоли
“Қачонгача!” — дея Читтак солди чов
Ва маҳкум гўштини юлди-ю олди.
- 73 У билан талашиб Аждар беаёв
Бутига чанг солай деган фурсатда
Ўнбоши уларни тўхтатди дарров.
- 76 Улар ярашдилар яна албатта;
Маҳкум ётар эди бурдаланиб тан,
Устоз сўраб қолди маҳкумдан шартта:
- 79 “Анави лотинлик, айтгил, ким экан,
Сен хароб бўлибсан, унга ким шафे?”
Деди: “У — фирибда учига чиққан —
- 82 Роҳиб Гомитадир, йўқдир тарафи,
Таважжуҳ бор дея ҳибсдаги ёвда
Вазирга уқтирган ва ўтган гапи.
- 85 Пул олиб, қўйворган барин дарровда,
Сувдан қуруқ чиққан, далил йўқ факат,
Балоҳур эди у, бозори довда;

- 88 Микеле Цанке — бу иккиси улфат,
У-чи, логадорлик, эртадан то кеч
Сардин ҳайтини эслар бохурмат.
- 91 Иблис қайраёттир тишин тинмай ҳеч,
Йўқса, айтар гапим бор эди яна,
Иблис этар мени бурда, печу печ”.
- 94 Читтак шайланганди жангга мардона,
Лекин уни дарҳол тўхтатди бошлиқ:
Деди: “Ўзингни бос, ҳой маҳмадона”.
- 97 Гапда давом этди маҳкум ҳам мунглиқ,
“Кўрмоқчи экансиз юртдошларни гар,
Юзлаштирап эдим шу фурсат аниқ.
- 100 Холи қўйсайди сал иблислар кофар.
Чўчимай келарди улар биз томон.
Ҳуштак чалдимми — бас, беш-олти нафар
- 103 Таниш-билишларнинг келмоғи аён.
Бизда шунақанги тартиб-қоида —
Кўз-қулоқ бўламиз биримиз пинҳон”.
- 106 Ит лақабли иблис — бузук авзойда
Ғўнғирлаб қўиди сал: “Гар имкон берсак
Қочиб қолмоқчи бу, эси жойида!”
- 109 Наварралик деди: “Олғирман бешак,
Орттирсан дўстларга қийноқни қанча
Устомон бу, десанг бўларди, эй сак!”
- 112 Эгри қанот эса деди шошганча:
“Юрмасман орқангдан имиллаб, йўртиб,
Етгум мум ҳовузга қанот ёзганча.
- 115 Бир бор силкиндикми, борумиз етиб —
Бизни этолмассан сарсон, сарсари.
Сени сал фурсатда олурмиз тутиб”.
- 118 Ўқувчим, кўп қизиқ олам ишлари:
Қизиққон иблисдан тортиб ҳаммасин
Боши бурилганда салгина нари —

- 121 Наварралик маҳқум ростлаб нафасин,
Ерга оёгини тираб, барала
Шўнғиди тубанга, чиқармай сасин.
- 124 Кўринг, иблисларнинг ҳолин шу палла!
Ҳаммадан ишбоши мулзам, фазабнок,
“Ушлайман!” — деди-ю ташлади калла.
- 127 Лекин қайтиб чиқди ортига бебок,
Теран шўнгиганди маҳқум ҳам айёр.
Қанотли иблисга қайда шўнғимоқ!
- 130 Лочин ҳужум қилса, ўрдак шиддаткор
Сув остида зумда бўлади фойиб,
Лочин қайтиб кетар тунд ва жаҳлдор.
- 133 Чол-чи, учар эди тез қанот қоқиб,
Маҳқум йўқолса-ю, унинг истаги
Сўнг жанжал қилишса ўзлари ётиб.
- 136 Маҳқум фойиб бўлди патраб юраги;
Чол-чи, бир иблисга ботирди тирнок,
Айқашиб кетдилар, ким уст, ким таги.
- 139 Буниси ҳам ҳали ҳолва-ку, шу чоқ
Ташланди уларга мурдашўй лочин.
Жўш мойга барисин белади мутлоқ.
- 142 Ажралди чамбарчас иблислар ҳоргин,
Туар эди улар забун, ночорҳол.
Кўтаролмай мойга ботган қанотин.
- 145 Йўл-йўриқ кўрсатди серташвиш Соқол,
Чангагини олиб аранг тўртовлон
Жардан учиб ўтди у ёнга дарҳол.
- 148 Сўнг яқин келишиб қирғоққа томон
Чўза бошладилар чангагин пастга.
Қолганлар бижғирди мумда саргардон.
- 151 Тарк этдик бу жойни бизлар ҳам аста.

ЙИГИРМА УЧИНЧИ ҚҰШИҚ

Шоирлар ўзлари билан ўзлари овора бўлиб қолган иблислардан узоқлашиб, йўлда давом этадилар. Аммо иблислар қуввлаб келаётганини сезган Вергилий Дантени оғушига босиб, олтинчи жарлик томон зудлик билан сирғалиб тушади. Уерда мунофик, риёкор, иккигозламачилар қавми жазо тортади. Улар кўринишдан зарҳал, аммо ниҳоятда зил-замбил қўроғошин либосни кийиб юришга мажбурдирлар. Шоирлар уларнинг иккитаси билан суҳбатлашадилар.

Мубҳам йўллар оша иккимиз танҳо
Кетиб борар эдик бесёз, бекалом.
Икки оға-ини дарвишдай гўё.

- 4 Үтган ҳодисотни эсласам тамом
Қурбақа ва сичқон — Эзоп масали
Хаёлимни қайта айлар эди ром.
- 7 Жуда ўхшаш эди уларнинг ҳоли;
Бири “ҳозир”гина бўлганди содир,
Бири воқе бўлмиш “ўша маҳали”.
- 10 Гапдан гап чиқади, фикрдан фикр,
Ўзга ўйлар этди хаёлимни банд,
Расо ортган эди таҳликам оғир.
- 13 Иблислар биз боис едилар-ку панд.
Улар олмасмикан шафқатсиз қасос,
Шу ҳадик миямдан кетмасди ҳарчанд.
- 16 Мушкулдир қасд ишга феъл ҳам келса мос;
Ҳисоб-китоб қиласар улар бир карра,
Қуёнга ташланган итдан баттар маст.

- 19 Сочим тиккайди-ю ваҳима ичра
Бир зум қотиб қолдим қаққайиб, тўхтаб,
Хитоб эта қолдим устозга сўнгра:
- 22 “Чамамда, иблислар келмоқда қувлаб,
Кўнглимда шундай ўй, шундай бир хаёл,—
Дедим,— бекинайлик, чора топ ўйлаб”.
- 25 У деди: “Англадим фикрингни яққол,
Тушундим кўз очиб-юмгунча чаққон,
Қўрқувдан қолмади танингда мажол.
- 28 Сендан мутаассир бўлдим бегумон,
Менга ҳам кўчгандир сендаги ҳадик,
Ўйлаб қолдим мен ҳам чора-ю имкон.
- 31 Ўнг ёқда учраса эди қиялик,
Жар сари ўтишга йўл бўлса ўнфай,
Қувлаб етолмасди улар деярлик”.
- 34 Устоз гапларини айтиб тугатмай
Илғадим, ёприлди иблислар жадал,
Қанотларин қоқиб, ов қилмоқقا шай.
- 37 Йўлбошчим кўл чўзди менга шу маҳал;
Шовқинда ногаҳон уйғонган она
Ўт кетган уй ичра ҳовлиқиб тугал
- 40 Туртина-суртина у ён-бу ёна,
Кийим-ўрамни ҳам айлаб фаромуш
Боласин кўтариб қочгандай, мана,
- 43 Устозим мени ҳам этди-ю оғуш,
Пастлик — қияликка сиргалди чунон;
Олтинчи жарликка етдик мисли қуш.
- 46 Шиддат-ла айланиб ётган тегирмон
Парраги остидан отилган сув ҳам
Бунчалик шитобда оқмас ҳеч қачон.
- 49 Мени кўкрагига босганча маҳкам,
Дўстимас, ўғлига бўлғандай тиргак,
Шизоат кўрсатди устоз чинакам.

- 52 Иблислар келишди шошиб, жонҳалак,
Тепамизда эди уларнинг дасти
Ва лекин ўтганди хатар, ё фалак.
- 55 Бешинчи туйнукнинг аҳлига асти
Бу ерда таважжуҳ бўлса ҳам, аммо
Уларнинг гаплари энди ўтмасди.
- 58 Пастда тўп оломон бўлганди пайдо.
Улар кезар эди сокин, ноумид,
Ҳорғин қадам босиб, кўз ёши дарё.
- 61 Устларида хирқа бамисли совут,
Зилдай оғир эди, лекин бу жубба;
Клунъ роҳибларин эслатарди худ.
- 64 Зоҳиран безакдор — тилла ранг қубба,
Асли қўрғошинга эдилар мағлул.
Бу либосда юрмоқ мушкулдир жуда.
- 67 Соҳтакор либослар, оғирсиз нуқул!
Маҳқумлар ортидан эргашдик аста,
Уларнинг суҳбатин истарди кўнгул.
- 70 Зил-замбил либосда bemажол, хаста
Маҳқумлар имиллаб босарди одим;
Ўтардик, улар-чи, қоларди сафда.
- 73 Шу он устозимга сўз қота қолдим:
“Изн топ, ё эса ахтар баҳона,
Суҳбатга бирор зот топилгай балким?”
- 76 Лаҳжамни эшитиб бир шўрпешона
Ўзини тутолмай қичқирди: “Тўхтанг,
Зулматда боргайсиз шошиб қаёна?
- 79 Неки истасангиз, майлига, сўранг!”
“Шу ерда бирпас тур,— уқтириди устоз,—
Сўраб ол сен ундан неки истасанг”.
- 82 Иккита маҳқумни кузатдим бир оз,
Бор эди уларда баҳри иштиёқ,
Лекин юки оғир, йўл тиқин, носоз.

- 85 Яқин келишди-ю, айлаб иштибоҳ,
Бирор сўз демасдан термилдилар, чун
Мени кузатдилар бошдан то оёқ.
- 88 Сўнгра бир-бирига сўз қотди дилхун:
“Ҳалқуми қимирлар, тирик бовужуд,
Улар бу манзилда тентирад нечун?”
- 91 Менга сўз қотишиди: “Эй банди ҳудуд,
Тосканлик, кимлигинг аён эт бизга,
Жавоб қил, бўлсак ҳам биз аҳли мардуд”.
- 94 “Арноданман,— дедим мен кириб сўзга,—
Ҳаётман, шу вужуд менда барқарор,
Азалдан то бу дам кўриндим сизга.
- 97 Сизлар кимсиз, айтинг, бу нечук оҳ-зор,
Бу нечук кўз ёши, бу нечук қайғу,
Бу нечук изтироб, либос шуълакор?”
- 100 Бири жавоб қилди: “Этмагил орзу,
Шунчалар оғирки бу ажиб ридо,
Уни кўтаролмас ҳеч бир тарозу.
- 103 Бизлар Каталано ва Лодеринго,
Асли болонъялик, гаудент насаб,
Falvaga қўйгали нуқта, интиҳо.
- 106 Кўмакка борганмиз элингиз тараф;
У ерда қилганмиз нечоғли хизмат —
Англарсан Гардинго қасрига қараб...”
- 109 Дедим: “Оғайнилар, ишингиз фақат...”
Лекин гапдан қолдим: бирор ерпарчин
Ётарди, уч қозик қоқилган сумбат.
- 112 У мени кўрди-ю, қалтираб ҳоргин,
Хўрсина бошлиди, уф тортиб расо,
Каталано айтди бу ҳолнинг важин:
- 115 “Қошингда ерпарчин ётган бу тарсо
Фарисей қавмига айтар эди ваъз.
Элга бас бир кимса тортса деб жазо.

- 118 Йўлда у кўприқдай ётар муқаввас,
Ўтган-кетган ҳар ким ўтади босиб,
Турфа оғирликни сезгай ҳар нафас.
- 121 Қайнатасига ҳам шу қисмат насиб,
Қарғишга қолмишdir бутқул бир жоме,
Яхудийлар юрар — касрига қолиб”.
- 124 Абадий уқубат, изтироб коми
Ютган бу кимсага Вергилий устод
Назар ташлаб ўтди фалат, тамоми.
- 127 Сўнг Каталанога хитоб этди бот:
“Айтингиз, йўл борми энди ўнг ёқقا,
Токи учрамаса хатар, мушқулот.
- 130 Токи кета олсак бундан узоққа.
Қора фаришталар кузатгай токай,
Тоқат йўқ уларнинг юзин кўрмоққа”.
- 133 У деди: “Шу ердан узун, паёпай
Тош тизма ўтади кесиб ўпқонни,
Лекин айни чоф у ўприлиб ётгай.
- 138 Энди сизга айтсам, йўлнинг осони,
Ўтарсиз ўприлган ўша тош тимдан.
Улар қоплаб ётар атроф, ҳар ённи”.
- 139 Устоз бошин эгиб туарди зимдан,
Сўнг деди: “Алдабди бизларни демак,
Чангак кўтаришган иблислар чиндан”.
- 142 У деди: “Болонъя юртида бешак
Мендан бошқанинг ҳам фаҳми етгандир,
Яъни иблис зоти зулмга эгизак”.
- 145 Устоз йўлга тушди бадҳол, таъби кир,
Қовоқларин уйиб кетди мардона,
Бу сабил элни ҳам тарк этиб ахир
- 146 Устознинг изидан бўлдим равона.

ЙИГИРМА ТҮРТИНЧИ ҚҰШИҚ

Дүзахнинг олтинчи жарлигидан амаллаб чиқиб олган шоирлар гүж-гүж илонлар орасида таңзирини күраётган ўғрилар манзилгоҳи — еттинчи жарликка келадилар. Илон чаққан маҳкүм лов этиб ёниб кетади, сұнгра кулдан қайта тикланади. Данте улар орасида пистойялик Ванни Фуччини учратади. Ўз аҳволидан аламзада Фуччи Дантега оқлар партиясининг мағлуб бўлиши ҳақида гапиради.

Буржи Должда ҳали мурфакдир офтоб
Йил боши, ҳаво ҳам илийди ров-ров.
Рӯбарӯ келади кун ва тун шитоб.

- 4 Далалар бағрини қоплайди қиғор,
Гарчи унинг дами кун-бакун қайтар,
Лекин бир қарашда қор дейсан дарров.
- 7 Дәхқон кўз ташлайди уйғониб саҳар,
Ажабо, қор босмиш яйловни текис,
Пешонага уриб, оҳ чекар баттар.
- 10 Найласин? Чорасин томолмай, эпсиз
Үйга кириб кетар сўкиниб яна;
Лекин бир зум ўтиб боқса-чи, чексиз
- 13 Далалар тусини ўзгартмиш, мана;
Қувнаб қўлга олар яна таёгин,
Сурувни яйловга ҳайдар мардона.
- 16 Мен ҳам кўриб илк бор устоз сиёғин
Қутим ўчган эди ўшандоқ ҳайрон,
Лекин устоз ўзи тинчитди тағин.

- 19 Вайрона сиротга етганимиз он
Ёришиб кетди-ку устоз чехраси,
Дастлаб кўрганимдай руҳи чарофон.
- 22 Уюлиб ётарди тошлар парчаси,
Устоз ён-атрофга боққач, ниҳоят
Мени қучиб олди биратўласи.
- 25 Режали одамлар айлаб риоят,
Мудом иш тутгандай ўйлаб келгусин,
Кўтарди мени у шахт этиб фоят,
- 28 Уюм тош устига чиқдим шу йўсин.
Деди: “Мустаҳкамми, қадам қўйиб бок,
Қимирлатиб боққин тошнинг унисин”.
- 31 Бундай йўлда мушкул ридода юрмоқ;
Биз ҳам тармашардик тошларга аранг,
Устоз мадад бериб борарди бироқ.
- 34 Нишабга йўлиқдик, бу ҳолни қаранг,
Йўқса, устозни-ку, билмадим, аммо
Менинг ҳолим фоят бўлар эди танг.
- 37 Ҳамоно бу ўша Ёвуз Fop — юҳо,
Унга олиб тушар нишаб — ёнбағир,
Икки тараф девор паст-баланд борҳо.
- 40 Уюм тош устига чиқдик биз охир,
Энг сўнгти харсангга етганда ночор,
Буткул ҳолдан тойиб, тин олдим оғир.
- 43 Нафас олмоғим ҳам эди кўп душвор,
Үлтирган жойимда қолдим жилолмай,
Нари йўл босишга йўқ эди мадор.
- 46 Устозим дедики: “Огоҳ бўлгин, ҳай,
Пар тўшак қошига келмас шон-шараф,
Чарчоқ, танбалликка берма асло раъй.
- 49 Кимки шон ахтарса безаҳмат яшаб,
Ундан қолажакдир омонат бир из,
Елда — тутун, мавжда кўпикка ўхшаб.

- 52 Кўзғал! Танбалликка берилма ҳаргиз!
Дунёда ҳад йўқки енголмаса руҳ,
Руҳ бўлмаса басдир вужуддай ноқис.
- 55 Зиналар бор олдда узоқ, серандуҳ,
Четга чекинмоқлиқ сенга нолойиқ,
Ўтитим тингласанг — бўлма дилмажруҳ”.
- 58 Отландим мардона, зоҳирان босиқ,
Тетик тутар эдим ўзимни анча.
Дедим: “Мен тайёрман, эй пири ҳозиқ”.
- 61 Қоя пуштасига қадам босганча,
Кетдик, лекин бу йўл анча хатарнок,
Баттаринроқ эди кета-кетгунча.
- 64 Сўзлаб борар эдим босса ҳам чарчоқ,
Ногоҳ фор қаъридан чиқди бир овоз,
Овозки, каломга ўхшамас мутлоқ.
- 67 Сирот чўнқиридан қулоқ тутдим боз,
Англаб бўлмас эди бирор сўз, калом,
Узоқлашар эди гўё у нохос.
- 70 Тубанга энгашиб боқдим шу айём,
Ҳеч не кўринмасди қуюқ зулматда,
Устозга дедимки, айлаб эҳтиром:
- 73 “Қуайроқ олиб туш, теран хилватда
Овоз келади-ю, сўзин англамам.
Ҳеч нени кўриб ҳам бўлмас, албатта”.
- 76 У деди: “Хоҳишинг бажо айларам;
Адл ишга бошласа азму ихтиёр
Унга рўйхуш қилмоқ кордир серкарам”.
- 79 Саккизинчи ҳалқа томон раҳгузор —
Сиротнинг йўлидан боқдик ўпқонга,
Аён кўринарди манзара бисёр.
- 82 Кўзим тушди шу он фиж-фиж илонга,
Қай хили десангиз бордир, во ажаб,
Эсласам, тил ҳатто келмас забонга.

- 85 Ливия дашти ҳам келолмас тараф,
Чиндан морзор эрур гарчи у саҳро,
Лекин бунақаси йўқ эрур, ёраб!
- 88 Ҳабаш чўлларини қўшсанг ҳам ва ё
Қулзум соҳилларин устига-устак,
Бундай улкан морзор бўлмагай барпо.
- 91 Бижғиган илонзор ичида лак-лак
Маҳқумлар кезарди бесару сомон,
Мордан бекинмоқча йўқ пана, ковак.
- 94 Чирмашиб ётарди барига илон,
Сиқиб олган эди қўлларин маҳкам,
Гарданларин ўраб ташлашган ёмон.
- 97 Бирига даф қилди илон ўша дам,
Кекирдакка солди тишин бешафқат,
Ошкор кўринарди бизга бари ҳам.
- 100 Рақам чеккунчалик ўтмайин фурсат
Ногоҳ ўт олди-ю, лов ёнди маҳкум,
Бир ҳовуч кул қолди ўрнида фақат.
- 103 Дақиқа ўтмайин хок туроб мардум
Қаддин ростлади-ю, туриб оёққа,
Аввалги ҳолига қайтди-ку шу зум.
- 106 Қадим донишмандлар битмиш авроқча:
Беш юз йилда бир бор Самандар гўё
Ўзин маҳкум этар ўтда ёнмоқча.
- 109 Наботот эмасдир емиши асло,
Маҳв ўлса долчинидир бу қушга кафан,
Тириклик чораси эса мўмиё.
- 112 Ҳушдан кетган кимса билмас дафъатан,
Оёғидан чалган иблисми ёхуд
Васвасами боис — қолмиш фикрдан.
- 115 Ўрнидан тургач у серрайиб беҳуд
Теварак-атрофга боқади карахт,
Хўрсиниб қўяди ноchor ва ношуд.

- 118 Ўшандоқ эди бу маҳкум ҳам бебаҳт.
О, сен парвардигор, о, қодир қосид,
Қасос олажаксан нечог бешафқат.
- 121 Устоз хитоб қилди: “Кимсан, эй фосид?”
У деди: “Тоскандир ватаним меним,
Гуноҳим мана шу жарликка оид.
- 124 Одамдай яшашни севмасди жиним,
Исмим Ванни Фуччи, хачирдай ўжар
Ҳайвонман, Пистойядир такягоҳ жойим”.
- 127 Устозга дедимки: “Бу қонхўр бесар
Нечун баҳри хунга бермай мубаддал,
Бу жарда бандидир, сўра, эй раҳбар”.
- 130 Маҳкум сўзларимни тинглаб муфассал,
Шармисор ҳолатда бетга уриб қон,
Мен сари юзланиб деди шу маҳал:
- 133 “Менинг бир нарсадан ўқинчим чандон,
Дуч келдим мен сенга шундоқ аҳволда,
Бунча ғам тортмовдим ажал келган он.
- 136 Жавоб айта қолай сенга ҳар ҳолда;
Черков омборида ўғирлик қилдим,
Шу сабаб қолганман ушбу қамолда.
- 139 Бошқачароқ эди жазоим қадим,
Аҳволимга қараб шодланмаёқ тур,
Сенга сир айтишга жазм айладим.
- 142 Гапларимни эшит сергак, диққат бур:
Қоралар маҳв бўлар Пистойяда аввал,
Сўнгра Флоренция юргизар дастур.
- 145 Магра водийсида қодир Марс жадал
Зулматли булутлар силсиласин бот
Пицен даштларига ҳайдайди тугал.
- 148 Жанг бўлар даҳшатли ва қирғинбарот,
Оқлардан бу сафар юз буран омад,
Бошма-бош ҳар бир Оқ бўлгувси барбод.
- 151 Қалбингни тирнашдир гапимдан мақсад”.

ЙИГИРМА БЕШИНЧИ ҚҮШИҚ

*Шоирлар Как исмли кентаврга — ярим одам, ярим от
қиёфасидаги маҳлүққа дуч келадилар. У саркаш Ванни Фучини
таңқиб этади. Шунингдек, Данте бу ерда жамоат
мұлкінің үгірлаган бир неча флоренциялық юртдошларини
ұчратади, улар дағышатын жазо жараёніда илонга айланып
қоладилар.*

Сўзин тамом қилиб у ёвуз бало
Бармоқларин букиб, диндак кўрсатди,
Қичқирди: “Мана бу сенга, раббано!”

- 4 Шу пайтдан илонга ҳурматим ортди:
Ёвузнинг бўғзига ўралди бири,
Гўёки атайин гапдан тўхтатди.
- 7 Шахт ила бошқа бир илоннинг зўри
Маҳқумнинг дастини қайирди чунон,
Битди балохўрнинг бардош, шуури.
- 10 Ёниб бит, Пистойя, таг-тугинг-ла ён!
Асли зотингдан ҳам осийсан баттар!
Кўкларга соврилсин сендақа макон!
- 13 То Дўзах қаърида кезиб, баччагар,
Бундайин саркашни кўрмадим сира,
Капаней ҳам эмас бунчалик ўжар.
- 16 Қочиб қолди ёвуз ўша он ура,
Ортидан кентавр чопди ҳайҳайлаб,
Деганча: “Сенмисан, мақтанчоқ тўра?”
- 19 Кентавр сағриси эди кўп ажаб,
Сонсиз илонлардан ўрилганди дум,
Ҳатто Маремма ҳам келолмас тараф.

- 22 Елкасида эса аждар серзуғум
Туарди ҳар ёнга ёзганча қанот.
Маҳв бўларди унга дуч келган маҳкум.
- 25 Устозим дедики: “Қаршингдаги зот
Какдир, қон тўйкан у қанчадан-қанча,
АVENTIN тоғида яшаган шаддод.
- 28 Бу ерда юрибди танҳо кезганча,
Ўзга қопқада бор хешлари тўп-тўп.
Бу эса — ўғирлик қилганди анча.
- 31 Геркулес адабин берган эди хўп,
Юз бора тўхтовсиз урганди чўқмор,
Гарчи ўнтасида бўлса ҳам мағлуб”.
- 34 Сўзлашиб туардик шундоқ беозор,
Пастда тўпланибди уч нафар арвоҳ;
Балки этмас эдик бизлар эътибор,
- 37 Арвоҳлар қичқирди: “Кимсиз!” — деб ногоҳ,
Дафъатан хитобдан тўхтади суҳбат,
Икковлон тубанга ташладик ногоҳ.
- 40 Мутлақ танимадим уларни, фақат
Бири яна қайта берганди савол,
Улар ким — фаҳмлаб қолдим шу фурсат.
- 43 Дерди: “Келмадими Чанфа, айта қол”,
Эшиксин деб унинг сўзларин устоз,
Ишора айладим тубанга дарҳол.
- 46 Менинг гапларимга балки эътиroz,
Шубҳа билдиурсан, азиз китобхон,
Кўрдим бир ҳолники, мўъжизага хос.
- 49 Кузатиб улгурмай барин, ногаҳон
Олти оёқ аждар бўлди-ю пайдо,
Уларнинг бирига чанг солди обдан.
- 52 Биқинини қисди унинг аввало,
Олдги оёқлари ошди елкадан
Ва икки жағига ёпишди бало.

- 55 Маҳқумнинг сонларин йириб дафъатан,
Орасига тиқди думини буткул,
Кираиди буралиб сабил фоятан.
- 58 Улкан дарахтни ҳам ўраб печакгул
Бу маҳлуқ қадарли чулғамас машъум,
Эзғиларди маҳлуқ маҳқумни нуқул.
- 61 Иккови қўшилди мисли қайноқ мум,
Ҳатто баданларин ранги омикта,
Мутлақ ўзга ҳолга кирдилар, мавхум.
- 64 Саратонда ёнса гар қоғоз сўхта,
Алангасин ранги бўлар шу тахлит,
Қорамас ё оқмас — қўнғир бир тусда.
- 67 Қолган икки нафар дерди бўлиб хит:
“Нима бўлди сенга, Анъел, бечора,
Тоқ деса тоқмассан, ё жуфт деса жуфт”,
- 70 Бошлари бирлашар экан шу ора,
Аввал ғалатироқ туюлган рухсор
Аён тортар эди энди тобора.
- 73 Вужуди чорбўлак — жуфт-жуфт қўли бор,
Тўш, қорин, оёғу гардан, умуртқа
Айқашиб кетганди — кўп қизиқ рафтор.
- 76 Турфа тус аралаш — бамисли қуйқа,
Секин йўлга тушди жирканч алвости,
Бироми — икковлон, мубҳам, шунақа.
- 79 Баравж келганида саратон тафти,
Четанинг тагидан қув калтакесак
Югуриб ўтади — яшиндай шахти.
- 82 Ўшандоқ бир илон чиқди жон ҳалак,
Чипор рангда эди ёвуз, очофат,
Бирига даф этди чаққон ва тийрак.
- 85 Ҳали вужудида ҳаётбахш шарбат
Жавҳари қуримай турган жойига —
Айни мояигига оғиз солди шарт.

- 88 Сўнг илон сирғалиб тушди пойига,
У-чи, меровланиб эснади узун,
Хуш келгани каби бу иш раъйига.
- 91 Икков ўтру келиб тикишди кўзин,
Бири тутун пускар, бири боқар сур,
Тутун қоплаганди икковин бутун.
- 94 Сабелл, Насидийни ёзган сергуур
Лукан ҳам жим қолсин, майли, шу дафъа,
Менинг битигимни тингласин бир қур.
- 97 Овидий куйлаган Аретуза, Кадма,
Бири жилга бўлган, бириси — илон,
Бўлса бўлаверсин, эмасман хафа:
- 100 Юзма-юз туришган гарчанд икковлон,
Чеврилтиromoқ учун сийратин ва лек
Мажбур этолмаган мановларсимон.
- 103 Икков икки ёндан боқар эди тек:
Илон думи ногоҳ бўлди-ю айри,
Маҳкум товонлари қапишди бирдек.
- 106 Болдир ила сони вақт ўтган сари
Ёпишиб борарди жипсу мустаҳкам,
Қолмайин заррача чокнинг асари.
- 109 Илон думлари-чи, энди чинакам
Ўхшаб қолган эди икки оёқقا.
Ўзгарганди лойиқ терилари ҳам.
- 112 Маҳкумнинг қўллари ичкари ёқقا
Тортилиб кирганди муштига қадар,
Илонда қўл ўсиб чиқди шу чоғда.
- 115 Орқа оёқлари эса сарбасар
Эркак олатига айланна қолди,
Бунда-чи, думга у айланди яксар.
- 118 Орада тутун ҳам аста тарқалди,
Батамом ўзгарди улар ангори,
Бунда мўй ўсиб-ю, унда йўқолди.

- 121 Бириси чўзилди илон сингари,
Униси қолди-ку ўхшаб одамга;
Сўнгра ўзлари ҳам дўнди тескари.
- 124 Бири чакагини йигнаб тутамга
Этидан ростлади қулоқ, баногўш.
Буниси эса-чи, сўзсиз шу дамда
- 127 Кулчадай, гужанак ерга қўйди тўш,
Лозим бўлганича чўзилди тумшук,
Лабу жаф ҳам ўсади келганича хуш.
- 130 Илон туфроқ ичра беланди тўлиқ,
Фойиб бўлди унда қулоқ оқибат,
Ҳолат зоҳир бўлди — баайнни шиллик.
- 133 Қачондир тили ҳам бор эди якқат,
Айри бўла қолди энди бутунлай,
Унда-чи, рўй берди шундоқ акс ҳолат.
- 136 Илон суратида руҳ энди тинмай
Вишиллаб судралди қай бир ковакка,
Бу-чи, ўдағайлаб, туфларди, ҳай-ҳай.
- 139 Маҳқумга айланган илон-чи тикка
Ғўнғирлаб дер эди: “Буозо, майли,
Мен каби судралсин сарсон ва якка”.
- 142 Кўрдим-ку мен ахир, қув тарсо хайли
Кўз олдимда бўлди айқаш ва уйқаш.
Балки гуноҳ этдим қалам туфайли.
- 145 Атроф хира тортди, руҳим ҳам чалкаш,
Ановлар нечоғ тез кетмасин, аммо
Таниб қолдим оқсоқ Пуччони яккаш.
- 148 Қоялар қошида турибмизки то,
Фақатгина унга етмади зиён.
Ўшал учта муртад қароқчи аро,—
- 151 Бирин деб Гавилда оҳ тортар ҳамон.

ЙИГИРМА ОЛТИНЧИ ҚҰШИҚ

Бу ерда құтмир маслаҳатгүйлар қавми аланга ичіда ёниб, гирён кезадилар. Улар орасыда Улисс ва Диомед ҳам бор. Улисс Вергилийнинг илтимосига биноан үзининг сүнгги дениз сафари ҳақида сұзлаб беради.

Фахр эт, Флоренция, омадинг порлок,
Денгиз, заминда-ку қозондинг шавкат,
Хатто Дўзахда ҳам шонинг ярқироқ.

- 4 Қароқчилар аро беш меним элат,
Буларни кўрмоқдан айлагум номус.
Булар деб сенга ҳам ёғилмас раҳмат.
- 7 Саҳар чоги магар туш кўрсанг холис,
Унинг ўнг келмоғин сезиб тургай дил,
Эрк учун Прото тиккан каби кўз.
- 10 Бўладиган ишнинг бўлгани маъқул,
Тезроқ воқе топсин армон ҳам, билъакс
Йиллар ўтган сайин эзилгай кўнгил.
- 13 Яна йўл бошладик ва лекин баръакс,
Келган изимиздан қайтдик биз тағин,
Юксакка тирмashiб борардик ҳамдаст.
- 16 Ёлғиз сўқмоқ бўйлаб кетардик ҳоргин,
Тойганда тошларга тирмашдим аранг,
Йўл мушкул тортарди юксалган сайин.
- 19 У йўл азобларин сиз мендан сўранг,
Лекин кўрганларим эсларкан аниқ,
Яна ҳам қийналиб турибман дилтанг.

- 22 Ақлу идрокимга берурман озиқ,
Юлдузим бахш этган эса фазл, камол,
Уни топтамайин янглишиб ортиқ.
- 25 Кун ботиб, кирганды лаңзаи завол
Дүнгда ҳордиқ олиб ўтирган дәхқон
Боқар, күз ўнгидә юз очар бу ҳол:
- 28 Чивиннинг ўрнида пашшалар ғужгон,
Пастда, водий узра, узумзорларда
Күртлар шуъла сочиб, ялтирад чунон.
- 31 Рұбарәү келгандик шундоқ манзарга;
Саккизинчи эди биз етган қопқа,
Шуълалар чақнарди тубанда — жарда.
- 34 Аробасин ҳайдаб булутлар аро
Яшиндей учганда Иләс пайғамбар,
Айиқдан қасосин топған авлиә
- 37 Унинг бу шахтига ташлабди назар.
Булутдай юксалған ҳазратта қараб
Илғапти у фақат ялт-юлт бир ахгар.
- 40 Жарликнинг тубида шундоқ ярқираб
Айланарди сонсиз олов парчаси.
Гарчанд гуноҳкорни бўлмасди илғаб.
- 43 Йоксақдан кўринар эди барчаси,
Харсангга суюлиб боқмасам, паққос
Мен ҳам қулар эдим, гапнинг сираси.
- 45 Аҳвол-руҳиямни фаҳм этиб устоз
Деди: “Ҳар бир оташ парчаси ичра
Бир маҳкум ёнмоқда, азоб бекиёс”.
- 49 Устозга дедимки, юз буриб сўнгра:
“Менга аён бўлди сиру синоат,
Саволим бор ҳатто шу ҳолга кўра:
- 52 Ана, ёнаётир ёлғиз ўт ялт-ялт,
Негадир алнга тили қўшалоқ
Гўё иниси-ла Полиник бадбаҳт”.

- 55 Йўлбошчим дедики: “Бул икки ўртоқ,
Улисс ва Диомед — гуноҳи ўхшаш,
Энди азоби ҳам бир хилдир, мутлоқ.
- 58 Асл румликларнинг шаҳрига саркаш
Киритиб қачондир сохта, ёғоч от,
Деворларни бузган фаюр, тарафкаш,
- 61 Дейдамия эса чекканча фарёд
Дўзахда балокаш Ахиллни чорлар,
Палладий туфайли ушбу мукофот”.
- 64 Устозга дедимки: “Уларнинг магар
Сўзлашмоққа бўлса зарра забони,
Ёлвориб сўрайман, о, пири сарвар.
- 67 Сабр айла, кутайлик биз ўшал онни,
Берироққа келсин кўшалоқ олов,
Сўзлашмоқ истаги ўртайди жонни”.
- 70 Устозим дедики: “Бундақа сўров
Ҳар қандай дилда ҳам қўзгар иштиёқ,
Лекин сен сабр айла, тилга сол тушов.
- 73 Мен ўзим уларни тергайман озрок,
Нечун безовтасан — турибман англаб,
Сўзлашмас сен билан — юонон сердимоқ”.
- 76 Қўша тил аланга келди яқинлаб,
Энг қулай фурсатда устод муҳтарам
Уларга хитобан бошлаб қолди гап:
- 79 “О, оташ қаърида топганлар барҳам,
Фанимат умримда сизни куйладим,
Куйладим ҳол-кудрат, ортиқ, балки кам.
- 82 Сизнинг ҳақингизда назмда сўйладим;
Иқрорингиз айтинг тин олиб бирпас,
Ҳалок бўлгандингиз бирингиз қадим”.
- 85 Саҳродаги гулхан шамолда элас
Чайқалгани каби зориқиб ночор,
Аланганинг уни энгашди бесас.

- 88 Гоҳ у ён, гоҳ бу ён титраб нолакор,
Тилга кира қолди олов, ниҳоят:
“Цирцея билан мен хайрлашдим сўнг бор.
- 91 Мени у бекитган авайлаб фоят,
Бир йил паноҳида кечирдим умр.
Энейдан шундай ном олган вилоят.
- 94 На фарзанд мөхри-ю, на ёрдан узр,
На уй-жой, на падар қошидаги бурч
Ва на Панелопа баҳш этган ҳузур,
- 97 Ҳеч нима, ҳеч қандай андиша ва куч
Тўхтата олмади мени йўлимдан,
Чиқиб кетдим шундоқ, саёҳатга ўч.
- 100 Содиқ аскарларим ила элимдан
Чоғроқ бир кемада кетдим ягона,
Денгизлар қўйнида сайр этдим зимдан.
- 103 Марокашни кўрдим йўлимда, яна
Испанлар юртини, сардлар ўлкасин
Кездим, оролларга бўлдим равона.
- 106 Валломатлар эдик, кўрдик барчасин,
Оlam интиҳоси — сўнгги бўғозда
Кўрдик Геркулеснинг ҳад-чегарасин.
- 109 Тўхтамоқ фарз эди ҳадди мумтозда;
Қолди ортда Сетто, Севилья аввал,
Кетиб борар эдик шундоқ алфозда.
- 112 Дедим: “О, дўстларим, йўл босиб чигал
Модомики келдик кунботар томон,
Қолган умримизни бағишлиб тугал,
- 115 Кўрайлик не бўлса янгилик, армон.
Етган манзилимиз — офтоб ботар жой,
Кимсасиз маъвога боқайлик шоён.
- 118 Кимнинг зурёдисиз, ўйланг, ҳойнаҳой,
Яралган эмассиз нафс учун фақат,
Тафаккур ва шавкат инсонга чирой”.

- 121 Ҳамроҳлар жунбушга келди, билмай ҳад
Ташлана қолдилар дафъатан олға,
Ўзим ҳам чорасиз қолгандим фоят.
- 124 Кеманинг қўйруғи кунчиқар ёқда,
Жадал кетавердик шундоқ бебошвоқ,
Йўлимиз оғарди сўл томонроқقا.
- 127 Тунда кўз ташладим самога, бироқ
Буткул ўзга осмон бўлди намоён,
Денгизнинг сатҳи ҳам ўзгарди мутлоқ.
- 130 То қалтис сафарга чиқдим бу томон,
Беш бора тўлишди ой ҳам фалакда,
Ўтганди орадан беш ой бегумон.
- 133 Дафъатан уфқнинг тубида якка
Бир тоғ пайдо бўлди, қоп-қора, улкан.
Илк бор дуч келдим бу кўхи юксакка.
- 136 Шодлик алмашинди ғам, алам билан,
У ёндан қўпди-ю зўр қуюн — гирдоб,
Кемани чархпалак айлади бирдан.
- 139 Уч бора зарб берди гирдибод тезоб,
Кема тўртингчи бор соб бўла қолди,
Ба фармони раззоқ бўлдик биз хароб.
- 140 Бизни серавж баҳр қаърига олди”.



ЙИГИРМА ЕТТИНЧИ ҚҮШИҚ

*Данте пана Бонифацийга маккорона маслаҳат берган
Гвидо да Монтефельтро билан сұхбатлашади. Ү шоирға ўз
қисматы ҳақида сўзлаб бериб, ватанида нима гаплар борли-
гини суриши тиради.*

Дилкаш шоир билан битгач мулоқот,
Аланга қўзғалди — шакли бир текис,
Уни ўз қаърига олди зулумот.

- 4 Яна пайдо бўлди олов изма-из
Гувлаб келар эди, овози мужмал,
Дикқатни тортарди турқи, шубҳасиз.
- 7 Сицилия ёқда, қачондир азал
Маҳкумни жазолаш фикрида атай
Мисдан қуидиришган эди пуч ҳайкал.
- 10 Буқа шаклидаги ҳайкалга талай
Маҳкумни тиққанлар, сўнг ёққанлар ўт:
Улар бўкиришган гёё буқадай.
- 13 Устани тиқишишган биринчи мавруд;
Аланга чулғаган манов бечора
Гувраниб турипти худди шу тахлит.
- 16 Аланганинг қиёқ тиллари аро
Аранг келар эди унинг овози,
Ўтда қалтирарди солиб фарфара.
- 19 Дерди у: “Сенгадир қалбим нидоси,
Ломбардча каломинг эшитдим ҳозир,
Дединг: “Боравер, мен сұхбатдан рози”.

- 22 Кошингда ҳаяллаб бўлсан ҳам зоҳир,
Ёлбораман, шошма, садағанг кетай,
Оташда ўртаниб турибман, охир.
- 25 Дўзахнинг кўру кар тубидасан шай,
Севикли лотиндан келтирдинг пайгом,
Маҳқумман, бир гапни бесабр сўрай:
- 28 Айт-чи, Романъя тинчми бу айём?
Урбинодан тортиб Тибрга қадар,
Оралиқ воҳадир юртим бардавом”.
- 31 Мен уни тинглардим — ўйларим даҳсар,
Устоз тирсагимдан ушлаб қотди гап:
“Манов элатингга айт бирор хабар”.
- 34 Жавобни аввалроқ қўйгандим тахлаб,
Хитоб қила қолдим чечан, бетўхтов:
“О, Дўзах қаърида банди бешараф;
- 37 Юрting тинч турганин кўрганми бирор,
Ҳеч курса ҳокимлар қалбida бор кин,
Гарчи шу кунларда осойишdir-ов.
- 40 Равенна турибди жойида сокин:
Ишлар бажо бўлган, Червъягача то
Полента бургуги ёзган қанотин.
- 43 Фаранглар ҳужумин даф қилиб, ҳатто
Уларни тор-мор айлаган шаҳр
Узра Яшил арслон эрур кадхудо.
- 46 Монтанъя юртига ўтказган жабр
Кучукваччиаси-ла Веррукко қўппак
Ҳамон бир сүякни тинмасдан ғажир.
- 49 Ламоне, Сантерно юртига келсак.
Унда Оқ муҳрли шер ҳукми жорий,
Дўстликда бетайин, алдамчи бешак.
- 52 Савъо аҳолисин тақдири, оре,
Икки оралиқда қолгандир чиндан,
Ярим қул, ярим ҳур, йўқдир қарори.

- 55 Жавоб ола билдинг бир қадар мендан,
Хотиранг кетмасин ўчиб дунёда,
Кимлигинг аён эт, сўрайман сендан”.
- 58 Тўнғиллаб олди у ўша аснода,
Сўнгра алангасин тебратиб кам-кам,
Сўз бошлаб қолди-ку йифнаб ирода:
- 61 “Менинг гапларимни тинглаган одам
Хаётга қайтишин билсайдим зарра,
Титрамас эдим ҳеч бунчалар пурғам.
- 64 Ва лекин, аён ҳол, иккинчи карра
Ёргу дунёга биз этмасмиз ҳижрат,
Шу сабаб, номусдан қўрқмасман сира.
- 67 Бир қун қиличимни, айлаб хуш ният,
Роҳиб пўтасига этдим айирбош,
Менинг орзум эди роҳи ҳидоят.
- 70 Лекин гуноҳ ишга яна урдим бош,
Гўрингда ўт ёнгур папа — олий зот
Мени йўлдан урди, боис — юрт талош.
- 73 Токи кезар эди танимда ҳаёт,
Одатим бор эди сут билан кирган,
Муғамбир эдим мен тулкидан зиёд.
- 76 Зот эдим, юлдузни бенарвон урган,
Билардим қальалар махфий йўлларин,
Хунаримни жаҳон эшиштан, кўрган.
- 79 Қўлимдан не келса қилгандим барин;
Ҳар қандай оқил ҳам, битганда меъёр
Елкан йиғиштириб, ташлар лангарин.
- 82 Мен ҳам этган эдим узлат ихтиёр,
Тинчимни топарман девдим тамоми,
Во дариф, терс келди толе кажрафтор.
- 85 Фарисей аҳлининг янги имоми
Фазот эълон қилди Сарацингамас,
Яхудога эмас, балки аҳкоми

- 88 Аҳли салиб билан жангга кирди, бас,
Акра қўлдан кетди — Сарацин сабаб,
Мусулмон-ла савдо қилган булармас.
- 91 Гарчанд папада бор имкон ва мансаб,
Гўё унутди-ю бунинг ҳаммасин,
Менга қўлин чўзди маслаҳат сўраб.
- 94 Мисли мохов очган шоҳ Константин
Сираттдан Сильвестрни чорлаган мисол,
У ҳам йўллаб қолди менга рағбатин.
- 97 Гўё мен туфайли ўнгланар аҳвол,
Қошимда турарди мастдай довдираб,
Унга не дейишни билмасдим дарҳол.
- 100 Деди: “Пенестринони янчгин, шу талаб,
Қўрқма, урмас сенга увол муҳаққақ.
Гап шу: маслаҳатинг ўтирма аяб.
- 103 Жаннатни очиб ҳам ёпурман тақ-тақ.
Шу боис қўлимда иккита калит,
Салафим буларга қараган бефарқ”.
- 106 Жаннат борасида сўз кетди яхлит,
Бундай важ қошида қилдиму ирим,
Дедим: “Айлагандинг гуноҳдан соқит,
- 109 Фатво ҳам бергувчи ўзингсан, пирам,
Раббано дилингта солса, бас, инсоф,
Зафар қозонгайсан, рақибинг мужрим”.
- 112 Сўнгги дам Франциск келганда шитоб,
Бермади руҳимни иблис — тошкўнгил,
Деди: “Тегма бунга, қилмагил итоб.
- 115 У — менинг улушим, Дўзахга ноил,
У ҳийла йўлига ўтгандан бўён
Менинг маҳрим бўлган, шуни яхши бил.
- 118 Тавбасиз ювилмас гуноҳ ҳеч қачон,
Тилда тавба қилиб, дилда бўлса доғ,
Ижобат бўлмагай узру пушаймон”.

- 121 Бутун вужудимни қоплади титроқ,
Мени саранжомлаб оларкан, ё раб,
Ибليس дерди: “Билгум мантиқни озроқ”.
- 124 Мени олиб учди Миносга қараб,
У эса саккиз бор силтаб думини,
Хатто газаб ичра ўзин таталаб,
- 127 Деди: “Алангага топширинг буни”,
Кўриб турибсанки, охир беаёв,
Оташин ридонинг бўлдим тутқуни”.
- 130 Қиссаи ҳасратин тугатиб дарров
Тарқ этди бизларни бўйчан аланга,
Қиёқ тилин чўзиб кетди у олов.
- 133 Икковлон йўл солдик яна баландга,
Сиротдан боқардик жарга муаллақ,
Зулмга сабабкорлар ётар тубанда,
- 136 Энди жазосини тортиб муҳаққақ.



ЙИГИРМА САККИЗИНЧИ ҚЎШИҚ

Ушибу қўшиқда тасвиrlenган зотлар инсонлар орасига низо ва нифоқ уругини сочганликда айланади. Уларнинг жазоси ўзига хосдир: маҳкум бир доира бўйлаб тинмай айланади, бир нуқтага етганда, иблиц уни шамшир билан ёриб ташлайди. Маҳкум доирани яна айланаб келгунга қадар жароҳат битади, ўша жазо эса яна тақороланади. Бу ерда Данте Муҳаммад пайғамбар, ҳазрат Али, Медичи, Курион, Москва, Борн сингари зотларни учратади.

Биз чеккан жароҳат, биз кўрган қонни
Ифода қилолур қайси бир инсон?
Таъриф-тавсифининг йўқдир имкони.

- 4 Баёнин этолмас ҳеч битта лисон,
Беҳад ҳодисотнинг икир-чикирин
Қамраб ола билмас шуур ҳеч қачон.
- 7 Даҳшат қоплаганди Пулия ерин,
Қонга ботди барча жанг майдонида,
Майиб ва шикаста бўлди баттарин.
- 10 Троя қасд қилиб фанин жонига,
Мурдалар қўлидан йиғдилар узук,
Ливий ҳақ сўз битган ўз баёнида.
- 13 Руберт Гвискар-ла жанг бўлган буюк,
Унга бас келай деб отланган элат,
Чеперано қошида маҳв бўлган черик.
- 16 Пулийлар лашкари — боис хиёнат
Сўғишида оқибат бўлганди мағлуб,
Маккор фараанг Алар берганди мадад.

- 19 Қирғин қай ниятга бўлмасин мансуб,—
Тўққизинчи қопқа қаъридаги ҳол
Уларнинг баридан кетгайдир ўтиб.
- 22 Таги тушиб қолган қўш қулоқ мисол,
Маҳкумнинг вужуди ёрилганди қоқ —
Лабдан то думғаза — очилган яққол.
- 25 Бутига осилган ичак ва чавоқ,
Нажас ўтар жойда — халтача аро
Юрак ҳам кўриниб турарди шундок.
- 28 Менга қўзи тушгач маҳкум бечора
Қўли билан очиб кўкрагин тархин
Деди: “Қара, менинг ҳолимга қара!
- 31 Бу banda нечоғ бад, бир назар солгин!
Қаршимда юрган зот бенаво, далли.
Боши қоқ иккига бўлинган ҳорғин.
- 34 Бундаги маҳкумлар ҳаёт маҳали
Жаҳонга солғанди нифоқ ва низо,
Энди жазо тортар, келмишдир гали.
- 37 Ортда пойлаб турар иблис серғавғо,
Бизни тилкалайди тиф уриб тамом,
Ҳар бир айланганда тағин шул жазо.
- 40 Шу ҳол такрорланар тўхтамай мудом,
Айланиб боргунча битгай жароҳат,
Яна ўша жазо этади давом.
- 43 Нечун нигоҳингда бунча важоҳат,
Сен кимсан? Юксакда турган, эй инсон!
Боқурсан тубанга бунча бетоқат?”
- 46 Лутф айлаб сўз қотди йўлбошчи шу он
“У зот марҳум эмас, Дўзахда сайёҳ,
Гуноҳи туфайли келганмас бу ён.
- 49 Дўзахни кезмоқда юриб роҳ-бароҳ,
Қисмат йўриғи шу — мен, ҳамроҳ — марҳум
У ҳам худди мендай қошингда, валлоҳ”.

- 52 Ногоҳ тўпланди-ю жамики мардум,
Буткул унтишиб ўз азобини
Менга анграйдилар, этолмай мафҳум:
- 55 “Қайта кўрсанг ҳаёт хуш офтобини,
Дольчинога айтгил, маҳв бўлмай то
Топсин жон сақлашнинг йўл, ҳисобини.
- 58 Қор кўчиб, Навардан етгунча бало
Сариштасин қўлсин чидаб, амаллаб
Бир муддат енгилмай тургай, иншолло”.
- 61 Яна йўлга тушиб, доира бўйлаб,
Кезмоқ-чун қўзғалиб қўяркин қадам —
Шу бўлди Муҳаммад айтган сўнгти гап.
- 64 Бизга яқин келди ўзга бир одам,
Кекирдак ўйилган, бурни йўқ буткул,
Қулоқ йўқ, терилаб ташланган қош ҳам.
- 67 Сўз айтай дерди-ю, аҳволи мушкул,
Бўғзидан отилиб чиқар эди қон,
Потраб теваракка сачрарди нуқул.
- 70 Деди: “Тингла мени, покдомон инсон,
Алдамаса агар ўхшаш қиёфа
Сени Италияда кўрганман, ишон.
- 73 Пьер да Медичинани эслаб қолгин, ҳа:
Верчелли деворин канорасидан
Маркабога қадар бор гўзал воҳа.
- 76 У ерда Фанонинг фуқаросидан
Мақбули Гвидо ҳам Анжолелло,
Фолим холи бўлса саҳв балосидан
- 79 Етказ икковига, келиб ёв — бало
Уларни кемадан ағдарурлар тез,
Шундоқ макр қиласр мустабид расво.
- 82 Қибрис ва Майорка ораси денгиз,
Унда қароқчи-ю юнонлар талай,
Бундақасин Нептун кўрмаган ҳаргиз.

- 85 Музофот ҳокими — бир қўзли филай
Икковин чорлагай атай сұхбатга,
Гарчанд қўшним унга билдирмагай раъй.
- 88 Сұхбат баҳона-ю панд берар шартта,
Фокара бағрида икковлон, рости,
Қолар бежаноза, бегўр, риҳлатда”.
- 91 Дедим: “Тирикларга гапингни, баски,
Етказгум, сўровим бор, лекин тагин,
Айтгил, анов зот ким, фалати афти?!?”
- 94 Ушлаб дабдурустдан шеригин жағин
Даҳанин силжитиб қўйди нарироқ
Ва деди: “Бекитдим оғзин — мазахин.
- 97 Цезарга гап маъқул қылган бақироқ,
Жанглар сабабчиси нотиқ ушбу зот,
Деган: “Тайёр эсанг — даркор урушмоқ”.
- 100 Нотиқ Курион-чи, даҳани барбод
Аранг тураг эди тополмай чора,
Жавоб айттолмасдан, газабкор, шаддод.
- 103 Ўша он бошқа бир маҳқум бечора
Мажруҳ қўлларини қўтариб аранг,
Юзидан қон силқиб қилди ишора.
- 106 Дедим: “Москага ҳам қайрилиб қаранг”.
У айтган: “Ким енгса — шуники маъқул”,
Юртга зулм етказган у кони найранг.
- 109 Дедим: “Ҳикматинг-ла қўшмозор бўлгил”.
У-чи, тентирарди мисли савдойи,
Изтироби ортиб, серҳасрат, маълул.
- 112 Тоқатим тоқ бўлиб, буткул адойи.
Ақл бовар қилмас қисматлар кўрдим,
Ёдга олмас эдим барин, илойи.
- 115 Нетайки, виждоннинг гапига кирдим,
Ҳушёр йўлдошимиз виждон ҳамиша
Ҳақиқат либосин кийгай бежирим.

- 118 Бир ҳолни эслайман мен ўша-ўша,
Даврада кезарди калласиз вужуд,
Бошқалар қатори, ҳамсаф, ҳампеша.
- 121 Қўлида бамисли чароги муршид
Кўтариб олганди серсоч калласин,
Боқар эди бизга фамгин бош — мардуд.
- 124 Пойига машъалдай сочган шуъласин,
Булар икковлонми ёхуд ягона,—
Яратганинг ўзи билгай ҳийласин.
- 127 Вужуд сирот узра туриб мардона
Каллани баландроқ кўтарди, токи
Эшитилсин дея лутфи сўзона.
- 130 Дерди: “Бундок азоб учрамас, боқки,
Марҳумлар аро сен юрган зот сар-сар,
Ноҳуш сезмақдасан ўзни ҳаттоки.
- 133 Кимлигим билмоқлик истасанг магар —
Берtram де Борнман, қирол Иоанни
Йўлдан оздирганман, макрим шу қадар.
- 136 Ота-бола аро қўзгадим жангни,
Абусалом билан шоҳ Довуд аро
Бир вақт Ахитофель қилган найрангни
- 139 Қўлламадим, уздим риштани расо.
Шу боис жазога бўлдим мустаҳик,
Яъни каллам абад танадан жудо.
- 140 Кўплардай, қасосга эканман лойиқ”.



ЙИГИРМА ТҮҚҚИЗИНЧИ ҚҮШИК

Дўзахнинг ушибу манзилгоҳида жазосини тортаётган зотлар алхимиклардир. Улар турли-туман яра-чақаю жирканч иллатларга мубтало бўлганилар. Улар орасида Данте биладиган Гриффолино ҳамда Капокъю бор.

Маҳкумлар ҳоли-ю мудҳиш манзара
Тўлдириб юборган эди дийдамни,
Йиғлагим келарди яширмай сира,

- 4 Вергилий фаҳм этиб мендаги ғамни
Деди: “Телмиурсан тубанга бунча,
Нени ахтарурсан, қандоқ одамни?
- 7 Ўзга қопқалардан ўтиб келгунча
Чекмаган эдинг-ку бунча фироқлар.
Арвоҳ эса беҳад — кета-кетгунча.
- 10 Фурсат ўтиб борар, ой ҳам оёқлар,
Сайри томукқа ҳам оз қолди муддат,
Сени кутаётир ўзга қирғоқлар”.
- 13 Дедим: “Ниятимни англасанг албат
Рози бўлиб, балки айлардинг карам,
Кимни кўрмоқлигим билсайдинг фақат”.
- 16 Шундоқ деб ортидан қўйдим мен қадам,
Айтдим кетаётиб устозга тафн:
“Мен боққан гўшада бордур бир одам.
- 19 Изтироб чулғаган шўрликни тайин
Жазосин тортмоқда қилмишига мос,
У менга қурдошdir, ростим айтайн”.

- 22 “Фикринг бўлма,— дея лутф этди устоз,—
Кўрмасанг кўрмабсан, шунгами нола?
Ўйласанг — бошқача ўйлар бордир соз.
- 25 Кўрдим, узугин у қилиб ҳавола
Хитоб айлаганди сенга ғазабнок,
Исми Жери экан, чекарди вола.
- 28 Ўзга жойда эди сенинг ақл, идрок,
Готфор ҳукмдори ила эдинг банд.
Пайқамадинг, кетди қурдошинг йироқ”.
- 31 Дедим: “Ўлдирилган эди жувонмард,
Унинг-чун дунёда олмадим қасос,
Шу сабабли боққан хафа, худписанд.
- 34 Унинг гинасига бор чиндан асос,
Шу боис этмаган менга илтифот,
Баттарроқ ачиндим бечорага, рост”.
- 37 Кетдик иккаламиз айлаб мулоқот,
Чиқдик ўзга жарлик кунгурасига,
Теграмизда эди хира зулумот —
- 40 Йўқса, Ёвуз Форни бир сирасига
Сўнгги зотигача аён кўрардик,
Боқар эдик балки фуж қўрасига.
- 43 Фарёд, қарғиш сўзлар найза каби тик
Отилиб чиқарди дилим айлаб танг,
Зўр favfo — қулоқни расо тешгудек.
- 46 Саратон чоғида Сардин, Вальдикян
Мареммида бўлган жамики бемор,
Беморхоналарни бир жойга йифсанг —
- 49 Бунчалик оҳ-нола чиқмоғи душвор;
Бамисли айниган ярадай, ё раб,
Бир ҳид тараларди жуда ҳам мурдор.
- 52 Устоз икков ўтдик юқори тараф,
Қиялик томонга нигоҳим бурдим
Ва кўрдим барисин тубанга қараб.

- 55 Раббано йўруғин фаҳм этиб турдим,
Бу ерда Адолат юритарди иш,
Жазосин тортарди соҳтакор мардум.
- 58 Эгина элини босиб ғам, ташвиш,
Ўлкага келганди бедаво вабо,
Элни қирған эди балойи мудҳиш.
- 61 Битта ҳам тирик жон қолмаган асло.
Қайтадан дунёга келмиш ўша халқ,
Чумоли зотидан бўлганмиш пайдо.
- 64 Роқимлар шундоқ деб ёзмишлар филҳақ;
Жарлик тубидаги арвоҳлар ҳоли
У элдан минг бора баттар эди, ҳақ.
- 67 Бирови судралса қуриб мажоли,
Бирови юзтубан чангда, тўзонда
Ўрмалаб юрарди ортиб малоли.
- 70 Жимгина кезардик ушбу маконда,
Ерпарчин қавмда назар ва нигоҳ,
Диққат ва хаёл ҳам шулар томонда.
- 73 Қайрилиб боқдиму кўрдим баногоҳ,
Туарди ўтдаги товага ўхшаш
Елка қалаштирган иккита арвоҳ.
- 76 Отбоқар хўжасин куттирса дил ғаш,
Ва ёким ишидан ҳориса, шитоб
Отини қашламас буларга ўхшаш.
- 79 Бақамти бўлишиб икковлон хароб
Роса қашланарди босишиб тирноқ,
Балки сал хуш ёқиб, тарқагай азоб.
- 82 Кўчиб кетган эди териси мутлок;
Шундоқ тозаларлар балиқ танасин,
Тангасига роса ишқашиб пичоқ.
- 85 Устоз хитоб қилди бирига: “О, сен,
Бармоғинг омбурдай бурдалайди гўшт,
Кўрмадингми бунда лотин бандасин?”

- 88 Гар билсанг, айт бизга, лутф айлагил хуш,
Тирнофинг то абад кўрмасин завол,
То абад хизматда билмасин ҳориш”.
- 91 У жавоб айлади хўрсиниб дарҳол:
“Қошингда турган биз худди итальян,
Айт-чи, ўзинг кимсан бергувчи савол?”
- 94 Устозим дедики: “Тирик зот билан
Айланиб юрибмиз қопқалар оша,
Дўзахни кўргай у равзан-баравзан”.
- 97 Мен томон ўгрилиб, қалтираб, шоша
Нигоҳ қадаб қолди икков дадил таъб,
Боқди бошқалар ҳам — аҳли томоша.
- 100 Устоз деди менга хуш назар қадаб:
“Қандай гапинг бўлса дарров айта қол”.
Сўз бошладим устоз раъига қараб:
- 103 “Сизлар барпо бўлган ва топган камол
У ёруғ дунёда сиздан қолган из
Ўчмасин, сира ҳам топмасин завол.
- 106 Айтинг-чи кимсизлар, қайси элдансиз,
Азобингиз гарчи жирканч ва макруҳ,
Қошимда уялиб, оп қилманг ҳаргиз”.
- 109 “Мен ареццоликман,— жавоб қилди рух, —
Съенада мени ёққан Альберо,
Гарчанд у сабабли эмас бу андуҳ.
- 112 Ҳазил қилиб девдим унга бир бора:
“Кўкка учишнинг ҳам билгайман сирин”.
Шу гапга ишонди галварс бечора.
- 115 Туриб олса борми қанот бер деб чин,
Ундан чиққан эмас Дедал албатта,
Мени ўтда ёқди пири ва лекин.
- 118 Алхимик эдим мен, шу сабаб шартта,
Хатолардан холи, тўғригўй Минос
Ўнинчи зиндонга тутқазди патта”.

- 121 Шоирга дедимки: “Галварсликда рост,
Съеналикларнинг тенги жуда кам,
Бас келиши қийин фаранг ҳам паққос”.
- 124 Тилга кирди энди ўзга маҳкум ҳам,
Деди: “Стриккини қўшманг ҳисобга
Пухта у, фойдасин билган чинакам.
- 127 Никколо номи ҳам кирмас бу бобга,
Илк бор етиштириб қалампирмунчоқ,
Текин ақча топиб, чиққан рўёбга.
- 130 Качча, д’ Ашшано бофини андоқ
Улфатлари билан совуриб еган,
Абалъято еган эсини мутлоқ.
- 133 Съеналикларни икков сен билан
Айлаб ўтирибмиз роса масхара,
Разм сол, зотман мен Капоккъо деган.
- 136 Дунёда беҳуда бўлиб овора
Қалбаки маъданлар ясаб юрардим.
Мен билган зот эсанг, эсларсан зора.
- 139 Тенги кам устомон эдим мен қадим”.

